

S. BULATOV, A. MUXTOROV

# *Ganchkorlik san'ati*



O'ZBEKISTON RESPUBLIKASI OLIY VA O'RTA MAXSUS TA'LIM VAZIRLIGI

SAIDAHBOR BULATOV  
ASROL MUXTOROV

# G A N C H K O R L I K S A N ' A T I

*O'zbekiston Respublikasi  
Oliy va o'rtal maxsus ta'lif vazirligi tomonidan  
oliy o'quv yurtlari uchun darslik sifatida  
tavsiya etilgan*

«Musiqa» nashriyoti  
Toshkent  
2006



M a s ' u l m u h a r r i r :

T.QO'ZIYEV, O'zbekiston Badiiy Akademiyasining raisi, professor.

T a q r i z c h i l a r :

A.HAKIMOV, O'zbekiston Badiiy Akademiyasi akademigi, san'atshunoslik fanlari doktori.

B.BOYMATOB, pedagogika fanlari nomzodi, dotsent.

**Bulatov, Saidahbor; Muxtorov Asrol.**

Ganchkorlik san'ati: Oliy o'quv yurtlari uchun darslik / S.Bulatov, A.Muxtorov. – T.: Musiqa, 2006, 124 b.

BBK 85.126 y 76

Darslikda ganchkorlik san'ati tarixi, usta va shogird odobi, ganch o'ymakorligida qo'llaniladigan asbob-uskunalar va ulardan foydalanish, naqsh, uning turlari, naqsh elementlarini chizish, o'ymakorlikda ishlataladigan ashyolar, pardoz turlari, oddiy va kompozitsion naqsh o'yish va pardozlash sirlari o'rgatiladi. Har bir mavzuga oid suratlar, chizmalar, savollar, amaliy mashqlar keltirilgan.

Mazkur darslik pedagogika universitetlarining badiiy grafika fakulteti bakalavr yo'nalishidagi «Ganchkorlik» fani dasturi asosida yozilgan bo'lib, shu fakultet talabalariga mo'ljallangan.

№ 472-2006  
Alisher Navoiy nomidagi O'zbekiston  
Milliy kutubxonasi

Qat'iy buyurtma.

ISBN 978-9943-307-01-8

© O'zbekiston davlat konservatoriyasining  
«Musiqa» nashriyoti, 2006

## K I R I S H

Qadimda odamlar o‘z maskanlariga, devortoshlarga ov jarayonlari, jang-jadallar, bazmlar, tantanali marosimlar suratini chizganlar. Jumladan, Afrosiyob, Varaxsha, Bolaliktepa va boshqa obidalar qoldiqlari shundan dalolat beradi. Islom dini yoyilgach, tirik mavjudodni aks etti-rish taqiqlab qo‘yildi. Shuning uchun ularning o‘rniga o‘simliksimon, geometrik naqshli bezaklar chizish an‘anaga aylandi. Bu naqshlarga chuqur mazmun singdirilgan. Naqshlarda ramziylik ustuvor. Ota-bobolarimiz qadimiy obidalarni nafis naqshlar bilan bezar ekanlar, zavq olish bilan bir qatorda, ular orqali o‘z orzu-umidlarini, muhabbatlarini, tilaklarini aks ettirganlar. Naqqosh ota-bobolarimiz inson ruhiyatini chuqur va har taraflama o‘rganib, uylarni ajoyib naqsh-nigorlar bilan bezaganlar. Naqshlangan uyda kishilar xotirjam, ruhiy osoyishtalik og‘ushida bo‘lishi, uzoq umr ko‘rishi donishmand bobolarimiz asrlar davomida, hayotiy tajriba asosida ilg‘aganlar.

Keksa ustalarimizning aytishicha, qadimda naqqoshlik san‘ati shunchalik rivojlangan ekanki, ular chizgan yoki bo‘yagan naqshlari orqali bir-birlari bilan unsiz gaplasha olar ekanlar. Naqsh san‘ati tilini tushunish uchun naqshning har bir elementi va ranglarining ramziy alifbosini bilish kerak bo‘lgan.

Alisher Navoiy, Abu Rayhon Beruniy, Abu Ali ibn Sino, Xorazmiy, Nizomiy Ganjaviy, Nosir Xusrav, Kamoliddin Behzod, Maoniy, Firdavsiy, Umar Xayyom, Bobur kabi jahonga mashhur olim, shoir va naqqoshlar binolaramizni tabiatning go‘zal manzaralariga monand naqshlar bilan bezashga chaqirganlar, kishilarni go‘zallikdan bahramand bo‘lishga undaganlar.

Zero, muqaddas kitobimiz Qur’oni Karimda «Ollo go‘zal va u go‘zallikni sevadi», deyiladi. Islomning estetik nuqtai nazari – go‘zallikka oshno bo‘lmoqdir. Allo go‘zal ekan, u yaratgan odam ham, u bunyod qilgan olam ham, bandalarga hadya etgan noz-ne’matlari ham go‘zaldir. Shunga muvofiq, Allohnинг ism-sifatlarini vasf etuvchi so‘zlarimiz, uning qudratini tamsil etuvchi binolaramiz, me’moriy obidalarimiz, qo‘yingki, bu olamda Tangri irodasi, ism-sifati bilan bog‘liq nimaiki narsa bo‘lsa, hammasi go‘zal bo‘lishi kerak. Go‘zal

yozuvalar, g‘azallar, naqshlar, me’moriy obidalar, tasviriy san‘atning islimiyy-tilsimiy turlari eshitish va ko‘rish a‘zolari orqali ruhimizga quvonch olib keladi. Islom madaniyatni ijod dasturida fikr va narsalarning shakl yaxlitligi ramziy-tilsimiy mazmun qobig‘iga o‘ralgan. «Naqsh, chodraga o‘ralgan ayolga o‘xshaydi. Naqsh – haqqoniyatni qo‘l bilan ushlab ko‘rish emas, go‘zallikning mohiyatini anglash, shu go‘zallikni dilda tasdiqlash, chodra ortidagi holatga o‘zni tayyorlash va unga kirib borish timsolidir<sup>1</sup>. O‘tmish qadriyatlar xalqning bebaho madaniy merosi. Ularda asrlar tajribasi jamlangan, bobolarimiz ijodiy mehnati mujassam. Mustaqillikka erishgan xalqimiz san‘atshunoslarini madaniy meros xazinasiga munosib yodgorlik yoki yodnomalarni izlab topish, ularni chuqur o‘rganib, mag‘zini chaqish, yangi zamon madaniyati ravnaqiga xizmat etish kabi mas‘uliyatli ishlar kutib turibdi.

O‘zbekiston xalqining tarixi, qadriyatlar, ilm-fan, madaniyat durdonalarini har tomonlama ilmiy o‘rganish va tahlil etish g‘oyat muhimdir. «Bugun bizning oldimizda shunday tarixiy imkoniyat paydo bo‘ldiki, – degan edi Prezidentimiz I. A. Karimov, – biz bosib o‘tgan yo‘limizni tanqidiy baholab, milliy davlatchiligimiz negizlarini aniqlab, buyuk madaniyatimiz tomirlariga, qadimiy merosimiz tomirlariga qaytib, o‘tmishdagi boy an‘analarni yangi jamiyat qurilishiga tadbiqu etmog‘imiz kerak»<sup>2</sup>. Respublikamiz hukumatining qator hujjalari Vatanimizni har tomonlama, jahon andozalari asosida rivojlantirishga qaratilayotgani bejiz emas. Jumladan, yoshlarga ta‘lim-tarbiya berishda madaniyatimiz, qadriyatlarimiz, milliy san‘atimiz namunalaridan, ota-bobolarimiz tomonidan yaratilgan va jahonga mashhur ajoyib san‘at namunalaridan keng foydalanishga katta ahamiyat berilmoqda. Shu ma’noda respublika hukumati tomonidan xalq ta‘limi tizimini tubdan isloh qilish maqsadida 1997-yil «Ta‘lim to‘g‘risida»gi Qonun va «Kadrlar tayyorlash milliy dasturi» qabul

<sup>1</sup> G‘afur G‘ulom. Ibtidodagi ahd. «Tafakkur» jurnali, 1994, № 1, 53–54-betlar.

<sup>2</sup> I.A.Karimov. O‘zbekistonning siyosiy-ijtimoiy va iqtisodiy istiqbolining asosiy tamoyillari. T., «O‘zbekiston», 1995, 9-bet.

qilindi. Unda «O‘zbekiston Respublikasining ta’lim sohasidagi siyosati umuminsoniy qadriyatlar, xalqning tarixiy tajribasi, madaniyat va fan bobidagi ko‘p asrlik an’analar, jamiyatning istiqboldagi rivojlanishini hisobga olgan holda yurgiziladi», deyilgan<sup>1</sup>.

Milliy kadrlar tayyorlash sifatini yanada yaxshilash uchun pedagogika universitetlarida yangi standartlar va o‘quv rejalarini asosida dasturlar tuzildi. Dasturlar asosida darsliklar yozilmoqda. Mazkur darslik ham pedagogika universitetlarining badiiy grafika fakulteti bakalavr yo‘nalishidagi «Ganchkorlik» fani dasturi asosida yozilgan. Darslik shu fakultetning talabalariga mo‘ljallangan.

Darslikda ganchkorlik san’ati tarixi, usta va shogird odobi, ganch o‘ymakorligida ishlatiladigan asbob-uskunalar va ulardan foydalanish, naqsh, uning turlari va ramziylik, naqsh elementlarini chizish, ganch o‘ymakorligida ishlatiladigan materiallar va ularni ishlatish texnologiyasi, pardoz turlari, oddiy naqsh va namoyon kompozitsiyalari tuzish, o‘yish va pardozlash o‘rgatiladi. Har bir mavzuga oid suratlar, chizmalar, savollar, amaliy mashqlar va adabiyot ro‘yxati berilgan.

Ganchkorlik juda qiziqarli, o‘ziga xos, murakkab san’at. Uni egallash uchun materialarni o‘zlashtiribgina qolmay, balki olingan bilimni hayotga tadbiq qilishni ham o‘rganish zarur.

---

<sup>1</sup> Qarang: «Xalq ta’limi» jurnali, 1992 yil, 10–12-soni, 1-bet.

## GANCHKORLIK SAN'ATI TARIXI

Ganchkorlik qadimiy san'at turlaridan. U Sharq mamlakatlari, xususan, O'rta Osiyo, Eron, Turkiya, Arabiston, Afg'oniston va boshqa mamlakatlarda taraqqiy etgan. Ayniqsa, O'rta Osiyoda yaratilgan asarlar badiiyligi, kompozitsiyasi va ishlanish uslubi bilan farq qiladi. Ganch naqshlar O'zbekistondagi ko'pgina obidalarga ko'raklik, go'zallik baxsh etib turibdi. U Samarqand, Buxoro, Toshkent, Qo'qon, Marg'ilon, Xiva, Shahrisabz va boshqa shaharlardagi tarixiy obidalarni qurish va bezatishda ishlatilgan.

Ganch o'ymakorligi san'ati asrlar davomida rivojlangan. Bu san'atning qadimgi, o'rta asrlardagi va XX asrdagi rivoji bir-biridan ancha farq qiladi. Qadimgi ganch o'ymakorligi hajmiy bo'lib, unda realistik tasvir ustunlik qiladi. Ularda, ko'pincha, odamlar, hayvonlar, qushlar tasvirlangan. Eramizning birinchi asrlaridayoq kishilar ganchning ajoyib xususiyatga ega ekanligini bilib, qal'a, karvonsaroy va boshqa joylarni bezay boshlaganlar.

III asrda Tuproqqa'nning serhasham saroy mehmonxonalar o'yma ganch bilan bezatilgan. Varaxshadan VII–VIII asrlarga oid ganch o'ymakorligi namunalari topilgan. Ularda qushlar, hayvonlar, baliqlar, o'simliksimon va geometrik shakllar tasvirlangan.

X–XI asrlarda naqqoshlik, yog'och, tosh va ganch o'ymakorligi yanada rivojlandi. Murakkab abstrakt tasvirni aks ettiradigan naqshlar paydo bo'ldi. Ganch o'ymakorligi ishlari uyning ichki va nam tegmaydigan tashqi qismida ham qo'llanildi. Termiz maqbaralaridagi ganch o'ymakorlik san'atini o'sha davrning yuqori cho'qqisi desa bo'ladi. XII asrda muqarnaslar paydo bo'ldi va ko'pgina binolarda qo'llanila boshladi.

XIII asrda ganchkorlik san'ati yanada yüksaldi. Bunga Afrosiyobdan topilgan ajoyib ganch o'ymakorligi ishlari misol bo'la oladi.

XIV–XVIII asrlarda ham binolarning ichki qismlarini bezatishda ganchkorlik san'atidan foydalanilgan. Ganchkorlikning gullab-yashnagan davri XVIII asrning oxiri – XIX asrning boshlari bo'ldi. XIX–XX asrlarda buyuk ganch o'ymakorlaridan Abdurahim Hayotov, Usta Murod, Usta Fuzayl, Usta Hayot Nosir, Usta

hoji Hafiz, Usta Nasrulloboy, Usta Abdujalil, Usta Azim, Usta Omonullo, Usta Shamsiddin G'osurov, Usta Ibrohim, Usta Savri, Usta Abdufattoh va boshqalar faoliyat ko'rsatdilar.

XX asr boshlaridagi ishlarda o'yma relyefli mayin uslub paydo bo'ldi. Rangli ganchlar, bo'yoqlar, naqsh va tasvirlar qo'llanila boshladi.

1913–1914-yillarda Buxoroda Sitorai Mohi Xosa qurildi. U ganch o'ymakorligi bilan bezatildi. Oq uy (mehmonxona)ni o'sha davrdagi ganch o'ymakorligining ajoyib namunasi desa bo'ladi. Bunda oyna ustida ganch o'ymakorligi bajarilgan. U o'zining nozikligi, jumjimadorligi bilan ajralib turadi. Mazkur saroyning bezak ishlarini Usta Shirin bajargan. U o'sha davrda eng ko'zga ko'ringan ganchkor ustalardan edi.

1918–1920-yillarda hunarmandlar komiteti va Toshkent o'lkashunoslik hunarmandlar tashkiloti o'quv-namunaviy ustaxonalarini va hunarmandlik muzeyi tashkil etdi. O'zbek ustalari 1937-yilda Parijda «San'at va texnika – hozirgi kunda» degan ko'rgazmada ikkita «Gran pri», bitta oltin medal va ikkita kumush medal bilan mukofotlandilar.

1947-yil Toshkentda me'mor A.Muxamedshin boshchiligidagi Kurant binosi qurildi. Bu binoni bezashda Usta Shirin Murodov qatnashdi.


O'zbekiston me'morchiligiga katta xazina bo'lib qo'shilgan O'zbekiston Davlat opera va balet katta teatri 1947-yil akademik arxitektor Aleksey Shchusevning loyihasi va rahbarligi ostida qurib bitkazildi. Shchusev O'zbekiston viloyatlaridagi ganchkor ustalarni yig'ib, ular oldiga ikki muhim vazifa qo'ydi: avvalo, teatrning zallari har bir viloyatning o'ziga xos milliy uslubi asosida bezalishi, ikkinchidan, bezalgan xona teatrning arxitektura badiiy obraziga mos tushishi kerak edi. Teatrning Xiva, Termiz zallari qadimda ishlatiladigan ganchkorlik uslubida ishlandi. Buxoro, Toshkent, Farg'ona va Samarqand zallari esa zamonaliv xalq an'anasiga mos bo'lgan ganch o'ymakorligi bilan bezatildi.

1952-yil Toshkentdagagi P.P.Benkov nomli badiiy bilim yurtida xalq amaliy san'ati bo'limi ochildi. Bu yerda Davlat mukofoti laureati Usta Shirin Murodov, Usta Toshpo'lat Arslonqulov, Mahmud Usmonov ganch o'ymakorligidan dars berdilar.







50-yillardan boshlab xalq amaliy san'ati turlari – naqqoshlik, ganchkorlik, yog'och o'ymakorligi kabilalar turg'unlikka uchradi. «Tez va arzon quraylik, ortiqcha hashamlardan qochaylik» shioriga ko'r-ko'rona amal qilindi. Natijada ba'zi naqqosh ustalar va ularning shogirdlari hunarlarini tashlab, boshqa ishga o'tib

ketdilar. Lekin ustozlar tushkunlikka tushmadilar. Ular maktablarda, o'quvchilar saroylarida amaliy san'at turlari sirlarini yoshlarga o'rgatishni davom ettirdilar.

Farg'ona naqqoshlik maktabining ko'zga ko'ringan ustasi Saidahmad Mahmudov 1963-yil Qo'qondagi shahar o'quvchilar saroyida yosh



Afrosiyob. Gumbazli binoning ichki bezaklari.



H

Somoniyalar  
saroyidagi  
idora qismidagi  
bezaklar (IX  
asr. Rempel M.I.  
chizmasi).

naqqoshlar to‘garagini ochdi. 1967-yildan so‘ng binolarni milliy bezash rivoj topa boshladi. Ayniqsa, naqqoshlik rivojlana boshlandi. Ustalarning shogirdlari ham shuhrat qozona boshladilar. Ganchkor Tohir Sharipov, naqqosh M.To‘rayev ochgan to‘garaklarda yuzlab yoshlari xalq amaliy san’ati sirlarini o‘rgana boshladilar. To‘garak a‘zolarining ishlari Italiya, Yaponiya, Chexoslovakiya, Kubadagi ko‘rgazmalarda namoyish etilib, ular oltin, kumush va bronza medallarga ega bo‘ldilar.

O‘quvchilar o‘rtasida ko‘rgazmalar, tanlovlardan, olimpiyadalar va boshqalar tashkil etildi. Ganch o‘ymakorligi to‘garagi a‘zolarining ajoyib ishlari Amerika, Yaponiya, Kanada, Chexoslovakiya, Germaniya va ko‘pgina davlatlarda namoyish etildi.

M. Usmonovning shogirdlari Mirziyod Karimov, Abdurahmon Sultonov, Mirvohid Usmonov, Anvar Po‘latov, Mirmahmud Rahmonov, Habibiddin Murodov, Mo‘min Sultonov, Faxriddin Hamdiyev, Ziyovuddin Yusupov, Rauf Ibodov, Umar Tohirov, Yusuf Odilovlarni bugungi kunda xalqimiz yaxshi biladi.

O‘zbekiston ganch o‘ymakorligi san’ati yuksak darajada rivojlanib qardosh xalqlar taraqqiyotiga ham katta ta’sir etmoqda.

1978-yilda O‘zbekistonda «Usto» xalq san’ati birlashmasi tashkil etildi. Bu xalq amaliy san’atining rivojlanishi, ustalarning ijodiy mehnatini tashkil etish va tayyorlangan buyumlarni sotishda hamda ustalarning shogirdlar tayyorlashida muhim rol o‘ynadi.

Respublikamizning mustaqillikka erishishi tufayli o‘tmishda yaratilgan beba ho ma’naviy boyliklarni, madaniy merosni, ganchkorlik san’atini chuqur o‘rganib, kelajak avlodga etkazish uchun keng imkoniyatlar yaratildi.

O‘zbekistonda Badiiy akademiya, hunarmandchilik uyushmalari, litseylari va kollejlari, Kamoliddin Behzod nomidagi Milliy rassomchilik va dizayn institutining ochilishi, chet ellarda turli ko‘rgazmalar tashkil etilishi amaliy san’atni va hunarmandchilikni rivojlantirishga katta turki bo‘ldi.

1994-yil 7–15-oktabrda Pokistonning Islomobod shahrida islam mamlakatlari hunarmandlarining birinchi xalqaro festivali bo‘lib o‘tdi. Bu festivalga O‘zbekiston, Qozog‘iston, Tatariston respublikalari hunarmandlari ishlari bilan qatnashdi. O‘zbekiston hunarmandlari – Fatxilla Jumayev, Ortiq Fayzullayev,

Shokirjon Komilovlar konkurs g‘oliblari deb topildilar.


Ulug‘ muhaddis Imom al-Buxoriy tavalludining 1225 yil munosabati bilan 1998-yil 24-oktabrda Samarqandda Imom Buxoriy maqbarasi majmuasi qayta tiklanib, bezatildi. Unda O‘zbekistonning turli viloyatlaridan kelgan xalq amaliy san’ati ustalari o‘z san’atlarini namoyish qildilar.

Ustalarimiz Respublika Oliy Majlis, shahar hokimligi, Temuriylar muzeyi, masjid, madrasa va boshqa binolarni zamonaviy o‘yma ganch bilan bezadilar.

O‘zbekistonda o‘ziga xos ganchkorlik maktablari mavjud. Shulardan biri Xorazm ganchkorlik maktabidir. Xorazm me’morchiligidagi geometrik naqshlarga keng o‘rin berilgan bo‘lib, ular boshqa viloyatlarga qaraganda o‘ziga xosligi bilan ajralib turadi. Ayniqsa, o‘simliksimon naqshlar spiral shaklida aylammaligi, dinamikligi bilan farq qiladi. Islomiy naqshlar ko‘pincha yaxlit-yaxlit turunj, madohil, qalampir, bodomga o‘xhash tanob shakllarining takrorlanishidan hosil bo‘ladi. Ba‘zi hollarda turunj, madohil tanoblari o‘rniga yulduzsimon girihsalar ham ishlatiladi. Islomiy naqshlarda novda juda ko‘p ishlatilib, marg‘ula, barg, uch barg, shukufta, oygul, no‘xot gul, kurtak va g‘unchalar ko‘p qo‘llaniladi. Xiva ganchkorligidagi eng xarakterli tomonlardan biri – naqshlarning erkin va harakatchanligi, jo‘sinqinligidir. Bu maktab ustalari naqshlarni ko‘p hollarda ko‘k va yashil rang bilan bezaganlar. Ro‘zimat Masharirov, Karimbergan Rahimov, Karimbergan Polvonov, Yusuf Xudoyberganov, Bekjon Yoqubov, Odamboy Bobojonov, Odamboy Yoqubov kabilar Xorazm ganchkorlik maktabi namoyandalaridir.

Buxoro ganchkorlik maktabi bu sohada eng mashhur. Buxoro maktabi ishlari o‘yma ganchlarning yirikligi, mayinligi, jozibadorligi va boshqa tomonlari bilan ajralib turadi. Buxoro ganchkorlik maktabining eng yirik namoyandalaridan biri akademik Usta Shirin Murodovdir. Buxorolik Usta Safar, Usta Adis, Usta Savri, Usta Isom, Usta Ikrom, Usta Jo‘ra, Usta Qurbon Yo‘ldoshev, Usta Ibrohim Hafizov, Usta Nazrullo Yodgorov, Usta Hayot Nosirov va boshqalar mamlakatimizda taniqli.

Toshkent ganchkorlik maktabi ham o‘ziga xos. Bu maktabga xos naqshlar nozikligi, aniq simmetrik taqsimga egaligi, jozibadorligi bilan ajralib turadi. Toshkent ganchkorlik maktabi namoyandalar safida Usmon Ikromov, Toshpo‘lat Arslonqulov,



Buxorodagi Sitorai Mohi Xosa. Oq uyning ichki bezaklari



Xalq ustalalri Shamsiddin G'ofurov  
va Usta Shirin Murodov

Mahmud Usmonov, Anvar Po'latov, Mirmahmud Rahmatov, aka-uka Abdurahmon va Mo'min Sultonovlar, Hayot Abdullayev, Ziyodulla Yusupov, Umar Tohirov, Mirvohid Usmonov kabi qator yetuk ustalar bor.

Samarqand butun dunyoga mashhur eng qadimiy shaharlardan biri bo'lib, u yerda ishlangan naqshlarning har biri o'ziga xos. Samarqand ganchkorlik maktabi namoyandalari Usta Anvar Quliyev, Usta Tursunboy Ismoilov, Shamsiddin G'ofurov, Quli Jalilov va boshqalardir.

Ganch o'ymakorligi turlari. Har qanday binoni bezashda avval uning tuzilishiga mos ganch o'ymakorligi turini tanlash, qo'llash muhim ahamiyatga ega. Kichik xonaga mayda tekis o'yma va unga mos bo'lgan pardoz turi, katta mehmonxonalarga esa yirik o'yma va shunga mos naqsh qo'llaniladi. Ganch o'ymakorligi yirik o'yma, chuqur o'yma, yassi o'yma, qirma, zamini ko'zguli o'yma, zamini rangli o'yma, chizma pardoz, panjarasimon o'yma, zanjir, hajmli o'yma turlaridan iborat. Bundan tashqari, ganch o'ymakorligi turlari zaminli va zaminsiz o'ymalarga bo'linadi.

Eng ko'p qo'llaniladigan o'yma – yassi o'ymadir. U interyerda ko'p qo'llaniladi. Katta bo'limgan xonalarda o'ymaning chuqurligi 1–1,5 sm bo'lib, unga har xil pardoz turlari beriladi. O'yma naqshning zamini umumiy yuzaning 30–60 foyizini egallaydi. Unga joyiga moslab pax pardoz, choka pardoz, lo'la yoki tabaqa pardoz beriladi.

Qirma – o'yilgan joylarni rangli ganch qorishmasi bilan to'ldirishdir.

## TAYANCH TUSHUNCHALAR:

Hunarmand; Turunj; Madohili; Tanob;  
Marg'ula; Shukufa; Taqsim; Qirma.

### S a v o l l a r

1. Xalq amaliy san'atining qaysi turlarini bilasiz va ular qaysi tomonlari bilan bir-biridan farq qiladi?
2. Ganch dastlab qayerlarda ishlatalig'an?
3. Ganch qadimdan ishlatalishining sababi nimada?
4. Ganchkorlikning eng gullagan davri qachon bo'lgan?
5. O'zbekistondagi qanday ganchkorlik maktablarini bilasiz?
6. Mahmud Usmonovning hayoti va ijodi haqida nimalarni bilasiz?
7. Toshkent ganchkorlik maktabi namoyandalaridan kimlarni bilasiz?
8. Chuqur o'ymani tushuntirib bering?
9. Qaysi zamoniaviy binolar ganch o'ymakorligi bilan bezatilgan?
10. Ganch o'ymakorligining qaysi turlarini bilasiz?

### Test savollari

#### 1. Ganchkorlik san'ati qaysi asrlarda yuqori darajada rivojlangan?

- A. XV – XVIII asrlar.
- B. XI – XIV asrlar.
- C. V – XI asrlar.
- D. XIX – XX asrlar.
- E. XVIII – XIX asrlar.

#### 2. Toshkent ganchkorlik maktabi namoyandalari:

- A. Ro'zimat Mashari pov, Mahmud Usmonov, Anvar Ilhomov va boshqalar.
- B. Mahmud Usmonov, Usmon Ikromov, Toshpo'lat Arslonqulov, Asrol Muxtorov, Hayot Abdullayev va boshqalar.
- C. Hayot Abdullayev, Anvar Po'latov, Ziyovuddin Yusupov, Yusuf Xudoyber-ganov va boshqalar.
- D. Usta Anvar Quliyev, Usta Tursunboy Ismoilov va boshqalar.

#### 3. Ganch o'ymakorligi turlari:

- A. Panjarasimon o'yma va qirma.
- B. Choka pardoz, yirik o'yma, yassi o'yma boshqalar.
- C. Hajmli o'yma, zanjir o'yma, lo'la pardoz va boshqalar.
- D. Zanjir hajmli o'yma va choka pardoz.
- E. Yirik o'yma, chuqur o'yma, yassi o'yma, qirma, zamini ko'zguli o'yma, zamini rangli o'yma va boshqalar.

#### 4. Samarqanddagi Registon maydonida qaysi madrasalar joylashgan?

- A. Ko'kaldosh va Abulqosim madrasasi.
- B. Sher dor, Tilla kori va Ulug'bek madrasalari.
- C. Somoniylar maqbarasi, Sulton Mahmud madrasasi.
- D. Ulug'bek madrasasi va Go'ri Amir maqbarasi.
- E. Sitorai Mohi Xosa, Minorai Kalon.

#### 5. Amaliy san'at turlari:

- A. Haykaltaroshlik, naqqoshlik.
- B. Kulolchilik, zargarlik, ganchkorlik.
- C. Naqqoshlik, yog'och o'ymakorligi, manzara.
- D. Misgarlik, gilamdo'zlik, pichoqchilik.
- E. Chitgarlik, misgarlik, haykaltaroshlik.

#### 6. Toshkent ganchkorlik maktabi asoschilaridan birini aniqlang:

- A. Mahmud Usmonov.
- B. Saidahmad Mahmudov.
- C. Olimjon Qosimjonov.
- D. Anvar Ilhomov.
- E. Yoqubjon Rafov.

#### 7. Me'morchilikda koshinlar qaysi qorishma bilan yopishtirilgan?

- A. Ganch.
- B. Alebastr.
- C. Loy.
- D. Tuproq.
- E. Sement.

#### 8. O'zbekiston Respublikasi Prezidentining «Xalq badiiy hunarmandchilik – amaliy san'atini yanada rivojlantrishni davlat yo'lli bilan qo'llab-quvvatlash chora tadbirleri to'g'risida»gi farmoni qachon qabul qilingan?

- A. 1998-yil.
- B. 1980-yil.
- C. 1991-yil.
- D. 1997-yil.
- E. 2002-yil.

#### 9. Toj Mahal qayerda qurilgan?

- A. Buxoroda.
- B. Hindistonning Agra shahrida.
- C. Hindistonning Dehli shahrida.
- D. Samarqandda.
- E. Xivada.

**10. Hunar nima?**

- A. Kasbning bir turi.
- B. Tirikchilik manbai.
- C. Biror sohani biluvchi kasb egasi.
- D. Muayyan tayyorgarchilik talab etadigan va tirikchilik manbai bo'lgan ijodi mehnat faoliyati.
- E. San'atning bir turi.

**11. Ganchkor kim?**

- A. Ganch suvoq ustasi.
- B. Loykor.
- C. Suvoq ustasi.
- D. Ganch o'ymakor ustasi.
- E. Ustalarning ustasi.

**12. XX asr boshlarida Buxoroda qurilgan Sitorai Mohi Xosadagi ganchkorlik ishlari qaysi usta boshchiligidagi bajarilgan?**

- A. Usta Arslonqul Nazarov boshchiligidagi.
- B. Usta Usmon Ikromov boshchiligidagi.
- C. Usta Toshpo'lat Arslonqulov boshchiligidagi.
- D. Usta Abdurahim Hayotov boshchiligidagi.
- E. Usta Shirin Murodov boshchiligidagi.

**13. Toshkentdagagi Amaliy san'at muzeyining asosiy binosini bezashda qaysi ustalar qatnashgan?**

- A. Yoqubjon Raufov, Anvar Ilhomov.
- B. Toshpo'lat Arslonqulov, Usmon Ikromov va boshqalar.

C. Jalil Hakimov, Mahmud Usmonov.

D. Abdulla Boltayev, Mahmud Usmonov, Jalil Hakimov.

**14. O'zbek xalq amaliy san'ati turlarini sanab bering.**

- A. Naqqoshlik, ganchkorlik, yog'och o'ymakorligi, kulolchilik, zardo'zlik va boshqalar.
- B. Rangtasvir, qalamtasvir, grafika.
- C. Haykaltaroshlik, miniatyura, mozaika.
- D. Ganchkorlik, yog'och o'ymakorligi, grafika, sgrafito.
- E. Ganchkorlik, misgarlik va bo'yrachilik.

**Adabiyot**

1. B u l a t o v S. O'zbek xalq amaliy bezak san'ati. «Mehnat», Т., 1991.
2. B u l a t o v S. Ganchkorlik. Т., 1989.
3. З о х и д о в П. Самаркандская школа зодчих. Изд-во худ.лит. Т., 1965.
4. Н о т к и н И. Бухарская резьба по ганчу. Гос.изд.худ.лит. Т., 1961.
5. Справочник по строительству и архитектуре. М., 1956.
6. U s m o n o v M. San'atim-saodatim. «Yosh gvardiya», Т., 1983.
7. M u x t o r o v A. Ustoz va shogird odobi. «Mehnat», 1999.

## USTA VA SHOGIRD ODOBI

O'zbekiston qadimdan hunarmandlar markazi bo'lgan. Andijon viloyatining Shahrixonida, Samarqand viloyatining Urgutida, Farg'ona viloyatining Qo'qon, Marg'ilonida, Namangan viloyatining Chustida xalq hunarmandchiligi gullab-yashnagan. Hunarmandlar o'tmishda mahallalarga bo'linib yashaganlar, chunonchi «Zargarlik mahallasi», «Pichoqchilik mahallasi», deb yuritilgan. Misgarlik, bo'yra-chilik, sandiqchilik, pichoqchilik, aravasozlik, kulolchilik mahallalari ham bo'lgan. Masalan, XIX asr. oxiri XX asr boshlarida Buxoroda Bo'yrachi mahallasi bo'lib, u erda bo'yra to'qiydigan ustalar yashagan. Bo'yrachi mahallasida 120 ta oila yashagan.

Ustalar o'rtasida raqobat bo'lgan. Kimning mahsuloti sifatli bo'lsa, xaridor uning mahsulotini olgan. Shuning uchun har bir usta sifatli mahsulot tayyorlashga intilgan. Har bir ustaning o'z rastasi bo'lgan. Bozorda, odatda, bozor begi bo'lib, u keltirilgan mollarga narx belgilab chiqqanidan keyin savdo-sotiq boshlangan. Sifatsiz mahsulot ishlagan ustaning bozori kasodga uchragan.

Ustalar o'tmishda bilimdon bo'lgan. Ular madrasada tahsil olib, adabiyot, tarix, musiqa, matematika, kimyo fanlarini yaxshi bilganlar. Naqqoshlik texnologiyasi avloddan-avlodga o'tib kelgan. Qadimda naqqoshlar naqsh yaratish sir-asrorlarini yozib qoldirmaganlar, faqat shogirdlari bilganlar. Shogirdlari usta bo'lganlaridan so'ng, ular ham o'z shogirdlariga o'rgatgan. Shunday qilib, naqqoshlik kasbi an'ana tariqasida rivojlanib kelgan.

Usta o'z bolasini yoki qarindoshlarini o'ziga shogirdlikka olgan. Shogirdlikka 7–8 yoshdan olingan. O'qish-o'rganish 7–12 yil davom etgan. Shogirdlar kunduzi ishlab, kechqurun ustoz rahbarligida savod chiqargan. Shogirdlar geometriya va kimyoni o'nganganlar.

Shogird mustaqil ishlash darajasiga yetgach, ustalar uning ishlarini muhokama qilib, so'ngra «usta» nomini berishgan.

Ustaning o'g'li ota kasbini yoshlikdan o'rganib borgan. Bu esa uning kelajakda yaxshi hunarmand bo'lishiga zamin yaratgan. Ustaning o'g'li bo'lmasa, u bu kasbni eng yaqin qarindoshlarining bolalariga o'rgatgan.

Xullas, kasb avlodga meros qolish ~~shaklida~~ rivojlangan. Shogirdlikka berishda quyidagi urfdot bo'lgan: Bolani usta oldiga olib borish o'ziga yarasha tantana bo'lgan. Ota-onha va qarindosh-urug'lar «bo'y» degan bo'g'irsoq va holvaytar olib, ustaning huzuriga kelganlar va «Bolaning go'shti sizniki, suyagi bizniki» qabilidagi gaplar bilan bolani uning ixtiyoriga topshirganlar. Keltirilgan pishiriqlar o'sha paytdayoq birgalikda tanovul etilgan. Usta bolaga hunar o'rgatishdan tashqari, butun o'qish davomida o'zi oziq-ovqat bilan ta'minlab turgan. Kasb tekinga o'rgatilgan.

Ustoz qattiqqa'l va talabchan bo'lgan. Zero, hunarni o'ta nozik did va sabr-toqat bilan o'rganish mumkin. Ustalar shogirdlar uchun maxsus odob talablarini ishlab chiqqanlar. Masalan, ular shogird dan pokizalikni, ish vaqtida chalg'imaslikni, egri va noma'qul ishlarga yaqin yo'lamaslikni, ustoz ruxsatsiz biror ishga qo'l urmaslikni qat'iy talab qilganlar.

Usta shogirdga hunardan tashqari uy yumushlarini bajarishni ham o'rgatib borgan. Shogird san'at sirlarini puxta egallagandan so'ng, oq fotiha berilgan. Marosimda shogird ustoziga bosh-oyoq sarpo, tugun in'om etgan.

Ba'zan ustoz shogirdi mustaqil ish boshlashda qynalmasligi uchun shu kasbda ishlatiladigan asbob va andozalar bergen. Oq fotiha olgan shogird mustaqil ishlashni xohlamasa ustoznikida qolib ishlayvergan. Bunday holda ustoz bilan kelishib olib, ish haqi olgan.

O'zbek ustalaridan biri — ganch o'ymakor usta Usmon Ikromovning hayot yo'li ibratlari. Yosh Usmon usta Rasulhojining huzurida 8 yil ishlaydi. Besh yilgacha haftalik haqi 10 tiyindan oshmagan. Har payshanba kuni Rasulhoji shogirdi qo'liga 10 tiyin bergen. Usmon pulni olib, bozordan onasi va ilki singlisiga yegulik olib borgan. Odatda, shogird faqat usta buyungan ishni qilishi kerak bo'lgan. Shogird ustadan beruxsat biror ishga qo'l ursi yoki uning asboblariga teginsa kaltak yegan. Olinchi yilga o'tganda Usmonning haftalik ish haqi 50 tiyinga, sakkizinchchi yilga o'tganda esa kundalik ish haqi bir so'mga chiqqan. Bu paytda u imorat ishidagi oddiy cho'pgarlikdan tortib, g'isht terish, suvoq, ganch o'ymakorligini mustaqil bajara oladigan bo'lgandi. Nihoyat

sakkiz yil deganda Usmon ustasi Rasulhojidan oq fotiha olib, «usta» nomiga ega bo‘lgan.

Buxorodagi ganch sotadigan boylardan biri Abduqodir bir kuni Usta Hayotni chaqiradi va yangi uyni ganch bilan bezamoqchilagini aytadi. Usta Hayot bu ishni 22 yoshli Shirin Murodovga topshiradi. Bu ish Shirinning bиринчи mustaqil ishi bo‘ldi. Shirin mehmonxonani bezashda oddiy bejirim nisbatlarni, butun ko‘rinishni hisobga oladi. U mehmonxona va ayvонни sharafalar bilan bezaydi. Undagi o‘yma ganchlar juda mayin, bejirim chiqqanligi sababli ustalar orasida obro‘sи yanada oshadi. Usta Hayot kunlardan bir kuni Shirinni oldiga chaqirib, «Men sendan xursandman, endi mustaqil ishlayversang bo‘ladi», deydi. Azaliy odat bo‘yicha unga ustalar o‘rtasida «usta» nomini berishadi.

O‘zbek me’morlari yaxshi yashash uchun har jihatdan qulay, shinam, chiroyli uylar qurbanlar. O‘zbeklarning hovli-joyi tugal bir me’moriy ansamblni tashkil etib, fayzli bo‘lgan. Uylar bir-biriga uzviy qilib qurilgan. Bu ish san’at darajasiga ko‘tarilgan.

Har bir hunar odatda avloddan-avlodga o‘tgan, begona bolalardan esa iste’dodli, shu hunarga mehr qo‘yanlarigina tanlab olingan. Chinakam o‘ymakor ustalikni orzu qilgan kishilar madrasada tahsil ko‘rgan bo‘lishi, she’riyat va musiqa sirlaridan voqif bo‘lishi, hatto, musiqa asboblarini bir oz chala bilishi shart qilib qo‘yilgan.

Mashhur me’mor usta A.Haqqulov «Ta’mir san’ati» kitobida sevimli ustoz Usta Shamsining shogirdlariga bo‘lgan munosabatini shunday xotirlaydi:

— O‘smirlik yillarda xalq amaliy san’atiga mehr qo‘yan yaqin do’sti padari buzruk-vorimdan meni shogirdlikka so‘rab, «Kelajakda mening me’morchilik asboblarimga sohiblik qilsin», degan ezgu istaklarini bildirdilar. Shu kundan boshlab usta Shamsi menga me’morchilikning siru asrorlarini o‘rgata boshladilar. Usta Shamsi o‘ta kamtarin, oddiy, kamsuqum inson edi. Shogirdlarini jon-dilidan sevardi. U bor mehri, ilmi va aql-zakovaqini shogirdlariga bag‘ishlar edi. Men ana shunday zukkota’b va xushsuxan inson panohida kamolga yetganidan haligacha faxrlanaman. Davlat mukofoti laureati, «Mehnat» ordeni sohibi, O‘zbekistonda mashhur xalq ustasi Usta Shamsi xalq amaliy san’atining murakkab jihatlarini juda chuqur bilar edi. U shogirdlaridan ham xuddi shuni talab qilar,

erinchoq, go‘zallikdan zavqlanmaydigan, tarixiy obidalarga mensimay qaraydigan kishilarni jini suymasdi.

«Ustoz» degan nomni olish oson emas. Bu sharaflı nomni olish hammaga ham nasib etmagan. Bu ulug‘ nomni olish uchun ustalar ko‘p yillar davomida murakkab sinovlardan o‘tganlar.

### **Ustozning shaxsiy va kasbiy fazilatlari**

Inson hayoti bir manzildan ikkinchi manzilga qarab yuriladigan yo‘lga o‘xshaydi. Bu yo‘lning tekis, ravonligi ham, past-balandoғligi ham ko‘p bo‘ladi. Biz bu zamonda bamisolli tog‘ oshayotgan odamlarmiz. Tog‘ yo‘li mardlik, jasoratni ham, bag‘oyat hushyorlikni ham talab etadi, degan edi shoir Erkin Vohidov.

Yoshlarimizga milliy hunarmandchilikni o‘rgatib, milliy an’analarni davom ettirib kelayotgan ustalar kam emas. Biroq, shunga qaramay, o‘zbek milliy an’analarni qayta tiklash eng muhim vazifalardan biri bo‘lib kelmoqda.

Xalq hunarmandchiligidagi ustozlarning shaxsiy va kasbiy fazilatlarining mezoni bo‘lgan. Shu mezon asosida ustaga ijobjiy va salbiy baho bergenlar. Shuning uchun ota farzandini shogirdlikka berishdan oldin ustaning yuqoridagi mezonga javob bera olish-olmasligini o‘rgangan. Quyidagi xalq maqoli bejiz aytilmagan:

Yomon ustag‘a berma shogird etib,  
Buzar u, buzuq fe’lni o‘rgatib.

Quyida xalq hunarmandchiligidagi ustozlarning shaxsiy va kasbiy fazilatlari bilan tanishamiz.

**Ustozning shaxsiy fazilatlari.** Saxiy, odobli, mehr-shafqatli, marhamatli, ochiq yuzli, shirin muomalali, sabrli, talabchan, qanoatli, to‘g‘ri so‘zli, pok bo‘lish.

Rizouddin ibn Faxriddin ustozlarga shunday nasihat qilgan edi:

«Shogirdingizning har bir harakatiga qarab turingiz, ularga xushmuomala bo‘lishni o‘rgatingiz, so‘zlariyu fe’llarini yaxshilangiz, ust-boshlarini, kiyim-kechaklarini pok tutmalarini nazorat aylangiz. Yomon xulqlar yuqumli bo‘lganidan bir shogirdning yomon xulqi borligini bilsangiz, jumlasini barobar ko‘rib, jumlesi foyda olajak ravishda o‘rgatingiz, foydali ishlar, kerakli adablarning jumlasidan xabardor aylangiz, natijada bola mumkin qadar reja ila ish



Toshkentlik ganch oymakor usta Usmon Ikromov (Mahmud Usmonovning otasi)



Usta Shamsiddin G'ofurov  
(1950-yil)



Samarqandlik ganch oymakor usta Quli Jalilov (1950-yil)



Mahmud Usmonov ganchkorlik to'garagida shogirdlariga hunar sirlarini o'rgatmoqda (1953-yil)



Mahmud Usmonov shogirdlari davrasida



Usta Mirhamid Yunusov



Usta Savri (1950-yil)

qilmoq, ehtiyyotkorlik, poklik, ko'rkam tartib, ko'p foydasiga tirishmak kabi xosiyatlarini egallab oladi.

Hunarmandlarning kasb madaniyati bor. Ular quyidagilardan iborat:

- Hunarni jamiyat taraqqiyotiga hissa qo'shish maqsadida o'rghanish;
- mehnatsiz daromaddan qochish;
- ustozlar an'anasisiga sodiq bo'lish;
- mehnatsevarlik, halol mehnat qilish;
- intizomli bo'lish;
- muvaffaqiyatsizlikdan tushkunlikka tushmaslik;
- aqlli, tadbirkor bo'lish;
- rostgo'y bo'lish;



Usta Anvar Quliyev



Toshkent ganch o'ymakorligi maktabining namoyandasi Hodi Qosimov



Ganchkor va san'atshunos Z. Bositxonov



Toshpo'lat Arslonqulov ganch bilan bezamoqda (pastdagi, 1946-yil)

– pokiza bo'lish;

– bir ishni qiyomiga etkazmay, ikkinchi ishga o'tmaslik.

Hunarmand xoli bo'lishi lozim bo'lgan salbiy xususiyatlar:

- nopol yo'llar bilan boylik orttirish;
- boshqa hunarmandlarga nisbatan adovatda bo'lish va hasadgo'ylik;
- faqat boylik orttirish maqsadini ko'zlash;
- jur'atsizlik, dangasalik, yalqovlik, erinchoqlik, isrofgarlik, takabburlik, yolg'onchilik.

Shogirdlardan ba'zan ayrim kamchiliklar o'tib turadi. Ustozning vazifasi – ularning kamchiliklarini kechirish, bunday ishlarga yo'l qo'ymasliklari uchun shogirdlariga yordam berish.



Ganch o'ymakor ustalar Z. Yusupov va U. Tohirov

Ustozning kechira olishi oliyjanoblik va olimlarga xos sifatdir. «Kichiklardan adashish, kattalardan kechirish» deb bejiz aytishmagan.

**Ustozning kasbiy fazilatlari.** Ustozning kasbiy fazilatlariiga o'z hunariga qiziqish, hunarini yoshlarga sidqidildan o'rgatish, hunariga yangiliklar kiritish, yaxshi shogirdlar qoldirish va boshqalar kiradi.

Ustozning eng yaxshi kasbiy fazilatlaridan biri – shogirdlar tayyorlashdir. Har bir hunarmand ustani shogirdi bo'ladi. Shogirdsiz ustoz – mevasiz daraxt. Ustoz bilimdon shogird qoldirmasa, bu – uning hayoti, umri bekor o'tdi degan gap. Usta qanchalik buyuk bo'lmasin, tarixda qanchalik iz qoldirmasin, bilimini, hunarini ishonchli odamga qoldirmasa, uning ishlari oxir-oqibat yo'q bo'lib ketadi.

Qadimda hunarmand va xaridor o'tasidagi munosabatlarda o'ziga xos odob mezoni mayjud bo'lgan. Ular quyidagilardan iborat:

- savdoda poklik;
- halollik;
- adolatlilik;
- to'g'rilik;
- xushfe'llilik;
- nafsni tiyish;
- kambag'al bechoralarga xayru ehson qilish;
- mahsulotning asl bahosini bilmaganlarga to'g'ri muomala qilish;
- va'daga vafo;
- bajara olmaydigan ishga va'da bermaslik.

*Ota-onalarning farzandiga hunar o'rgatayotgan ustoz oldidagi burchlari va munosabat madaniyati.* Qadimda ota-onalar farzandlariga hunar o'rgatayotgan ustozni hurmat-ehtirom qilganlar. Ota-onalar va ustozlar o'tasida munosabat madaniyati ham o'ziga xos xususiyatga ega bo'lgan.

Ota-onaning ustozga munosabatida:

- ustozga muruvvat ko'rsatish;
- ustozning farzandiga bergen tanbehini to'g'ri tushunish;
- farzandining hunar o'rganishi uchun kerakli narsalarni yetkazib berish;
- ustozni rozi qilish va boshqalar talab qilinadi.

Ustozning ota-onaga ham o'ziga xos munosabat mezoni bo'lgan. Ular quyidagilardan iborat:

- shogirdiga hunar o'rgatish borasida zimmasiga olgan vazifasini bajarish;
- o'z va'dasining ustidan chiqish;
- ota-onaga farzandining qobiliyati, xulqodobi to'g'risida ochiq gapirish.

Xulosa qilib aytganda, hunarmandchilik Sharq xalqlarining qadimiy qadriyatidir. Uning o'ziga xos milliylik xususiyatlari, ta'limiy-tarbiyaviy imkoniyatlari, ustoz-shogird an'analari, ular o'rtaisdagi axloq-odob mezoni, madaniyati yosh avlodni hunarmandchilik kasbiga mehrmuhabbat ruhida tarbiyalashda muhim ahamiyatga egadir.

### Ustozni hurmat qilish

Ustoz shogirdiga qiyinchiliklar bilan san'at sirlarini o'rgatdimi, san'at olamiga olib kirdimi, uni shogird chuqrur hurmat qilmog'i ham farz, ham shartdir. Bu haqda buyuk mutafakkir Alisher Navoiy shunday degan edi:

Haq yo'lida kim senga bir harf o'rgatmish ranj ila,  
Haqqini ado aylamoq mushkul erur ming ganj ila.

Shogird ustozni hurmat qilishi va uning mehnatining qadriga yetmog'i kerak.

Bir hakimdan:

– Nima uchun siz ustozingizni otangizdek hurmat qilasiz? – deb so'rashdi.

U bunday javob berdi:

– Otam dunyoga kelishimga sababchi bo'lgan bo'lsa, ustozim hayotim boricha yaxshi yashashimga sabab bo'ldi.

Ba'zida shogirdlar hunarni puxta o'rganib oldim deb kekkayib, ustozni pisand qilmay qo'yadilar. Keyinchalik ular sifatsiz ishlar qilib, qoqilib, pushaymon yeydilar. Bu haqida Usta Mahmud Usmon o'zining «San'atim – saodatim» degan kitobida shunday deydi: «Men qo'lidan ish keladigan chapdast shogirdlarimni tanlab, oq fotiha berib, alohida brigada qilib chiqardim. Ular katta-katta, ma'suliyatli buyurtmalarni bajarib kelmoqdalar. Bilmaganlarini so'rashadi, yordam qo'lini cho'zaman. Har qalay bahamijhatlik yaxshi. Mutaxassislar respublikamizdag'i ganch o'ymakorligi ishlari ayrim joylarda pala-partish, uquvsizlik bilan bajarilayotganligi to'g'risida to'g'ri e'tiroz bildirishmoqda. Bunga tamoman qo'shilaman. Sababi, joylarda dardi pul bo'lgan, qo'l bola ustalar ko'payib bormoqda. Ganchkorlikdan chala xabardor «ustalar» o'zlaricha brigada tuzib, buyurtmalar olishmoqda. Mo'may daromadni tezroq undirish uchun ishni qo'laysin-do'laysin qilib, o'zlaricha «do'ndirib» bajarishmoqda. Bunday usta ko'rmagan shogirdlar ganchkorlikning murakkab qonun-qoidasini

bilmaganliklari tufayli har maqomga yo'rg'alab, san'atni qadrsizlantirmoqdalar».

Ustoz kasb o'rganishga kelgan yoshni o'z o'g'li qatorida ko'rishi, shogird esa ustozini o'z otasi o'rnida ko'rishi kerak. Xalqimiz «Ustoz – otangdek ulug» deb bejiz aytmagan.

Donishmandlarimizdan Faxriddin Rasul o'zining «Axloqnom» risolasida ustoz haqida shunday deydi: «Ustozni ranjitmoq ota-onani ranjitmoqdek zo'r gunoh. Tuqqan, yedirgan, kiydirgan hamda voyaga yetkazgan ota-onsa moddiy ota-onadir. O'qitgan, hunar o'rgatgan, fan-hunar cho'qqilariga yetaklab, ko'p zahmatlar oqibatida sening kamol topishingga sababchi bo'lgan ustozlar ma'naviy ota-onadir. Ilm, kasb o'rganish – xalq iborasida igna bilan quduq qazish kabitidir. Bu yo'lida senga rahnamo bo'lgan ustozlarning oldida umr bo'yи qarzdorsan».

### Ustoz haqida rivoyatlar

*Ustoz – otangdek ulug'dir.* Alisher Navoiy Abdurahmon Jomiy yashaydigan mahallaga yaqin kelganida otdan tushib, ustoz yashaydigan mahalla ahli bilan quyuq salomlashib, hol-ahvol so'rab, Jomiy uyigacha piyoda borar ekan. Shunda bir temirchi so'rabdi: «Amir Navoiy, nechuk ustoz uyiga yetmay turib otdan tushib olasiz. Axir, siz vaziri a'zamsiz-ku! Sizga bundoq yurish yarashmas». Alisher Navoiy jilmayib shunday debdi: «Yo'q birodar, men hozir ustozim Abdurahmon Jomiy yashaydigan mahallaga keldim. Demak, bu yerda yashovchi har bir fuqaro ustozimning tobutkashi hisoblanadi. Shundoq bo'lgach, nechun men ular, ya'ni siz muhtaramlar oldida hurmatsizlik qilishim kerak. Ustozimni qandoq avaylab-e'zozlasam, sizlarni ham shundoq ko'rgumdir».

### HUNARMANDLAR ODOBI

Alisher Navoiyning zamondoshi, olim, mudarris Husayn Voiz Koshifiy hunarmandlar odoi haqida bunday deydi:

«Sendan hunarmandlar o'rtasida nechta odob qoidasi bor, deb so'rasalar, sakkizta deb javob ber:

*Birinchi:* o'z hunarlarini iflos va shubhali daromadlardan asraydilar.

*Ikkinci:* hunarni boylik orttirish manbai deb

emas, balki hayotda munosib o'rin egallash maqsadida o'rganadilar.

*Uchinchi:* o'z ishining ustalariga doimo hurmat va ehtiromda bo'ladilar.

*To'rtinchi:* noplak yo'llar orqali boylik to'plov-chilar bilan aloqa qilmaydilar.

*Beshinchi:* ishda kamchilikka yo'1 qo'ymaydilar va tanlagan kasblariga besfarq bo'lmaydilar.

*Oltinchi:* mahsulotning asl bahosini bilmaganlarga to'g'ri muomala qiladilar.

*Yettinchi:* agar oldi-berdi bilan bog'liq bo'lsa, kam bermaslik va ko'p haq olmaslikka intiladilar.

*Sakkizinchi:* agar ish hisob bilan bitadigan bo'lsa, o'z hissasini jamiyat hissasidan yuqori qo'ymaslik kerak, chunki yurt farovonligi xuddi ana shu jamiyat jamg'armasi tufayli yuzaga keladi».

### SHOGIRDLIK ODOI

*Birinchi:* o'z ishini sevish.

*Ikkinci:* o'z ishiga e'tiqod qo'yish.

*Uchinchi:* ustoz oldida xoksor bo'lish, yomon odatlarini tark etish.

*To'rtinchi:* ko'rishi lozim bo'lmagan hamma narsalardan nigohini olib qochish.

*Beshinchi:* eshitishi mumkin bo'lmagan barcha narsalarga qulooq solmaslik.

*Oltinchi:* barcha noloyiq ishlardan qo'l tortish.

*Yettinchi:* ustoziga zid bo'lgan kishilar bilan muomala qilmaslik.

### SHOGIRDLIK ASOSLARI

Rostgo'ylik, vafodorlik, nasihatni qulopqa olish, ozor bermaslik va sir saqlash.

Shogirdning eng yaxshi xislati – poklik.

Husayn Voiz Koshifiy shogird odoi haqida shunday deydi:

– Ustoz qabuliga kirganida yoki ustozini ko'rganda, birinchi bo'lib salom berish.

– Ustozning oldida oz gapirish va boshni oldinga egib turish, ko'zni har tomonga yogurtirmaslik. Agar masala so'ramoqchi bo'lsa, oldin ustozdan ijozat olish.

– Ustoz javob aytganda, e'tiroz bildirmaslik.

– Ustoz oldida boshqalarni g'iybat qilmaslik.

– O'tirib-turishda hurmatni to'liq saqlash.

## SHOGIRD RUHIY OLAMINING ZAMINI

- o'rtoqlik,
- do'stlik,
- hamkorlik,
- hamjihatlik,
- sadoqat,
- mehr-muruvvat,
- kasb tanlash imkoniyati,
- vatanparvarlik,
- milliy iftixor,
- insonparvarlik,
- xushmuomalalik,
- ozodalik,
- pokizalik,
- samimiylilik,
- ziyraklik,
- tashabbuskorlik,
- insoflilik,
- rostgo'ylik,
- or-nomuslilik,
- hojatbarorlik,
- andisha,
- kattalarни hurmat qilish,
- sof muhabbatni qadrlash,
- vazminlik,
- baynalminalchilik,
- ustozini hurmatlash,
- ota-onasini hurmatlash.

## SHOGIRDNING USTOZ OLDIDAGI BURCH VA VAZIFALARI

1. Ustozga itoatli bo'lish.
2. Ustoz an'analarini davom ettirish.
3. Ustoz an'analariga sodiq bo'lish.
4. Ustozning pand-nasihatlariga amal qilish.
5. Ustozga taqlid qilish.
6. Sabr-toqatl bo'lish.
7. Irodali bo'lish.
8. Ustoz yuzini yerga qaratmaslik, aksincha, uning obro'sini ko'tarish.
9. Ustozi sha'niga iliq so'zlash.
10. Ustozining dushmani bilan do'st tutinmaslik.
11. Ustozning oila a'zolarini hurmat qilish.
12. Ustozning qarindosh-urug'larini hurmat qilish.
13. Ustozining ruxsatisiz hech narsaga qo'l tekizmaslik.
14. Birovning narsasiga ko'z olaytirmaslik.
15. Ustoziqa cheksiz hurmat bilan munosabatda bo'lish.

## TAYANCH TUSHUNCHALAR:


Ustoz; Shogird; Hunar.

### S a v o l l a r

1. Qadimda ustoz va shogird an'analar qanday bo'lgan?
2. Ustaga shogird tushishning qanday qoidalari bo'lgan?
3. Ustozning shaxsiy va kasbiy fazilatlari haqida gapirib bering.
4. Shogirdning qanday odob mezoni bor?
5. «Hunarmandlar odobi» deganda nimani tushunasiz?
6. Hunarmand va xaridor o'tasida qanday odob mezoni bor?
7. Shogirdning eng yaxshi xislatlari nimadan iborat?
8. «Kasb madaniyati» deganda nimani tushunasiz?

### Test savollari

1. *«Shogird» deganda kim tushuniladi?*
  - A. Ustozning yordamchisi.
  - B. O'rganuvchi shaxs.
  - C. Hunar o'rganuvchi.
  - D. Usta yoki mutaxassisdan hunar o'rganayotgan kishi.
  - E. Ilm o'rganuvchi.
2. *Shogird odobiga nimalar kiradi?*
  - A. Ustozni hurmat qilish, ustozdan haqqini talab qilish.
  - B. O'z kasbini sevish, ustoz oldida xokisor bo'lish, noloyiq ishlar qilmaslik va boshqalar.
  - C. Pokizalik, aqlililik, hushyorlik.
  - D. Samimiylilik.
  - E. Noloyiq ishlar qilmaslik.
3. *Shogirdlararo munosabatlar odobiga nimalar kiradi?*
  - A. Vafodor bo'lish va rostgo'ylik.
  - B. Intizomli bo'lish, bir-birining aybini oshkor qilmaslik, yalqov bo'imaslik va boshqalar.
  - C. Riyokor bo'lish va do'stiga xiyonat qilish.
  - D. Munofiq va riyokor bo'imaslik.
  - E. Hammasi to'g'ri.
4. *Odob nima?*
  - A. Boylik.
  - B. Zebu ziynat.
  - C. Go'zallik.
  - D. Buloq.
  - E. Kishining zebu ziynati.
5. *An'ana nima?*
  - A. Urf-odat.



B. Avloddan avlodga o'tib borayotgan va muayyan jamiyat ichida saqlangan madaniy meros.

C. Axloqiy mezonlar.

D. G'oyalar va qadr-qimmat.

E. Hammasi to'g'ri.

**6. Ustoz kim?**

A. Hunar o'rgatuvchi.

B. Sohani o'rgatuvchi.

C. Odobli inson.

D. O'qitgan, hunar, ilm, tarbiya bergan va fan-hunar cho'qqilariga yetaklagan kishi.

E. Vijdonli o'qituvchi.

**7. Hunarmand xoli bo'lishi lozim bo'lgan salbiy xususiyatlarga nimalar kiradi?**

A. Nopok bo'lish.

B. Hasadgo'ylik va boshqalar.

C. Hunarni boylik orttirish maqsadida qo'llash.

D. Jur'atsizlik, dangasalik, yalqovlik, erin-choqlik, isrofgarchilik va boshqalar.

**8. Ustozning kasbiy fazilatlariga nimalar kiradi?**

A. O'z hunariga qiziqish, uni yoshlarga sidqidandan o'rgatish, o'zidan keyin sodiq shogirdlar qoldirish.

B. Saxylik, obodlilik, mehr-shafqat va boshqalar.

C. Kattalarni hurmat qilish.

D. Qanoatlilik, poklik.

**9. Odobning eng yaxshi amali nima?**

A. Hushyorlik.

B. Kishilar bilan xushmuomala bo'lish, kamtar bo'lish, kibrli va xudbin bo'lmaslik.

C. Kam gapirish, bilimdonlik.

D. Hushyorlik, bilimdonlik, oz gapirish, oz uxlash.

E. Bilimdonlik, pokizalik.

**10. Qadimda hunarmand ustoz tanlashda ustaning qaysi fazilatlariga e'tibor berishgan?**

A. Jismoniy.

B. Shaxsiy.

C. Kasbiy va shaxsiy.

D. Kasbiy.

E. Aqliy.

**11. «Sharqona usta va shogird odobi» metodik qo'llanmasining mualliflari kimlar?**

A. Qosimov Q., Majidov A.

B. Ahmedov M., Bulatov S.

C. Nabiiev M., Qurbonov B.

D. G'ulomov S., Bulatov S.

E. Boymetov B., Ahmedov M.

**Adabiyot**

1. Bulatov S. O'zbek xalq amaliy bezak san'ati. «Mehnat», T., 1991.

2. Ganchdagi gullar bog'boni. Tuzuvchi M a d r a h i m o v A., «ARNAPRINT», T., 2006.

3. Muҳt оғ о v A. Usta va shogird odobi. «Mehnat», 1999.

4. Ремпель М. И. Далёкое и близкое, Изд-во лит. и искусс. им.Г.Гуляма. Т., 1981.

5. Фахритдинова Д. А. Декоративно-прикладное искусство Узбекистана. Изд-во лит. и искусс. им.Г.Гуляма. Т., 1972.

6. Вилатов S. Ganchkorlik. «O'qituvchi», T., 1990.

7. O'zbek Sovet ensiklopediyasi. 3-t., 1972.

8. O'zbekiston xalq san'ati. Muallif - tuzuvchilar A.S.Morozova, N.A.Avedova, S.M.Mahkamova. G'.G'ulom nomidagi adabiyot va san'at nash. T., 1979.

9. Zohidov P. Me'mor olami. Qomuslar bosh tahririysi, T., 1996.

10. Гончарова П. А. Золотошвейное искусство Бухары. Изд-во лит. и искусс. им.Г.Гуляма. Т., 1986.

11. Yuldashev X., Bulatov S., Ustoz va shogird odobi. «O'zbekiston», T., 2005.

12. G'ulomov S., Bulatov S. Sharqona «usta-shogird» odobi. «O'zbekiston», T., 2000.

## GANCHKORLIKDA ISHLATILADIGAN ASBOB-USKUNALAR VA ULARDAN FOYDALANISH

O'tmishda ustachilik asboblari muqaddas sanalgan. Ustalar o'z asbob-uskunalarini shogirdlariga meros qoldirganlar. Bu milliy an'ana zamirida chuqur ma'no bor.

Xalqimiz: «Ish quroling soz bo'lsa, mashaq-qating oz bo'lur», deydi. Shogird og'irini yengil, mushkulini oson qiladigan ish qurollarini hamisha shay qilib qo'yishi kerak. Uskunani bivor ishni qilib bo'lgandan so'ng bir chekkaga uloqtirib, zang bostirib qo'ymaslik, o'tmas bo'lib qolsa charxlab, o'tkir qilib qo'yish, buzilsa darhol tuzatish, maxsus joyda saqlash kerak.

Ish sifati va samaradorligini oshirishda uskuna va jihozlar katta ahamiyatga ega. Ganchkorlikda ishlataladigan qurollar, kiyim-kechak va boshqa zarur anjomlar mehnat estetikasiga hamda ustaxona qoidalariga rioya qilingan holda joylashtiriladi. Ustaxona har doim toza, saranjom-sarishta bo'lishi uchun shogird jon kuydirishi lozim. Ustaxonada anjolarning saranjom-sarishta saqlanishi samarali ishlash uchun qulay bo'ladi. Usta va shogird asbob-uskunalardan unumli, samarali va ehtiyyotkorlik bilan foydalanishni bilishi zarur.

Ganchkorlikda o'ziga xos asbob-uskunalar ishlataladi. Naqsh kompozitsiyalar chizish uchun chizg'ichlar, pargor, yumshoq va qattiq qora

qalamlar, daftar, albom, o'chirg'ich, shaffof qog'oz, oq qog'ozlar kerak bo'ladi. Ganch qorish uchun sirli tog'ora, ganchni elash uchun elak, katta va kichik chelaklar, ruletka, andava, ganch yuzasini ishlash uchun mayin latta,sovun, o'lchov asboblari, maxsus qo'lqopcha, qum qog'oz, simlar va boshqalar darkor. Asboblarni charxlash uchun qayroq tosh ishlataladi, ganch o'yish va pardozlash uchun jarrohlik pichog'i, iskana, shuturgardon (tuyabo'yin), qalamtoq qalamni, minqor, morpech qalamlar, puxqalam, patak bindi, iskana, lo'lakash, zamin qalam, nova, pilta qalam, dudmal qalam va boshqa asboblari ishlataladi. Ganchkorlar qadimda 20 ga yaqin asbob ishlatalanlar. Hozirda bunday asboblarni tayyorlaydigan temirchi ustalar juda oz qolgan. Shu boisdan ustalar, asosan, jarrohlik pichog'i (skalpel), minqor, iskana va shuturgardon asbolarida ishlaydilar. Maktabda ganchkorlikni o'rganish uchun, dastavval, jarrohlik pichog'i va iskana kerak bo'ladi.


**Ganch o'yish va pardozlash uchun ishlataladigan asboblari bilan batafsil tanishib chiqamiz.**

**Jarrohlik pichog'i (skalpel)** — po'latdan yasalgan, har xil o'lchamli asbob. Undan hozir ganch o'ymakorligida keng foydalanilyapti. O'ymaning katta yoki kichikligiga qarab, ustalar


har xil o'lchamdagisini ishlataladilar. Uni avval charxlab, dastasini qo'lga botmaydigan qilish uchun ikki tomoniga yupqa faner qo'yib, izolenta o'rabi, keyin ishlataladilar. Bu pichoq gulni chizishda, kesishda, o'yishda va pardoz berishda ishlataladi.

**Iskana** — duradgorlik asbobi, uning uchi og'ma holatda kesik bo'lishi ham mumkin. Iskanalar har xil kattalikda bo'ladi. Kichigi mayda o'ymalarda, kattasi yirik o'ymalarda ishlataladi. Iskana temir sterjenining uzunligi 7 sm dan 10 sm gacha bo'lishi mumkin. Iskanani maktab ustaxonasida ham yasab olish mumkin.


**Shuturgardon** — ganch o'ymakorligidagi asosiy o'yma asbob, oqli (sterjenli) bel qismi tuyu bo'yniga o'xshash. Shuning uchun uni «shuturgardon», ya'ni «tuyabo'yin» deb atasha-




Ganch taxta quyish uchun kerakli anjomlar: 1. Elak, 2. Sirli tog'ora, 3. Chelak, 4. Andava, 5. Qolip



Ganch taxta taylorlashda ishlataladigan qolip.



Ganch o'ymakorligi asboblari: 1. Jarrohlik pichog'i; 2. Iskana; 3–4. Shuturgardon; 5–6–7. Pux qalam; 6. Minqor; 9–10. Dudmal qalam; 11. Morpech; 12. Lo'lakash.



Ganch o'ymakorligida asboblarinig o'lchamlari: 1. Shuturgardon; 2. Qalamtoq; 3. Minqor; 4. Morpech; 5. Pux qalam; 6. Iskana; 7. Patak binni.

### MINQOR

	Katta	Kichik
1 <sub>1</sub>	30–25	20–15
1 <sub>2</sub>	130–110	100–80
1 <sub>3</sub>	120	100
b	15	10
d	25–30	

### SHUTURGARDON

	Katta	O'ita	Kichik
1 <sub>1</sub>	120–100	90–70	50–40
1 <sub>2</sub>	25	20	15
1 <sub>3</sub>	120	110	100
b	40	30	20
c	50	40	30
d	25–30		

Minqor va shuturgardonning o'lchamlari ko'rsatilgan jadval.

di. U po'latdan yasalgan, keskich qismining tig'i uchli bo'lib, teng yonli uchburchakka o'xshaydi. Shuturgardon naqshlarning kontur chiziqlarini kesishda va o'yimali relyefga pardoz berishda ishlataladi. O'yunga qarab, katta yoki kichik shuturgardon tanlanadi. Katta shuturgardon naqshlarning konturlarini o'yishda va chuqur zaminli o'ymlarda, o'rtachasi o'yunga pardoz berishda, kichigi esa mayda o'yma ishlarini bajarishda ishlataladi.

Pux qalam – xanjarga o'xshash, ikki tomonga qiyalab ketgan o'tkir uchli (faqat uchi ilmoqqa o'xshash, qayrilgan bo'ladi) asbob. Keskich qismining uzunligi 10 sm dan 18 sm gacha uzunlikda bo'lishi mumkin. Pux qalam egri sirtlarni tekislashda, stalaktitlar bilan ishlashda, pardozda navo ochishda ishlataladi. Bu asbob ham har xil kattalikda bo'ladi.

**Minaor** – uzun o‘qli, uch qismiga uchbur-chak shaklidagi o‘tkir kurakcha 90° o‘rnatilgan bo‘lib, o‘yma zaminini tozalashda, tekislashda va chuqurlashda ishlataladi.

**Qalamtoq** – tuzilishi xanjar ko‘rinishida bo‘lib, keskich qismi ikki tomonga qiyalab o‘tkirlangan. U tirnab chiziq chizishda, o‘yishda va ganchni teshishda ishlataladi.

**Morpech qalam** – o‘ylgan naqshlarning chetlariga yarim doiralar, bo‘rtma hosil qilish, o‘rovlarni qirqish hamda relefga lo‘la pardoz berishda, o‘ylgan naqshlarning chetlariga zanjira, hoshiya atroflariga turli yarim doiralar, nuqtalar chiqarishda ishlataladigan asbob. Morpech qalam tuzilishi jihatidan yumaloq bo‘lib, sirt kesish uchun ishlataladi.

**Lux** – yarim silindr sirtlarni hosil qilishda ishlataladigan asbob. Tuzilishi jihatidan keskich qismi yapaloq, yassi shaklda bo‘lib, uchi 90° buklangan bo‘ladi.

**Olam** – xanjar shaklidagi asbob. Ba’zilarining uchi qayrilgan bo‘ladi, axta yordamida tushirilgan naqshlar o‘chib ketmasligi uchun tirnab chizib chiqishda ishlataladi.

**Pilta qalam** – uning uchi qayrilgan bo‘ladi. U yarim aylanadigan relyeflar hosil qilishda ishlataladi.

**Patak binni** – shuturgardonning bir turi. U raxlarni uchli qilib kesishda va o‘yishda ishlataladi.

**Nova** – iskana ko‘rinishida bo‘lib, uchi egri, ilmoq singari buklangan, o‘tkir uchli asbob. Relyeflarni yumaloq qilib kesishda ishlataladi.

**Shukufta** – aylantirib teshik ochishda va chiziq chizishda ishlataladi.

**Lo‘lakash** – umumiyoq ko‘rinishi yarim yumaloq, buklangan, uchi yarim doira shaklida. Asosan, lo‘la pardozda ishlataladi. Bu asbob o‘ymaning yirik yoki maydaligiga qarab, har xil o‘lchamda bo‘ladi.

**Sharafa qalam** – uchi qayrilgan iskana. Mayda muqarnaslarni o‘yishda ishlataladi.

**Ganch** o‘ymakorlik asboblarini maxsus qalamdonda olib yurgan ma’qul.

O‘ymani sifatli va tez bajarish – ishlatalayotgan asboblarning o‘tkirligiga bog‘liq. «Ustaning o‘zi emas, balki uning ishlatalayotgan asbob usta», degan gap bejiz emas. Haqiqatan, asbob o‘tmas bo‘lsa, ish sekin boradi va sifatsiz bo‘ladi.

Ganch o‘ymakorlik asboblari sifatli po‘latdan tayyorlanadi. Asboblar qalam ochish darajasida o‘tkir bo‘lishi kerak. Ular har xil – yirik qayroq va mayda qumqog‘ozda charxlanadi. Asbob ikki

qism – ushlagich va keskichdan iborat. Asboblarni charxlash esa uch bosqichda bajariladi.

Mexanik charxlash, ya’ni qo‘lda yoki toshda charxlash.

Burchak (faska) qosil qilish.

Mayda qumqog‘ozda charxlash.

Qirovini tushirish uchun maxsus toshda charxlash.

Charxlanayotgan asbobni aylanayotgan charxga qattiq botirmaslik lozim. Asbobni 10–15° qiyalikda, qattiq botirmasdan charxlash va bir xilda ushlash maqsadga muvofiq. Charxlanayotgan asbobni bir xilda aylantirish 30 sekunddan oshmasligi lozim, chunki o‘tkir qirrasi egilib ketadi. Shundan so‘ng u kichik to‘rburchak toshda charxlanadi. Qayroq toshni biroz ho‘llab, asbobni 10–15° qiyalikda ushlab, oldinga va orqaga olib-kelib charxlanadi. Asbob toshga bir necha bor olib borilgandan so‘ng, ikkinchi tomoni o‘girilib, o‘tkir bo‘lguncha charxlanadi. Charxlashda qo‘l asbob ustida o‘zgarmasligi, masalan, harakat oldinga bo‘lganda qo‘l oldinga surilib ketmasligi, orqaga tortayotganda qo‘l ko‘tarilmasligi lozim. Agar qiyalik biroz o‘zgarsa – yuzasi tekis chiqmaydi. Charxlash kichik qayroq toshda charxlash bilan tugaydi. Charxlash 10–15 minutdan oshmasligi lozim. Agar charxlash cho‘zilib ketsa, unda keskich o‘tmas bo‘lib qolishi mumkin. Asbob charxlangandan so‘ng, o‘tkir yoki o‘tmasligini tekshirib, ishani boshlash maqsadga muvofiq.

## TAYANCH TUSHUNCHALAR:

Iskana; Skalpel; Qalamtoq; Minoor; Morpech qalam; Mo‘lakash; Pux qalam; Zamin qalam; Pilta qalam.

## Savollar

1. Ustalariniz qanday ganch o‘ymakorligi asboblarni qanday qilishligi?
2. Ganch o‘ymakorligida qanqa asbob turlari ishlataladi?
3. Ganch qonish va ganch taxta tayyorlashda nimalar ishlataladi?
4. Asboblarning foydalanishda texnika xavfsizligiga qanday niyoq qilish lozim?
5. Asboblar qanday usulda charxlanadi?
6. Pilta qalam bilan lo‘lakash o‘rtasida qanday farq bor?
7. Minoor asbobi qanday vazifani bajaradi?
8. Pux qalam asbobining vazifasi nimiranib iborat?
9. Iskana bilan nova o‘rtasida qanday farq bor?
10. «Mexanik charxlash» deganda nimani tushunasiz?

## *Test savollari*

*1. Qaysi asbob naqsh kontur chiziqlarini kesishda va o'ymani tushirishda ishlatalidi?*

- A. Shuturgardon.
- B. Iskana.
- C. Pux qalam.
- D. Qalam.
- E. Nova.

*2. Qadimda ganchkorlar necha xil asbob ishlatganlar?*

- A. 5 ta.
- B. 17 ta.
- C. 10 ta.
- D. 20 ta.
- E. 8 ta.

*3. Ajodolarimiz qadimda shogirdga «usta» nomini berish marosimida shogirdning belbog'iiga qaysi asbobni qistirib qo'yishgan?*

- A. Shuturgardon.
- B. Iskana.
- C. Pux qalam.
- D. Nova.
- E. Qalam.

*4. Qayroqtosh nima uchun ishlataladi?*

- A. Asboblarni saqlashda.
- B. Asbob-uskunalarini charxlashda.
- C. Ganchni maydalashda.
- D. Asboblarni charxlashda.

*5. Qaysi asbob egri sirtlarni tekislashda, stalaktitlar bilan ishlashda, pardozda, navo ochishda ishlataladi?*

- A. Minqor.
- B. Qalamtoq.
- C. Lux.
- D. Qalam.
- E. Pux qalam.

*6. O'yma relyefni yumaloq qilib kesishda qaysi asbob ishlataladi?*

- A. Lo'la.
- B. Navo, lo'lakash.
- C. Sharafa qalam.
- D. Qalam.
- E. Pux qalam.

*7. Ganch taxta sirtiga naqsh nusxani tushirishda nimadan foydalaniladi?*

A. Ruchkadan.

B. Siyohdan.

C. Qalam va ruchkadan.

D. Qog'ozdan.

E. Axta va xokadan.

*8. Gazcho'p nima?*

- A. Uzun tekis yog'och.
- B. Suvoqda ishlataladigan tayoq.
- C. G'isht terishda va suvoqda ishlataladigan asbob.
- D. 3 metrli tayoqcha-asbob.
- E. Ganch qorishda ishlataladigan tayoqcha.

*9. Havoza nima?*

- A. Naqsh ishslash uchun taglik.
- B. Havo naqsh.
- C. Stol.
- D. Binoni qurish va bezashda ishlataladigan taglik.

*10. O'yma zaminni tozalashda ishlataladigan asbob?*

- A. Skalpel.
- B. Morpech qalam.
- C. Lux.
- D. Minqor.
- E. Pux qalam.

*11. Mingor qanday vazifani bajaradi?*

- A. Yarim silindr sirtlarni hosil qilish.
- B. Timab chiziq chizishda va ganchni tekislash.
- C. Relyeflarni yumaloq qilib kesish.
- D. O'yma zaminni tozalash va tekislash.
- E. Raxlarni uchli qilib kesish va o'yishda ishlataladi.

*12. Jomakor nima?*

- A. Bo'yoqchining idishi.
- B. Bosh kiyim.
- C. Ish vaqtida ishlataladigan maxsus ishchi kiyim.
- D. Kiyim.
- E. Dala kiyimi.

*13. Asboblarni charxashning necha turi bor?*

- A. 3 xil.
- B. 2 xil.
- C. 1 xil.
- D. 5 xil.
- E. 4 xil.

*14. Ganch o'ymkorligida qaysi asboblar ishlataladi?*

- A. Minqor, skalpel, qalamtoq, morpech, qalam, pux qalam va boshqalar.

- B. Andava, minqor, randa, arra.
- C. Egov, arra, lux.
- D. Qalam, minqor, skalpel, bolta, shrach.

### **Amaliy mashq**

Ganchkorlik asboblarini charxlash.

1. Ganchkorlik asboblarni charx stanogida charxlash.
2. Mexanik charxlash.

### **Adabiyot**

1. B u l a t o v S. O'zbek xalq amaliy bezak san'ati. «Mehnat», T., 1991.
2. B u l a t o v S. Ganchkorlik. «O'qituvchi», T., 1989.
3. Z o x i d o v P. Самаркандская школа зодчих. Изд-во худ.лит. Т., 1965.
4. N o t k i n I. Бухарская резьба по ганчу. Гос.изд-во худ.лит. Т., 1961.

## NAQSH, UNING TURLARI HAMDA RAMZIYLIK

Naqshlarning o‘ziga xos uslubi, texnologiyasi va mazmuni bo‘ladi.

Naqshning o‘zi nima? Uning qanday turlari bor? «Naqsh tili» deganda nimani tushunasiz?

«Naqsh» – arabcha «tasvir», «gul» degan ma’noni anglatadi. U qush, hayvon, o’simlik, geometrik shakl va boshqalar tasvirining ma’lum tartibda takrorlanishidan hosil qilingan bezakdir. Ganchkorlik, kandakorlik, kashtado‘zlik, zardo‘zlik, kulolchilik, zargarlik, gilam to‘qish, yog‘och o‘ymakorligi va hokazolarda har xil yo‘llar bilan naqshlar ishlanadi. Masalan: o‘yib, chizib, chok yordamida, zarb bilan qadab va boshqa usullarda naqsh solinadi.

Ganch o‘ymakorligida ishlatiladigan naqshlar mazmuniga ko‘ra – o’simliksimon, geometrik, gulli girih, ramziy va boshqa turlarga bo‘linadi.

O’simliksimon naqsh tabiatdagi barg, band, daraxt, buta, g‘uncha singarilarning rasm naqqosh tomonidan biron-bir uslub va muayyan qonuniyat asosida takrorlab hosil qilinadi. Geometrik (handasiy) naqsh turlaridan biri – girih bo‘lib, u «chigal, tugun» ma’nosini anglatadi. handasiy naqsh – murakkab naqsh turi bo‘lib, to‘rtburchak, uchburchak, ko‘pburchaklardan, aylana va yoylardan iborat bo‘ladi. Tuzilishi jihatidan to‘g‘ri chiziq va aralash chiziqlardan tashkil topgan girihga bo‘linadi. Geometrik naqsh uzuksiz rapportlardan bo‘lib, har bir rapportning o‘z tuzilishi bor. Yevropada u «arabeska» deb yuritiladi.

Gulli girih o’simlik va geometrik naqsh elementlaridan tashkil topadi. Yuqorida sanab o‘tilgan geometrik va o’simliksimon naqshlar uning elementlari hisoblanadi.

Ramziy naqshlar kabutar, sher, baliq, davlat gerbi va boshqalar tasvirlangan naqsh elementlaridan tashkil topadi.

Binolarni naqshlar bilan bezash borasida qadimgi fozilu fuzalolar ko‘p fikrlar yozib qoldirganlar.

Masalan, XVI asrda yashab ijod etgan tarixchi Zaynuddin Vosify «Badoye – ul vaqoye» asarida Alisher Navoiy bilan Kamoliddin Behzod orasidagi bir qiziq voqeani keltirgan.

Behzod tomonidan ishlangan naqshga boqib, Navoiy zavq-shavqqa to‘lib deydi: «Ey naqqosh! Sen kelib xonamizni bezatding. Vaqtin xush

bo‘lsin, zeroki, bizni bag‘oyat xushnud etding». So‘ngra Mir majlisda hozir bo‘lganlarga qarab deydi: «Azizlarning xotiriga bu muhim sahifa ta’rifi va tavsifi uchun nimalar keldi? Mir (Alisher)ning ustozi va Xuroson ahlining mashhur (kishi)laridan bo‘lgan Mavlono Fasixiddin (bunday) deydi:

– Maxdumlar! Ko‘z oldimdagи bu ochilgan ra’no gullarni qo‘l cho‘zib uzsamu, dastorimga sanchsam!


Mir (Alisher)ning do‘sti va ulfati Sohib Doro (bo‘lsa):

– Menda ham shunday istak bor edi. Ammo qo‘l cho‘zsam, daraxtlar ustidagi qushlar hurkib uchib ketmasin deb andisha qildim, – deydi...



Amir Temur shaharlarni chiroyli va ulug‘vor binolar bilan bezashga intilgan, tosh hamda g‘ishtin yo‘llar, keng va ravon ko‘chalar qurdirgan. Ko‘chalarda do‘ppichilik, misgarlik, zargarlik, beshikchilik, pichoqchilik, bo‘yrachilik, savatchilik, gilamchilik rastalari mayjud bo‘lgan. Rastalarning yonma-yon joylashganligi xaridorlarga qulaylik tug‘dirgan.

Amir Temur saroyida bo‘lgan Ispaniya qirolligining elchisi Ryui Klavixo o‘z kundaliklarida quyidagilarni yozib qoldirgan: «Men podshoning amri bilan qariyb 20 yildan beri qurilayotgan katta bir saroyni ko‘rdim. Bu saroyning kirish joyi juda uzun bo‘lib, peshtoqi juda baland edi. Kirish joyining o‘ng va chap tomonlari turli naqshlar bilan bezatilgan, hashamdar arklar qad ko‘tarib turibdi. Kengligi 300 qadam bo‘lgan katta hovlidan so‘ng podshoning taxi o‘rnatilgan zalga kiraverishda baland va katta eshik ko‘rinadi. Eshik oltin va zangori ranglar bilan bezatilgan, koshinlari juda ham nafis ishlangan. Eshikning ustida o‘rtada quyosh ostida sher tasviri tushirilgan, chetlarida ham xuddi shunaqa – bu Samarqand shahrining gerbidir. Bu eshikdan to‘g‘ri kvadrat shaklida qurilgan salomxonaga kiriladi. Bu xonaning devorlari oltin va zangori bo‘yoqlar bilan bezatilgan, koshinlari silliqlangan, shifti esa butunlay zarhallangan.


Hovlida juda ko‘p mevali va soyali daraxtlar bor. Bu yerda ko‘pgina hovuzlar va bog‘lar bor. Bu bog‘ni ko‘rganiningizda, yoz paytlari daraxtlar




Namoyon. Z.Bositxonov.




Girih.




Gulli girih.



Naqshda tinchlik ramzi.



Sherdor madrasasi. Samarqand (XVII asr).



Bezakli yozuvdagagi hikmat.

Sherdor madrasasi:  
Fasadning  
peshtoqidagi tasvir.

soyasida juda ko'pchilik rohatlanib dam olishi mumkin ekan, degan fikr keladi.» Esdaliklarning davomida Ryui Gonsales Klavixo shunday yozadi: «Saroy ichi juda go'zal koshinlar bilan qoplangan». Klavixo mana shu go'zal koshinlar va bezaklardan zavqlangan va bizga o'zining ajoyib esdaliklarini qoldirgan shaxsdir. Bunchalik nafis san'at namunasini ko'rgan Klavixo ham eng mashhur Parij ustalarining ishidan ko'ra bu ishlar juda go'zal deb, tan olishga majbur bo'lgan».<sup>1</sup>

Samarqandning Registon maydonida savlat to'kib turgan Sherdor madrasasiga bir nazar solaylik. Uning peshtoqlari, bahaybat gumbazlari va chiroyli minoralari, rang-barang sirli koshinlari hamda nafis, hashamatli, dabdabali ishlangan jimmimali qoplamasini kishini hayratga soladi. Ushbu madrasa boshqa me'moriy yodgorliklar singari o'z mazmuniga va tarixiga ega.

Ashtarkoniylardan Muhammad Imomqulixon davrida xonning eng ishonzchi hamda yaqin kishisi, ya'ni Samarqand hokimi Yalangto'shib Bahodir Ulug'bek madrasasining qarhisida 1629-1636-yillarda zamonasining mo'jizasi hisoblangan bu madrasani qurdirgan. Yalangto'shib Bahodir me'mor Abdujabbor oldiga zamona akobirlari ulug'ajdodlariga munosib ekanligini naqshlar orqali ifodalash vazifasini qo'ygan. Mashhur me'mor o'z oldiga qo'yilgan falsafiy fikrni naqsh tili bilan ifodalashning uddasidan chiqqan. Sherdor madrasasining bosh fasadi jozibali, uning peshtoqi mutanosib (simmetrik) ramziy naqshlar bilan bezatilgan. Ohularga tashlanayotgan sherlar va ularning ortidan kulib turgan odam qiyofali quyosh tasvirlangan. Ularning atrofiga islimiy naqshu nigorlar ishlangan.

Tasvirda epchil, kuchli, yengilmas sher obrazni orqali Yalangto'sh Bahodirga ishora qilingan, ojizlik ramzi tariqasida esa ohu tasvirlangan. Quyosh esa hayot ramzi tariqasida olingan. Zangori rangli koshinlar orqali koinot va tinchlik, o'simliksimon naqshlar orqali bog'u bo'ston, tabiat aks ettirilgan.

Binolarni bezashda naqshlarning ta'sirchanligini kuchaytirish uchun Qur'oni Karim, hadislari, ulug' allomalarining fikrlari, xalq hikmatlari arab yozuvida niroyatda nozik tushirilgan. Ular ham naqsh, ham shior rolini o'tagan. Arabcha bitilgan chiroyli yozuv Muhammad payg'ambarning (SAV) duolaridan biri bo'lib,

u quyidagi mazmunga egadir: «E, ochuvchi zot, och bizlarga eshiklardan eng yaxshi eshikni». Bu yozuvning chap va o'ng pastki qismida xattotning kim ekanligi qayd etilgan. (Ushbu yozuv afg'onistonlik xattot Aziziddin Vakiliy Fufazoiy Duroniy tomonidan yozilgan «Arab xati» kitobidan olingan.)

Xo'sh, naqqoshlikda ramz nima? U arabcha «ishora qilmoq» so'zidan olingan bo'lib, tabiat, voqelikni, quvonch va tashvishlarni, do'st va dushmanlarni, yaxshilik va yomonlikni naqsh elementlari, chiziqlar, ranglar orqali tasvirlashni bildiradi.

Quyida o'zbek milliy naqsh tili alifbosi bilan tanishib chiqamiz. Ular quyidagilardan iborat:

### *Geometrik naqsh elementlarining ramziy ma'nolari*

**Teng** tomonli uchburchak – tik turgan holati – hayotning boshini, teskari turgan holati hayotning oxirini bildiradi.

**Teng yonli uchburchak** – yaxlit bo'lingan bo'lak, ayrılıq.

**Kvadrat** – dunyoning to'rt tomoni, osmon saroyi, quyosh farzandi, abadiylik.

**To'g'ri to'rburchak** – ishonzch.

**Romb** – ayol, ya'ni ona yer ramzi, serfarzandlik.

**Aylana** – olam, baxt, quyosh, odamlarni yovuz niyatidan qaytarish ramzi.

**Besh qirrali yulduz** – hayotning qisqaligi, besh kunlik dunyo.

**Yarim aylana** – baxt.

**Yarim oy** – islom dinining ramzi.

**O'ng svastika** – abadiy harakat, o'sish, ko'tarilish.

**Chap svastika** – teskari harakat, buzilish.

**Quyosh** – hayot ramzi.

**Bulut, olov** – g'oliblik ramzi.

### *Islomiy naqsh elementlarining ramziy ma'nolari*

**Bodom** – baxt, iqbol.

**Bang** – bahorgi uyg'onish.

**Qalampir** – har xil yomonliklardan va yomon ko'zdan asrash.

**Zirk guli (gulsafsar)** – osoyishtalik va umr uzoqligi.

**Anor** – ezgulik, to'qchilik, to'kin-sochinlik.

**Oygul** – baxt, iqbol ramzi.

<sup>1</sup> Qarang: Berezikov Y. Shahrisabz naqshlari. «Sovet O'zbekistoni san'ati» jurnalı, T., 1980, 18-bet.

Jingala – to'kin-sochinlik, boylik ramzi.  
 Olma – muhabbat ramzi.  
 Novda – boylik va faravonlik.  
 Yaproq – to'qchilik, bahorgi uyg'onish, navro'z.  
 Isiriq – yomon ko'zdan asrash.  
 Atirgul – muhabbat, go'zallik.

### *Qush va hayvonlarning ramziy ma'nolari*

Sher – mardlik, jasorat va kuch.  
 Tulki – makkorlik.  
 Chumoli – donishmandlik, xoskorlik ramzi.  
 Bulbul – sadoqat.  
 Humo – baxt keltiruvchi qush.  
 Boyqush – hushyorlik.  
 Sichqon – uy hayvonlarining ko'payishi.  
 Echki – jasurlik, mardlik, pokizalik.  
 Oq kabutar – tinchlik.  
 Ohu – go'zallik, himoyasizlik, noziklik.

### *Ranglarning ramziy ma'nolari*

Yashil – ona tabiat ramzi.  
 Ko'k – moviy osmon, tinchlik va yomon ko'zdan asrash ramzi.  
 Qizil – g'alaba, xursandchilik, shodlik ramzi.  
 Sariq – muqaddaslik ramzi.  
 Qora – motam ramzi.  
 Sariq – ayriliq ramzi.  
 Zangori – e'tiqod ramzi.  
 Oq – tozalik, yorug'lik, baxt va omad ramzi.

Ajdodlarimiz ranglarning xususiyatlarini yaxshi bilganlar. Ular atrofimizni o'rab turgan tabiat ranglariga shaydo bo'lganlari uchun zangori, lojuvard va yashil ranglarni ko'p ishlatganlar. Binolarning koshin va pargin sirlariga, ostob nurida tovlanishini hamda atrofdagi ranglar bilan uyg'unligini hisobga olib, munosib bo'yoqlar tanlaganlar. Pargin va koshinlarda, asosan, lojuvard, zangori, yashil, sariq va oq ranglar ishlatilgan.

Ibn Sino ranglarning ruhiyatga ta'siri haqida quydigilarni yozgan. «Qora, yashil rangdan ko'zga bor manfaat. Shu ranglardan topgay basorating quvvat. Oqu sariq ranglar haddan oshsa agar, bundan sening ko'zlaringga yetgay zarar». Sariq rang asab tizimini kuchaytirishini ta'kidlaydilar. Bu boshqa ranglar ichida eng quvnog'i sanaladi. Qadimdan ota-bobolarimiz sariq rangni sariq kasalga davo, deb hisoblashgan. Shuning uchun

bemorga sariq libos kiydirishgan va uyini sariq rangli buyumlar bilan jihozlashgan. Alisher Navoiy sariq rang to'g'risida shunday degan:

Yara qon da'fi sarig' jins qilur, turfa ko'rung.  
 Kim bilur tegsa yuzing to'kig'a bisyor sarig'.

Oq rangning ham o'ziga xos tomonlari bor. Azaldan kishilar yangi uyga ko'chib o'tishdan oldin xonaga un sepishgan. Ayrim joylarda hanuz kelinnikiga kuyov tomonidan kelgan quandalarga un sepishadi. Odatda kelin-kuyov yo'liga oq matodan poyondoz to'shaydilar.

### **TAYANCH TUSHUNCHALAR:**

Naqsh; O'simliksimon naqsh; Ramz;  
 Stilizatsiya; Gulli girih; Girih.

### **S a v o l l a r**

1. Naqsh nima?
2. Naqshning qanday turlari bor?
3. Naqsh turlari qaysi tomonlari bilan farq qiladi?
4. Ramz nima?
5. «Naqsh tili» deganda nimani tushunasiz?
6. Qaysi naqsh elementlarining ramziy ma'nolarini bilasiz?
7. Chumoli, quyosh, qizil rang qanday ramziy ma'nolarni bildiradi?

### *Test savollari*

*1. O'simliksimon naqsh qaysi elementlardan tashkil topgan bo'ladi?*

- A. Bodom, novda, gul, barg, bofta va boshqalar.
- B. Bodom, anor, kvadrat, bofta va boshqalar.
- C. Novda, xo'roz, echki, bo'ri.
- D. Tulki, novda, gul, barg.
- E. Kurtak, shox, ildiz, gul, barg, pista, uchburchak, echki.

*2. Samarqanddagagi Sherdor madrasasi peshtoqida qanday ramziy naqsh elementlari ishlatilgan?*

- A. Sher, novda, kurtak, madohili naqsh.
- B. Bo'ri, sher, novda, ohu, quyosh.
- C. Kiyik, quyosh, ayiq.
- D. Sher, ohu, quyosh, qosh, ko'z.
- E. Sher, ohu, quyosh, inson, yo'lbars.

**3. Handasiy qaysi naqsh turi?**

- A. Munabbat naqsh.
- B. Pechak islimi.
- C. Islimi.
- D. Girih.
- E. Gulli girih.

**4. Assimetriya nima?**

- A. Naqsh elementi.
- B. Simmetriyaning aksi.
- C. Uzoqdan ko'rinish.
- D. Bo'rttirib ko'rsatish.
- E. Stillashtirib ko'rsatish.

**5. Madohilning ta'rifi qaysi qatorda to'g'ri ko'rsatilgan?**

- A. Navo naqshi.
- B. Handasaviy naqsh
- C. Doira shaklidagi naqsh.
- D. Takrorlanuvchi lolasimon naqsh turi.
- E. Hoshiya naqshi.

**6. Girihchi ustalar qaysi?**

- A. B.Jalolov, J.Umarbekov, A.Mirzayev.
- B. O'.Tansiqboyev, M.Nabiiev, S.Abdullayev.
- C. Z.Bositxonov, A.Muxtorov, Z.Yusupov.
- D. M.Usmonov, H.Abdullayev, M.Rahmatov.
- E. Usta Shirin Murodov, Z.Bositxonov, M.To'rayev va boshqalar.

**7. Girihning ta'rifi qaysi qatorda to'g'ri ko'rsatilgan?**

- A. Oddiy elementlardan tuzilgan islimi naqsh.
- B. Navo naqsh kompozitsiyasi.
- C. «Tugun» degan ma'noni anglatadigan, handasiy (geometrik) naqsh.
- D. Yo'l ichidagi naqsh kompozitsiyasi.
- E. Chalkash chiziqli naqsh.

**8. Atirgulning ramziy ma'nosi?**

- A. Muhabbat, go'zallik.
- B. Vafodorlik.
- C. Sadoqat.
- D. Samimiylik.
- E. Ayol.

**9. Chumolining ramziy ma'nosi?**

- A. Yovuzlik.
- B. Ezgulik.

**C. Donishmandlik.**

- D. Sokinlik.
- E. Vafodorlik.

**10. Anorning ramziy ma'nosi?**

- A. Sokinlik.
- B. Ezgulik va vafodorlik.
- C. Vafodorlik.
- D. Ko'payish.
- E. Ezgulik, ko'payish.

**11. Naqshning qanaqa turlari bor?**

- A. O'simliksimon.
- B. Geometrik.
- C. Jonivorsimon, o'simliksimon.
- D. Qushsimon, o'simliksimon.
- E. O'simliksimon, geometrik va boshqalar.

**12. Gulli girih nima?**

- A. Gulning bir turi.
- B. Panjara naqsh.
- C. Girihning bir bo'lagi.
- D. Girih orasiga ishlangan islimi naqsh.
- E. To'g'ri va egri chiziqli naqsh.

**13. Naqsh nima?**

- A. Gul, biror narsani o'yib, bo'yab yoki tikib hosil qilingan bezak.
- B. Namoyon.
- C. Bezak va gul.
- D. Islimi va geometrik naqsh.
- E. Naqshning bir turi.

**14. Naqsh turlari bir-biridan nimatlari bilan farq qiladi?**

- A. Elementlari, tuzilishi, rangi va ishlash uslubi bilan.
- B. Rangi va tuzilishi bilan.
- C. Ko'rinishi, rangi va elementi bilan.
- D. Rangi bilan.
- E. Faqat kompozitsiyasi bilan.

**15. Kvadrat nimaning ramzi?**

- A. Olam va olam cheksizligining.
- B. Ezgulikning.
- C. Tenglikning.
- D. Vafodorlikning.
- E. Yovuzlikning.

## **Adabiyot**

1. B u l a t o v S. O'zbek xalq amaliy bezak san'ati. «Mehnat», T., 1991.
2. B u l a t o v S. Shakllarning unsiz ovozi. «Yosh kuch» jurnali, 1991, № 10.
3. A z i m o v I. O'zbekiston naqshu nigorlari. G'.G'ulom nomli Adabiyot va san'at nashriyoti, T., 1987.
4. Samarcand. Kirish so'zi mualliflari V. A. B u l a t o v a, G. V. S h i s h k i n a . G'.G'ulom nomidagi Adabiyot va san'at nashriyoti, T., 1986.
5. Buxoro. Kirish so'zi mualliflari T. Po'latov, L. Yu. Mankovskaya. G'.G'ulom nomidagi Adabiyot va san'at nashriyoti. T., 1991.
6. Q o s i m o v Q. Naqqoshlik. «O'qituvchi», T., 1989.
7. Amaliy san'at qisqacha lug'ati. B u l a t o v S., A s h i r o v a M. Qomuslar bosh tahririyati, T., 1992.
8. L o r e n c H. Орнаменты всех времен стилей. Изд. А.М.Даврина. М., 1998.
9. Р е м п е л ь Л. Архитектурный орнамент Узбекистана, Гос.изд.худ.лит., Т., 1961.
10. O'zbek Sovet ensiklopediyasi. 1-tom, T., 1976.

## GANCH O'YMAKORLIGIDA NAQSH ELEMENTLARINI CHIZISH

Ganch o'ymakorligini o'rganishda naqsh chizish muhim ahamiyatga ega. Naqsh chizishni yaxshi bilmasdan turib, ganch o'ymakorligida muvaffaqiyatga erishish mumkin emas.

Har bir xalq amaliy san'at turida o'ziga xos tuzilishga, ko'rinishga va mazmunga ega bo'lgan naqshlar ishlataladi. Shu qatori ganch o'ymakorligida ishlataladigan naqshlar ham o'ziga xos xarakterga ega. Tabiiyki, naqqoshlik, yog'och o'ymakorligi, tosh o'ymakorligi, kashtachilik va boshqa san'at turlarida ishlataladigan naqsh elementlari va naqshlari bir-biridan farq qiladi.

Ustalar tabiatdagi gul, barg, novda, g'uncha, kabutar, tovus va boshqalarning tuzilishini, o'sish qonun-qoidalarini, ko'rinishini sinchiklab o'rganib, ulardan turli naqsh, kompozitsiyalar ishlash uchun har xil elementlarni stillashtirib olganlar. Usta gulni stillashtirib olar ekan, uni qaysi holatda go'zal (ustidan, yonidan yoki tagidan) tasvirlashni izlab topadi.

Ganch o'ymakorligi, naqqoshlik, yog'och o'ymakorligi va boshqalarni o'rganishga kirishayotgan har bir kishi naqsh elementlarini chizishni o'rganishi kerak. Bu elementlar naqsh ishlashning alifbosi hisoblanadi. Ganch o'ymakorligini o'rganishga kirishishdan oldin o'simliksimon naqsh elementlari: barg, gul, marg'ula, tanob, shukufa, bog'lam va sirtmoqlarning turlari, nomlari va ularni chizishni bilib olish kerak.

**Barg** – o'simliksimon naqsh elementi bo'lib, u naqqoshlar tomonidan tabiatdagi o'simlik bargining stillashtirib olingan tasviridir. Barg naqsh kompozitsiyasida to'ldiruvchi va husn beruvchi elementdir. U, tuzilishiga ko'ra, oddiy va murakkab turlarga bo'linadi. Oddiy barglarga uch barg, bodom bargi, tol bargi va boshqalar kiradi. Murakkab barglarga esa ko'p barg, shobarg va boshqalar kiradi. Barglarning quyidagi turlari bor: shobarg (shohona barg) – eng katta barg, qo'shbarg, ko'pbarg, chor (to'rt) barg, xurmo bargi, tol bargi, anor bargi, qashqarcha barg, qo'shbodom barg, qalampir barg, butoq barg va boshqalar. Ularning 50 dan ortiq turlari bor.

**Shobarg** – shohbarg, islimiyl naqsh elementlaridan biri bo'lib, barglar ichida eng kattasi.

Shobargni naqqoshlar bahorgi uyg'onish ramzi sifatida ifoda etganlar.

**Qo'shbarg** – ikki bargdan iborat bo'lgan o'simliksimon naqsh unsuri.

**Ko'pbarg** – bir necha barglardan tashkil topgan o'simliksimon naqsh unsuri.

**Chorbarg** – to'rt bargdan iborat o'simliksimon naqsh elementi.

**Xurmo bargi** – xurmo daraxti bargining umumlashgan tasviri.

**Ayiqtovon (akant) bargi** – ko'p yillik o'simliklar turkumiga mansub, shaharlarda chiroyl manzara hosil qiluvchi sifatida ekiladi. Barglari ketma-ket, ba'zida qarama-qarshi joylashadi. Yevropaning sernam joylarida, O'rta Osiyoning cho'l va adirlarida o'sadi. U katta bargli chiroyl o'simlik bo'lgani uchun, rassomlar tomonidan klassik naqshlarning asosi sifatida keng foydalanilgan. Ayiqtovon shaklidan arxitekturaning eksterperi va interperini bezashda ko'p foydalaniladi. U ustunlarning yuqori qismida (boshchasi), devorlarning frizida, ma'lum qismi devordan chiqib turgan ustunlar (plitustr) boshchasida shift va boshqa joylarda bezak sifatida qo'llanib kelingan. Uni toshdan, yog'ochdan, gips, loydan (terrakota) yasab, bo'yaganlar. Ayiqtovon tasviri ko'p joyda, masalan, Qadimgi Misr, Yunoniston, Rim va O'rta Osiyodagi binolarda bezak sifatida ishlataligan. O'rta Osiyoda u o'ziga xos klassik motivga ega bo'lgan. Markazi Osiyodagi ayiqtovon barglari tasvirlangan namunalar grek va rimliklarnikidan farq qilib, uchi pastga qarab ishlanmasdan, ko'pincha tik holatda tasvirlangan. Termizdag'i Munchoqtepadan eramizning I-II asrlarida akant bargi bilan ishlangan ustunning tepe qismi (boshchasi) topilgan. Uning barglari shaxmat kataklari kabi joylashib, tik holatda tasvirlangan.

**Gul** – tabiatdagi gullarning stillashtirib olingan tasviri bo'lib, naqsh kompozitsiyasida to'ldiruvchi va husn beruvchi element hisoblanadi. Gullarning har xil turlari bo'lib, ular o'ziga xos nomlanadi. Chunonchi, uch-besh yaproqli oygul, bargli oygul, lola gul, paxta gul, no'xot gul, chinni gul, safsar gul, atir gul, gultoji-xo'roz va boshqalar. Tuzilishiga ko'ra, gullar

oddiy va murakkab gullarga bo'linadi. Murakkab gullarga pista gul, ko'p bargli gul va boshqalar, oddiy gullarga esa oygul, lola gul, no'xot gul va boshqalar kiradi. Gullar har xil tuzilishga ega bo'lganligi uchun ularning o'ziga xos ismlari bor.

*Oygul* – bir necha yaproqli moychechak shaklidagi naqsh elementi bo'lib, yaprog'ining soniga qarab, u «yaproqli oygul», «besh yaproqli oygul» va hokazo deb nomlangan. U o'simliksimon naqsh kompozitsiyasining tarkibiy qismini tashkil etadi va ko'p qo'llaniladi. Oygulni naqqoshlar baxt-iqbol ramzi tariqasida qo'llab kelganlar.

*Gul-tojixo'roz* – gul-tojixo'roz gulining umumlashtirib olingan varianti, islimiyl naqsh unsuri.

*Zirk gulি* – yaprog'i juda chiroyli gul, o'simliksimon naqsh unsuri. U O'rta Osiyo naqshlarida juda ko'p uchraydi. Uni naqqoshlarimiz osoyishtalik va umri uzoqlik ramzi ifodasi sifatida qo'llab kelganlar.

*Lola* – naqsh kompozitsiyasida ustalar juda ko'p qo'llaydigan islimiyl naqsh elementi.

*Anor gulি* – anor tasviridan tashkil topgan islimiyl naqsh kompozitsiyasi. Anorgul qadimdan ishlatib kelinayotgan naqsh turi bo'lib, uni Farg'ona naqqoshlari ko'p ishlatadi. Anorgul ikki xil: tabiiy, ya'ni tabiatda qanday bo'lsa – shunday yoki stillashtirilgan uslubda tasvirlanadi. Anor tasvirlangan bu naqshlarda ko'pincha uning ichki qismi ham ko'rsatiladi. Anorgul naqshi kulolchilikda, misgarlik, kashtachilikda ko'p qo'llaniladi.

*Bodom* – tabiiy shakldan stillashtirib tasvirlangan islimiyl naqsh turi. U zargarlik, naqqoshlik buyumlari, do'ppilar, matolar, yog'och o'ymakorligi, zardo'zlik va boshqa xalq amaliy bezak san'ati turlarida keng ishlatiladi. Qadimdan ota-bobolarimiz bu naqsh turini baxt-iqbol ramzi sifatida ishlatib kelganlar.

*Anor* – o'simliksimon naqsh elementi. Naqoshlik, kulolchilik, misgarlik, gilamdo'zlik, kashtachilik, zardo'zlik va boshqalarda ko'p ishlatiladi. Anor elementi qadimdan to'qchilik va to'kin-sochinlik ramzi sifatida qo'llanilgan.

*Jingalak* – islimiyl naqsh elementi bo'lib, naqsh kompozitsiyasida bo'sh joylarni to'ldirish maqsadida ishlatiladi. Bu naqsh elementi qadimdan ishlatib kelinadi. Jingalak – to'kin-sochinlik, boylik, hamisha yasharib turuvchi ona tabiat ramzidir.

*Qalampir* – o'simliksimon naqsh elementi bo'lib, turli ko'rinishda tasvirlanadi.

*Shukufta* – o'simliksimon naqsh elementi bo'lib, novdalarni bir-biri bilan bog'lash va

yuzalarni to'ldirishga xizmat qiladi. Shukufta tuzilishi jihatidan turlicha bo'ladi: bir yerda kichik, sodda bo'lsa, ikkinchi o'rinda ikki tomonidan kelayotgan shukufta qo'shib, madohil yoki shunga o'xhash tasvir hosil qiladi.

*Bog'lam va sirtmoqlar* – o'simliksimon naqsh elementlari bo'lib, bandi rumiy boftaning oddiy turi hisoblanadi. Sirtmoqlar bir-biriga chirmashadi, umumiy ko'rinishi sakkiz raqamini eslatadi.



*Bofta* – tanob aylanib o'tib hosil qilgan shakl. Islimiyl naqsh elementi. Boftalar to'g'ri, egri hamda aralash chiziqlardan tashkil topgan bo'ladi.

*Marg'ula* – qo'sh chiziqli gajak, o'simliksimon naqsh elementi. U misgarlik, naqqoshlik, zardo'zlik kabilarda ishlatiladi. Agar bir novdaning uchida ikki marg'ula hosil bo'lgan bo'lsa, u qo'sh marg'ula deb yuritiladi. Agar novda bilan marg'ula tasvirlangan bo'lsa, marg'ulali novda deb yuritiladi. Naqsh kompozitsiyasida marg'ula to'ldiruvchi element hisoblanadi.

*Band (novda)* – naqshlardagi o'simlik va daraxt novdasini ifodalovchi yo'l bo'lib, u tanobga nisbatan ikkilamchidir. Band o'simliksimon naqsh elementi. U tabiatdagilari daraxt yoki o'simliklar novdasi va tanasining stillashtirib olingan tasviridir. Har bir naqsh elementi singari, bandning ham kompozitsiyada qo'llanishining o'ziga xos qoidalari bor. Masalan, bandning aniq bir o'lchamda bo'lishi, kompozitsiyada gullarga nisbatan saqlanishi, naqshda gullar, barglar va tanoblarining tagidan o'tishi va hokazo. Turli naqqoshlar kompozitsiyada banddan o'ziga xos usulda foydalanadilar, shuning uchun ham naqshlar bir-biridan farq qiladi. Chunonchi, Xorazm naqshida bandlar kam, kurtak va barglar deyarli bo'lmaydi. Novdalarning o'zi prujina singari bir-biriga ulanib ketadi. Buxoro, Toshkent va Samarqand nusxalarida ko'pincha shukufta bilan shoxlar bir-biriga bog'lanadi, xorazmliklarda shukufta ajratilmaydi.


*Tanob* – arabcha «chilvir», «arqon» degan ma'noni anglatadi. Murakkab naqshlar kompozitsiyasi asosini tashkil etuvchi negiz va naqshga shakl beruvchi chiziqli tanob deyiladi. Markaziy Osiyo naqshlarida bir xil yo'g'onlikdagi chiziqli. Naqqosh naqsh kompozitsiyasini chizishdan oldin birinchi navbatda tanob tortib, keyin novdalarni chizadi, so'ngra novdalarni yo'nalishga moslab, gullarni joylashtirib chiqadi.

Ustalar naqsh kompozitsiya chizishda tanobni birinchi rejaga qo'yadilar. Tanob ustidan hech qachon gul, novda yoki barg bosib o'tmaydi.




Ganchkorlikda ishlatiladigan naqsh elementlari.


Tanob.




Bangler.





Oddiy banglarni  
bosqichma-bosqich chizish.





Oddiy shobarglarni chizish.




Barglarni chizish.




Bargli gullarni chizish.




Barglarni chizish.






Bargli gullar.




Murakkab barglar.





Bargli gullarni chizish.




Bargli gullarni chizish.




Oygul va to'p gullar.






Oygullarni chizish  
bosqichlari.






**Naqsh elementlarini bosqichma-bosqich chizish.**




**Shukusta turlarini bosqichma-bosqich chizish.**



**Shobarglarini chizish bosqichlari.**



**Shobarglarini chizish bosqichlari.**



Ramziy naqsh elementlari:

1. Gul, 2. Anor,
3. Oygul, 4. Bodom,
5. Shobarg, 6. Zirk guli (gulsafsar),
7. Shox, 8. Novda,
9. Novda yaproq,
10. Barg,
11. Jingalak,
12. Aylana,
13. Yarim aylana,
14. Kvadrat,
15. Romb, 16. Bulut,
17. Yarim oy,
18. Yulduz,
19. Quyosh,
20. Ko'za,
21. Olma, 22. Uzum,
23. Tulki, 24. Ohu,
25. Sher, 26. Qush,
27. Chumoli,
28. Sichqon,
29. Baliq, 30. Echki shoxi,
31. Bulbul.

Bundan tashqari tanob ranglarni bir-biridan ajratib turadi. Tanoblar xilma-xil bo'lib, bir kompozitsiyada tanob boshlanganicha uzlusiz davom etadi, ba'zi nusxalarda tanob ikki nuqtadan boshlanib, bir-biriga chirmashib tugallanadi, yana boshqa nusxalarda tanob bir nuqtadan boshlanib, ikki tomoniga yo'nalib taqsim chetiga borib tugallanadi. Tanob egri, to'g'ri, aralash chiziqlardan tashkil topgan bo'lishi mumkin. Agar kompozitsiyada tanoblar kesib o'tuvchi rangli naqshlarda ishlatilsa, unda, albatta, ikkalasi ikki xil rangga bo'yaladi. Agar bir xil rangda bo'lsa, unda asosiy shakl o'zini ko'rsata olmaydi. Tanoblar bir-birini kesib o'tmay, bir-biriga parallel bo'lsa, bunday nusxa

«qo'sh tanobli islimi» deb ataladi. Agar tugallangan mustaqil kompozitsiya bo'lsa, «qo'sh tanobli namoyon» deb ataladi. Kompozitsiyada tanob birdan ortiq ham bo'lishi mumkin. Agar ikki tanobli kompozitsiya bo'lsa, biri bosh, ikkinchisi yordamchi tanob deyiladi. Kompozitsiyada tanobning ustidan novda, gul, barg va boshqalarning o'tishi mumkin emas.

Mashq. O'simliksimon naqsh elementlarini chizish. O'simliksimon naqsh elementlarini o'rganish ma'lum qonun-qoidalar asosida mashq qilishdan boshlanadi. Buning uchun oddiy qog'oz varag'i, katak daftari yoki rasm daftari, chizg'ich, qora qalamlar (konstruktur), oq o'chirg'ichlar va boshqalar kerak bo'ladi.

Naqsh elementlarini chizish alifbosi quyidagi bosqichda amalga oshiriladi.

1-mashq. Qalamda qog'oz varag'iga dastlabki oddiy shakllar tekis, ravon, yengil, simmetrik, dinamik, toza va chirolyi chiqquncha chiziladi.

2-mashq. 34-betda berilgan o'simliksimon naqsh elementlarini quyidagi guruhlarga ajratib chizishni mashq qilish (34-betga qarang).

### O'simliksimon naqsh elementlari

a) barglar: 1,2,3,4,5 – oddiy barglar, 6,7 – qo'shbarg, 8,9,10,11,12 – uch barg, 13 – ko'p barg, 14-15 – to'rbarg, 16,17,18,19,20,21 – shobarg;

b) gullar: 1 – to'rt yaproqli gul, 2 – olti yaproqli gul, 3 – besh yaproqli gul, 4 – to'rt yaproqli oygul, 5,13 – besh bargli oygul, 6,7 – to'rt bargli oygul, 8,9,14 – uch bargli gul, 10,11,12 – paxta gul, 15 – pista gul, 16,17,18 – ko'p bargli gul;

c) g'uncha;

d) marg'ula: 1,2 – marg'ula, 3 - qo'sh marg'ula, 4 - kurtakli marg'ula;

e) tanob va novda: 1 – tanob, 3,4 – novda.

f) shukufa;

g) bofta: 1 – egri chiziqli bofta, 2 – to'g'ri chiziqli bofta, 3,4 – murakkab shakldagi bofta;

h) bog'lam va sirtmoq: 1,2 – bog'lam, 3- sirtmoq.

Bu elementlarni chizishdan avval berilgani-dek, katak daftarga chizg'ich yordamida qalamni qattiq bosmasdan, yengil yurgizib, sxematik kataklar chizish, shu kataklarga naqsh elementlarini tushirish kerak. To'r chiziqlarning katta yoki kichikligi naqsh elementining hajmiga bog'liq. Oddiy barglar chiziladigan to'r chiziqlarning eni va balandligi 25 mm bo'ladi. Qolgan elementlar uchun ham ularning hajmiga qarab, to'r chiziqlar chiziladi. Har bir betga bitta naqsh elementi qayta-qayta chizilib, mashq qilinadi. Chizishda qalamni bosmasdan bir xil yo'g'onlikdagi chiziqlar chizib, simmetriya va asimetriyaga hamda elementlarni ravon, to'g'ri, ingichka va toza chizishga e'tibor berish kerak. Shuning uchun ham Sharqda mashhur buyuk naqqosh Moniy shunday degan edi: «Kimki rasmdagi har bir chiziqli jon bag'ishlay olsa, u san'at kalitini egallagan bo'ladi». Haqiqatan ham, naqsh chizish qonun-qoidalariiga amal qilib, naqshlarni sidqidildan, sabroqt bilan chizsak, oldimizga qo'ygan maqsadi-

mizga erishamiz. Naqqoshlikda naqsh elementlari qanchalik nafis va chirolyi ishlansa, kompozitsiya shunchalik chirolyi chiqadi. Bunda chiziqlar to'g'ri chizilishi muhim ahamiyatga ega. Shu o'rinda Moniy haqida bir rivoyatni hikoya qilib berish o'rinli.

Musavvirlar homiysi mashhur Moniy shogirdlarining ijodi bilan tanishmoqchi bo'lib, safarga chiqibdi. Samarqand musavvirlari ustozlarini ijod bilan sharaflamoqqa ahd qilishibdi. Moniy shahar darvozasidan kirar ekan, ko'zlariga ishonmabdi. Shogirdlari shunaqangi ajoyib tabiat manzarasini chizishibdiki, ta'riflashga so'z yo'q emish. Tasvir kuchiga qoyil qolgan mehmonlar o'z kasbdoshlari san'atiga tahsin o'qishibdi. Shu payt Moniy qo'liga mo'yqalam olib, rasmdagi hovuz yaqiniga bahaybat itning rasmini chizib qo'yibdi. Tasvir shunchalik tabiiy ediki, itni ko'rgan kishi uning joni bor deb, beixiyor o'zini chetga tortar edi. Shunda Moniy o'nya tolibdi. Shogirdlari mahorat cho'qqisini egallab bo'lishibdi, endi bularga boshqa topshiriq berish kerak.

Nihoyat, Moniy bir to'xtamga kelib, shogirdlariga shunday vazifa topshiribdi: tabiatni tasvirlash – bu san'atning nihoyasi emas, kimki rasmdagi har bir chiziqli jon bag'ishlay olsa, u san'at kalitini egallagan bo'ladi. Bu juda og'ir va mashaqqatli vazifa edi. Ana shu vaqtadan boshlab naqqoshlar chiziqlar tilsimini ochishga bel bog'lashibdi. Necha-necha avlodlar ana shu izlanish yo'lida ter to'ka boshlabdilar. Natijada naqqoshlik asosini chiziqlar simfoniyasidan iborat turli naqshlar egallab olibdi.

Naqqoshlikda naqsh tasvirida odam, hayvonlar, qushlar va boshqa narsalar ham tasvirlanadi. Ular o'ziga xos chizish geometriyasiga ega. Siz ham berilgan ramziy naqsh elementlarining ayrimlarini mashq qiling.

**Mashq. Ganchkorlikda qo'llaniladigan o'simliksimon naqsh elementlarini chizish.**

**Texnika:** qora qalam bilan ishslash.

**Material:** qog'oz va qalam.

**O'lcham:** katak daftar yoki rasm daftari varag'i.

**Bajarish bosqichlari:**

1. Katak daftar varag'i yuzasini naqsh elementlarini chizish uchun katakchalarga bo'lib chiqish.

2. O'simliksimon naqsh elementlari quyidagi bosqichda chiziladi:

- a) barglarni chizish (oddiy va murakkab barglar);
- b) bargli gullarni chizish (oddiy va murakkab bargli gullami chizish);
- v) gullarni chizish (oddiy va murakkab gullar);
- g) band va marg'ula, sirtmoq, shukufta, bofta, novda va boshqa elementlarni chizish.

## TAYANCH TUSHUNCHALAR:

Barg; Gul; Gultojixo'roz; Marg'ula tanob; Shukufta; Sirtmoq; Shobarg; Oygul; Bodom; Jingalak; Zirk guli.

### S a v o l l a r

1. Ganch o'ymakorligida ishlataladigan naqsh elementlarining qanday turlari bor?
2. Stilizatsiya nima?
3. Barg naqsh elementi qanday chiziladi?
4. Naqsh elementlarini chizishda qaysi qoidalarga riyoq qilish kerak?
5. Tanob nima? U kompozitsiyada nima vazifani bajaradi?
6. Naqsh elementlarining ramziy ma'nosini bilasizmi?
7. Namoyonda qaysi elementlardan foydalaniladi?
8. Naqsh elementlari nomini aytib bering.
9. Stilizatsiyalashda nimalarga e'tibor berish kerak?

### Test savollari

#### 1. Stilizatsiya nima?

- A. Elementlarni bo'rttirib ko'rsatish.
- B. Qayta ishlash.
- C. Naqshning bir turi.
- D. Soddalashtirish.
- E. Quyosh, baliq, gul va boshqa shakllarning ko'rinishini naqshga moslashtirib va umum-lashtirib olish.

#### 2. Sirtmoq qanaqa naqsh elementi?

- A. Geometrik naqshning bir bo'lagi.
- B. Bofta.
- C. Shukustaning bir ko'rinishi.
- D. Boftaning bir ko'rinishi.
- E. Novda.

#### 3. Anor guli nima?

- A. Anor ko'rinishidagi islimiyl naqsh.
- B. Naqsh elementi.
- V. Naqshdagi tanob.

- D. Boftali naqsh.
- E. Anor elementi.

#### 4. Ritm nima?

- A. Taqsim.
- B. Takrorlanish.
- C. Naqsh elementlarining ma'lum tartibda, ma'lum oraliqda bir tekisda takrorlanishi.
- D. Naqsh turi.
- E. Oyna aksli naqsh.

#### 5. Barglar ichidagi eng katta barg qaysi?

- A. Anjir bargi.
- B. Tol bargi.
- C. Behi bargi.
- D. Shobarg.
- E. Anor bargi.

#### 6. Kompozitsiyada tanob elementining vazifasi nimadan iborat?

- A. Rang beruvchi.
- B. To'ldiruvchi.
- C. Naqshga shakl beruvchi element.
- D. Ochuvchi.
- E. Go'zallik va ma'no beruvchi.

#### 7. Novda necha bandli bo'ladi?

- A. Uch bandli.
- B. Bir bandli.
- C. Bir va qo'sh bandli.
- D. Qo'sh bandli.
- E. Besh bandli.

#### 8. Barglarning qanaqa turlari bor?

- A. Shobarg.
- B. Murakkab, oddiy barglar va geometrik shaklli barglar.
- C. Murakkab barglar.
- D. Oddiy barglar.
- E. Oddiy va murakkab barglar.

#### 9. Novdani bir-biri bilan bog'lab turuvchi element qaysi?

- A. Barg va novda.
- B. Novda.
- C. Sirtmoq.
- D. Shukufa.
- E. Barg.

#### 10. Marg'ula nima?

- A. Qo'sh chiziqli shakl.
- B. Novda.

- C. Barg turi.
- D. Novda turi.
- E. Daraxt shoxi.

*11. Arabcha «chilvir», «arqon» degan ma’noni beruvchi element qaysi?*

- A. Barg.
- B. Tanob.
- C. Gul.
- D. Novda.
- E. Gulli novda.

*12. Band nima?*

- A. Naqsh elementi.
- B. Kompozitsiyadagi ikkinchi darajali naqsh.
- C. Novda bog’lovchi.
- D. O’simlik bargi.
- E. Gulning bir ko’rinishi.

*13. Bofta nima?*

- A. Tanobning bir turi.
- B. Tanob yoki novdani aylanib o’tishdan hosil bo’lgan shakl.
- C. Gulning bir turi.
- D. Novda.
- E. Barg elementlaridan biri.

*14. Lola nima?*

- A. Asosiy element.
- B. Naqqoshlikda ikkinchi element.
- C. Shakl elementi.
- D. Lolani eslatuvchi naqsh elementi.
- E. Gulning bir turi.

### **Adabiyot**

1. Б у л а т о в С. Ганчкорлик. «О’қитувчи», Т., 1989.
2. Б у л а т о в С. Ганчкорлик, naqqoshlik va yog‘och o‘ymakorligiga oid atamalar izohli lug‘ati. «Mehnat», 1991.
3. Б у л а т о в С. О’zbek xalq amaliy bezak san’ati. «Mehnat», Т., 1991.
4. З о х и д о в П. Самаркадская школа зодчих. Изд-во «Наука» УзССР Т., 1965.
5. Л о р е н ц Н. Орнаменты всех времен стилей. Изд-во А.Ф.Даврина, М., 1998.
6. Б у л а т о в С., Д а д а ш о в Л. Naqsh alifbosi. «Cho’lpon», Т., 1999.
7. Та’lim va tarbiya jarayonida Sharq rivoyatlaridan foydalanish. Tuzuvchilar S. Б у л а т о в , A. Е р г а с х о в . Т., 1994.
8. Amaliy san’at qisqacha lug‘ati. Tuzuvchilar Bulatov S., Ashirov M. Qomuslar Bosh tahririyati, Т., 1992.

## ODDIY NAQSH NAMUNALARINI CHIZISH

O'zbek xalq ustalari qo'llab kelayotgan jamiki naqshlar o'ziga xos qonuniyatga ega. Bu qonun-qoidalalar tabiatning o'zidan olingan. Chunonchi, suvni olaylik, u doim bir yo'naliishda oqadi. O'simliklar ham faqat bir tomonga qarab o'sadi. Majnuntol va bezakli tutlar ko'rinishda pastga qarab teskari o'sayotgandek tuyuladi. Aslida esa u ildizdan tana, tanadan novda va barg bo'lib, bir tomonlama yo'naliishda o'sadi. Tabiatning bu qonuni naqshda o'z aksini topadi.

Har bir naqshning o'ziga xos nomi bo'ladi. Naqshning nomlanishi uning xarakterli o'rnini bilan belgilanadi.

Har qanday naqsh, oddiy yoki murakkab bo'lishidan qat'iy nazar, oddiy elementlarning ma'lum g'oya, xarakter va vazifasiga muvofiq joylashtirilishi, o'zaro uyg'unligi va mutanosibligi bilan hosil bo'ladi. Bunga *kompozitsiya (mujassamot)* deyiladi.

Berilgan naqsh namunasining tuzilishi, simmetriyasi, ritmiga, naqshlar orasidagi bo'shiqliqlar mutanosibligi, dinamikligi, ravonligi, jozibadorligi, ma'lum mazmunga egaligi, assimetriyasida siluetning o'ziga xos qonuniyatlariga e'tibor beriladi. Chunonchi, 1-gulni, ya'ni «bargli zanjira»ni olaylik. U barg va bargchalardan tashkil topgan bo'lib, muayyan elementlarning ma'lum masofada ritmik takrorlanishidan hosil bo'ladi. Shuning uchun «bargli zanjira» deb nomlanadi. Yana bir misol uchun 2-gulni olaylik. Bu gulning nomi «yak raftor», ya'ni bir yo'naliishli islimi. Naqshda novda to'lqinsimon chiziq tariqasida davom etib ketaveradi. Yo'naliish bo'ylab shoxlab gajak holida egilib, marg'ula bilan tugaydi. Shox o'sishi davomida kurtak va barg beradi.

Endi biz naqsh namunalarini qora qalamda chizishning qonun-qoidalari va bosqichlari bilan tanishib chiqamiz.

Oddiydan asta-sekin murakkablashib boradigan 10 ta hoshiyasimon naqshlar mavjud. Ularga o'ziga xos nomlar bergen.

- «Bargli zanjira» (1-gul).
- «Yak raftor» (2-gul).
- «Bargli raftor» (3-gul).
- «Bargli islimi» (4-gul).

- «Aylanali islimi» (5-gul).
- «Mehrob islimi» (6-gul).
- «Qo'sh mehroblı islimi» (7-gul).
- «Bofta islimi» (8-gul).
- «Patnisgul islimi» (9-gul).
- «Islimi shukufa islimi» (10-gul).

### Oddiy naqsh namunalarini chizishga doir mashqlar

1-mashq. Bodom guli (1-gul) naqsh namunasini qora qalamda chizish.

Texnika: qora qalam bilan ishslash.

Material: qog'oz va qalam.

O'lcham: katak daftari yoki albom varagi yuzasida bajariladi.

#### ***Bajarish bosqichlari:***

1-gul, ya'ni «bodom guli» yo'lsimon oddiy naqsh kompozitsiyasi bo'lib, ikki bodom elementining kombinatsiya asosida ritmik takrorlanishidan hosil bo'ladi.



*1-bosqich.* Yuqorida berilgan chizma o'lchamlar asosida rasm daftarga gorizontal ikki parallel chiziq chizib, ularning oralig'i teng kvadrat bo'laklarga bo'lib chiqiladi. Rasmda ko'rsatilganidek qilib kvadratlarga diagonal chiziqlar o'tkaziladi. Bu chiziqlarning hammasi yordamchi chiziq bo'lganligi uchun qalamni bosmasdan ingichka chiziladi.

*2-bosqich.* Ikki kvadrat oralig'i ishkom ko'rinishida, yarim aylanalarini ritmik takrorlash asosida chiziladi. Chiziqlar ravon chiqishiga e'tibor berilishi lozim.

*3-bosqich.* Yuqorida chizilgan yarim aylana teskari holda chiziladi.

*4-bosqich.* Ikkala bodomning chok qismlariga, ya'ni pastki va yuqori qismiga kurtaksimon bodomchalar tasvirlanadi.

Bodom guli yoddan takror-takror chizib, mashq qilinadi. Bu mashqlarni bajarishda chiziqlarning ravon, nafis va chiroyli chiqishiga e'tibor bering.



a, b, c, d, e, f, g, h, i, j.

**2-mashq. «Pechak islimi» (2-gul) naqsh namunasini qora qalamda chizish.**

**Texnika:** qora qalam bilan ishlash.

**Material:** qog'oz va qalam.





**O'lcham:** albom varag'i yuzasiga bajariladi.

#### ***Bajarish bosqichlari:***

2-gul «Pechak islimi» yoki «yak raftor», ya'ni «bir yo'nalishli islimiyy naqsh» deyiladi. Novda to'lqinsimon harakat qilib, gajaksimon marg'ula, keyin ikkinchi tomondan novda chiqariladi va






ritmik takrorlanib, davom etadi. Novdalar orasidan kurtaklar chiqarib ketiladi. Bu naqsh pechak o'simligiga o'xshaydi, ya'ni naqsh tabiatdan olingan. Pechak islimi novda, marg'ula va kurtakdan, ya'ni uch oddiy elementdan tashkil topgan. Pechak islimi quyidagi bosqichlarda chiziladi.

**1-bosqich.** Rasm daftarga 61-rasmda berilganidek qilib 2,5 sm oraliqda gorizontal parallel chiziq chiziladi. Keyin ikki parallel chiziq 2 sm oraliqda teng bo'laklarga bo'lib chiqiladi. Natijada bir xil to'g'ri to'rtburchaklar hosil bo'ladi.







**Bangli zanjira (I-gul).**





16 sm







Yak raftor pechkali islimi (2-gul).







Bangli raffor (3-gul).




Bargli islimi (4-gul).







Aylanali islimi (5-gul).







Mehrob islimi (6-gul).





**Qo'sh mehrobli islimi (7-gul).**





**Bofta islimi (8-gul).**



**Patnisgul islimi  
(9-gul).**





**Shukufali islimi (10-gul).**

**2-bosqich.** Rasmida ko'rsatilganidek qilib gajaksimon bir bandli shakl chiziladi. Keyingi gajaksimon chiziq shakli to'nkarma usulida takrorlab chizib chiqiladi. Novdaning marg'ula qismidan novda chiqariladi, u marg'ula holatida novdaga tegib to'xtaydi.

**3-bosqich.** Novdalar orasidan kurtakchalar chiqariladi. Bu chiziqlarning ravonligi, uzviyligi, dinamikligi, nisbiyligini, ya'ni elementlarning bir-biridan katta-kichikligini hisobga olish kerak. Naqsh chizishda naqshlar orasidagi bo'shliq muvozanati saqlanmasa naqsh kompozitsiyasi qonuniyatlariga putur etadi.

**3-mashq.** «Bargli raftor» naqsh namunasini qora qalamda chizish.

Texnika: qora qalam bilan ishlash.

Material: qog'oz va qalam.

O'lcham: katak daftar yoki albom varag'i yuzasida bajariladi.

**Bajarish bosqichlari:**

1. «Bargli raftor» – oddiy naqsh turi. Barg yo'l ichida to'lqinsimon harakat qiladi, ma'lum masofada olti yaproqli oygul takrorlanadi. Shuning uchun bu naqsh «Bargli raftor naqshi» deb yuritiladi. Naqsh barg, olti yaproqli oygul, marg'ula va novdadan iborat. Naqsh rasmida berilgan o'lcham asosida bajariladi.

**1-bosqich.** Rasmida berilganday ikki parallel chiziq chizib, balandligi ikki marta o'lchab, taqsimlab chiqiladi.

**2-bosqich.** Taqsimlangan bo'laklarga oygulning yaproqlari bir xilda chiqishi uchun, qalamni bosmasdan, aylana chizib olamiz. So'ng olti yaproqli oygul chiziladi. Chizishda oygulning har bir yaproq'i bir-biriga nisbatan bir xil va simmetrik chiqishiga harakat qilish kerak.

**3-bosqich.** Taqsim orasidagi oygul o'rtafiga to'lqinsimon shaklda barg chizib chiqiladi. Keyingi taqsimda ham takrorlanadi.

**4-bosqich.** So'nggi bosqichda to'lqinsimon marg'ula novdasi chizib chiqiladi. Chizishda gullar, barglar, novda qaliqligiga e'tibor berish kerak.

**4-mashq.** «Bargli islumi» (4-gul) naqsh namunasini qora qalamda chizish.

Texnika: qora qalam bilan ishlash.

Material: qog'oz va qalam.

O'lcham: katak daftar yoki albom varag'i yuzasida bajariladi.

**Bajarish bosqichlari:**

Murakkab barg to'lqinsimon harakat qiladi, barglar ritmik bir-biridan o'sib chiqadi, oraliqdagi bo'shliqlarning har birida yarimta barg oygul bilan uzviy bog'lanadi. Bu naqsh «Barg islumi» deb yuritiladi. To'lqinsimon holatda barglarning bir-biridan o'sib chiqib, takrorlanishi o'ziga xos joziba beradi. Naqsh o'lcham va ko'rinishda chiziladi. «Bargli islumi», asosan, barg, bargli oygul va novdadan tashkil topgan. Shuning uchun barg, bargli islumi va novdaning eskizi qog'ozda chiziladi.

**1-bosqich.** O'lcham asosida ikki parallel chiziq chizilib, teng kvadratlarga bo'linadi. Diagonal chiziqlar to'lqinsimon ko'rinishda ritmik asosda chizib chiqiladi.

**2-bosqich.** Bargning diagonal chiziqlari to'lqinsimon ko'rinishda chizib chiqiladi. Chizishda simmetriyaga, dinamikaga e'tibor berish kerak.

**3-bosqich.** To'lqinsimon o'sib borgan barglar orasiga bargli oygul chizib chiqiladi.

**4-bosqich.** Bargli oygullar novdalar bilan birlashtirib, bir butun kompozitsiya hosil qilinadi.

**5-mashq.** «Aylana islumi» (5-gul) naqsh namunasini qora qalamda chizish.

Texnika: qora qalam bilan ishlash.

Material: qog'oz va qalam.

O'lcham: katak daftar yoki albom varag'i yuzasida bajariladi.

**Bajarish bosqichlari:**

«Aylana islumi», asosan, aylana mehrob ko'rinishidagi tanob, olti yaproqli oygul, uch yaproqli oygul, shukufta va novdadan iborat. Bu naqsh to'nkarma taqsim orasida takrorlashdan hosil bo'ladi.

**1-bosqich.** 4 sm oraliqda ikki gorizontal parallel chiziq chiziladi va ular kvadratlarga bo'lib chiqiladi. Parallel chiziq oralig'ini teng ikkiga bo'lib, yordamchi o'q chiziq chiziladi. Rasmida ko'rsatilganidek aylana chizib, yordamchi diagonal chiziqlar chiziladi.

**2-bosqich.** Naqsh qovurg'asi, ya'ni tanobi va oddiy shukuftalari chizib chiqiladi.

**3-bosqich.** Aylana ichiga olti yaproqli oygul, mehrob ichiga uch bargli oygul chizib chiqiladi.

**4-bosqich.** Uch bargli oygul uchidan novda chiqarib, olti yaproqli oygul ostidan o'tkaziladi, novda to'lqinsimon harakat asosida ikkinchi uch bargli oygulga borib ulanadi. Shu asosda taqsim tugallanadi va oyna naqsh takrorlanib, davom etadi.

**6-mashq.** «Mehrob islimi» (6-gul) naqsh namunasini qora qalamda chizish.

Texnika: qora qalam bilan ishlash.

Material: qog'oz va qalam.

O'lcham: katak daftар yoki albom varag'i yuzasida bajariladi.

#### *Bajarish bosqichlari:*

Bu naqshning asosiy qismi, ya'ni tanobi mehrob shaklida bo'lgani uchun «Mehrob islimi» deb yuritiladi. Mehrob islimi, asosan, tanob, uch bargli oygul, oddiy uch bargli no'xotgul hamda novdadan iborat.

**1-bosqich.** Avvalgi gullarga o'xhatib gorizontal parallel chiziqlar chiziladi va teng kvadratlarga bo'lib chiqiladi. Rasmida ko'rsatilganidek aylana chiziladi.

**2-bosqich.** Naqshning o'zagi bo'lgan tanob 65-rasmida berilganidek qilib yordamchi aylana asosida chiziladi.

**3-bosqich.** Uch bargli oygul va uchib ketayotgan qushga o'xhash uch bargli gul chiziladi.

**4-bosqich.** Gullar to'lqinsimon chiziqlar asosida biriktiriladi.

**7-mashq.** «Qo'sh mehroblı islimi» (7-gul) naqsh namunasini qora qalamda chizish.

Texnika: qora qalam bilan ishlash.

Material: qog'oz va qalam.

O'lcham: albom varag'i yuzasida bajariladi.

#### *Bajarish bosqichlari:*

Naqsh asosi mehrob shaklida bo'lib, ritmik asosida takrorlanadi. Mehrob madoxili shaklida tepe va pastki yo'nalishda davom etib, go'zal ko'rinishni hosil qiladi. «Qo'sh mexroblı islimi» qo'sh mehrob, uch va ikki bargli oygul, novda hamda marg'uladan iborat.

**1-bosqich.** 6 sm oraliqda ikki parallel chiziq chiziladi, gorizontalliga 2,5 smlik to'g'ri

to'rtburchaklarga bo'lib chiqiladi. Balandlik ikkiga bo'linib, o'rtadan o'q chiziq chiziladi.

**2-bosqich.** 66-rasmida ko'rsatilganidek mehrob chiziladi.

**3-bosqich.** Mehrob orasiga uch va ikki bargli oygullar chiziladi.

**4-bosqich.** Ikki bargli oygul bilan uch bargli oygullarning **tепа** va past qismi novdalar bilan bog'lab chiqiladi. Ikki bargli oygullarning ikki tomonidan kompozitsiyada bo'shliqni to'ldiruvchi chirov beruvchi **marg'ula** gajakka o'xshab chiqariladi.

**8-mashq.** «Bofta islimi» (8-gul) naqsh namunasini qora qalamda chizish.

Texnika: qora qalam bilan ishlash.

Material: qog'oz va qalam.

Hlcham: katak daftар va rasm daftар varag'i.

#### *Bajarish bosqichlari:*

Naqshning asosi bo'lgan bofta shakli tanobli simmetrik holda to'lqinsimon harakatlar asosida hosil qilinadi. Naqsh boftali tanob, to'rt bargli oygul va novdadan iborat.

**1-bosqich.** 6,5 sm oraliqda parallel chiziq chiziladi va o'rtasidan gorizontal chiziq chiziladi. Gorizontal chiziq 61 sm masofada bo'laklarga bo'linib, to'rtburchak va diagonal chiziqlar o'tkaziladi.

**2-bosqich.** Yordamchi chiziqlar asosida boftali tanob chiziladi.

**3-bosqich.** To'rt bargli oygul chizib chiqiladi.

**4-bosqich.** Bargli gullar novdalar bilan birlashtirib chiqiladi.

**9-mashq.** «Patnisgul islimi» (9-gul) naqsh namunasini qora qalamda chizish.

Texnika: qora qalam bilan ishlash.

Material: qog'oz va qalam.

O'lcham: katak daftар yoki albom varag'i yuzasiga bajariladi.

#### *Bajarish bosqichlari:*

Patnis shakliga o'xshagini uchun «Patnisgul islimi» deb yuritiladi. Naqsh tanob, bofta novda, uch bargli gul, barg, oddiy gul, no'xotgul, g'uncha va marg'uladan iborat. Bu naqsh to'qqizta elementdan tashkil topgan bo'lib, avvalgi naqshlardan ancha murakkab hisoblanadi.

**1-bosqich.** Oralig'i 7 smlik gorizontal parallel chiziq chizib, 8 sm dan taqsim bo'lagini chizamiz. Diagonal chiziqlar va 68-rasmdagidek yordamchi chiziqlar chizamiz.

**2-bosqich.** Tanob shakli chiziladi. Novda asosida shakl chiziqlari chiziladi. Novdani chizishda marg'ula va boftadan foydalaniladi.

**3-bosqich.** Gullar qo'yiladigan joylarga gul va g'unchalar joylashtirib chiqiladi.

**4-bosqich.** Gullar novdalar bilan uzviy bog'lanadi, bo'sh joylarga barg va marg'ula chiziladi. Bu o'rinda marg'ula va barglar to'ldiruvchi va husn beruvchi vazifasini bajaradi.

**10-mashq.** «Shukuftali islimi» (10-gul) naqsh namunasini qora qalamda chizish.

Texnika: qora qalam bilan ishlash.

MATERIAL: qog'oz va qalam.

O'lcham: katak daftar yoki albom varagi i yuzasiga bajariladi.

#### **Bajarish bosqichlari:**

Shukuftali islimi murakkab naqsh hisoblanadi. Naqsh shukuftali tanob, pista gul, murakkab bargli oygul, ko'p bargli gul, oddiy barg va marg'uladan iborat.

**1-bosqich.** O'lcham asosida to'g'ri to'rtburchak chiziladi. To'g'ri to'rtburchak to'rtta bo'lakka bo'linib, markazga aylana chiziladi.

**2-bosqich.** Shu aylana asosida tanob shakli chiziladi.

**3-bosqich.** Murakkab gullar, bargli gullar chizib chiqiladi.

**4-bosqich.** Gullar, murakkab barglar novdalar bilan bog'lab, to'ldiruvchi barg va marg'ulalar chizib chiqiladi.

### **TAYANCH TUSHUNCHALAR:**

Bodom guli; Pechak islimi; Bargli islimi;  
Aylanali islimi; Mehrob islimi;  
Qo'sh mehroqli islimi; Bofta islimi;  
Patnisgul islimi; Shukufa islimi;

### **S a v o l l a r**

1. Naqsh namunalarining tuzilishini tahlil qilib bering.
2. Har bir naqsh namunasi nechta elementdan tashkil topgan?
3. «Qo'sh mehroqli islimi» naqshini chizish bosqichlarini tushuntirib bering.

4. Har bir naqsh nimasi bilan farq qiladi?
5. «Naqshlardagi raxonlik, tabiiylik va nisbiylik» deganda nimani tushunasiz?
6. «Naqshlarning nomlanishi» deganda nimani tushunasiz?
7. Murakkab naqsh elementlari nomini aytib bering.
8. Oddiy naqsh namunalarini chizishda, asosan, nimaga e'tibor beriladi?

### **Test savollari**

**1. Pechak islimi nechta novda harakatidan hosil bo'ladi?**

- A. 2 ta.
- B. 3 ta.
- C. 4 ta.
- D. 1 ta.
- E. 10 ta.

**2. Ritm nima?**

- A. Taqsim.
- B. Takrorlanish.
- C. Naqsh elementi yoki naqshning ma'lum tartibda va ma'lum oraliqda bir tekisda takrorlanishi.
- D. Boftaning bir tekisda takrorlanishi.

**3. Yo'l ichidagi bir yo'naliс «...» naqsh nomi nima?**

- A. Morpech, yak raftoriy, pechak islimi.
- B. Namoyon.
- C. Taqsim.
- D. Ruja.
- E. Girih.

**4. Birinchi naqsh namunasining nomi nima?**

- A. Pechak islimi.
- B. Bodom guli.
- C. Morpech.
- D. Yak raftor.
- E. Gulchechak.

**5. Ikkinci naqsh namunasining nomi nima?**

- A. Aylana raftor.
- B. Bargi raftor.
- C. Pechak islimi.
- D. Girihli gul.
- E. Bargli islimi.

**6. Birinchi gul bilan o'ninchisi gulning farqi nima?**

- A. Kattaligida.
- B. Elementida.
- C. Jozibasida.
- D. Rangida.
- E. Murakkabligida.

**7. O'ninchি naqsh namunasining nomi?**

- A. Bodom islimi.
- B. Boftali islimi.
- C. Pechak islimi.
- D. Bargli islimi.
- E. Shukuftali islimi.

**8. Bodomning ramziy ma'nosi nima?**

- A. Muhabbat.
- B. Baxt-iqbol.
- C. Vafodorlik.
- D. Sevgi.
- E. Vatanparvarlik.

**9. Nechanchi gul mehrob ko'rinishidagi tanobdan, olti va uch yaproqli oygul, shukufta va novdadidan iborat bo'ladi?**

- A. 1-gul
- B. 4-gul
- C. 6-gul
- D. 5-gul
- E. 7-gul

**10. O'nta naqshdan qaysi biri uch bargli oygul, oddiy uch bargli no'xotgul, mehrob shaklidagi tanob va novdadidan iborat bo'ladi?**

- A. 6-gul.
- B. 8-gul.
- C. 3-gul.
- D. 10-gul.
- E. 9-gul.

**11. Qaysi naqsh asosini shukufta egallaydi?**

- A. 8-gul.
- B. 7-gul.
- C. 3-gul.
- D. 4-gul.
- E. 10-gul.

**12. Bofta islimi va patnisgul islimi nechanchi gul hisoblanadi?**

- A. 4–5-gullar.
- B. 4–3-gullar.
- C. 8–10-gullar.

**D. 8–9-gullar.**

**E. 10–8-gullar.**

**13. Kompozitsiyaning asosini qo'sh mehrob egallagan naqshning nomi nima?**

- A. Qo'sh mehrobli girihi.
- B. Mehrobli islimi.
- C. Qo'sh mehrobli islimi.
- D. Boftali islimi.
- E. Merobli va boftali naqsh.

**14. 10-gulning nomini aytib bering.**

- A. Patnisgul islimi.
- B. Shukuftali islimi.
- C. Yak raftor.
- D. Bodom gul.
- E. Mehrobli islimi.

### Adabiyot

1. Б у л а т о в С. Ganchkorlik.  
«O'qituvchi», Т., 1989.

2. Б у л а т о в S. Ganchkorlik, naqqoshlik  
va yog'och o'ymakorligiga oid atamalar izohli  
lug'ati. «Mehnat», Т., 1991.

3. Б у л а т о в S. O'zbek xalq amaliy bezak  
san'ati. «Mehnat», Т., 1991.

4. Б о с и т х о н о в Z. Ganchkorlik. Т.,  
1978.

5. З о х и д о в П. Самаркандская школа  
зодчих. Изд. «Наука» Т., 1965.

6. Искусство Советского Узбекистана.  
Д о л и н с к а я , П. З а х и д о в , Т. К а д ы -  
р о в и д р. Изд. «Советский художник». М.,  
1976.

7. Q o s i m o v Q. Naqqoshlik. «O'qituv-  
chi», Т., 1982.

8. Н о т к и н И. Бухарская резьба по  
ганчу. Гос.изд.худ.лит. Т., 961.

9. P r i s a I. Toshkent ganchkorligi. Davlat  
badiiy adabiyot nashriyoti. Т., 1960.

10. Резьба и роспись по ганчу и дерева.  
Изд. АН. Т., 1962.

11. Ш о р о х о в В. Основы и композиции.  
Учебное пособие для студентов пед.инс.  
«Просвещение», Т., 1979.

## GANCH O'YMAKORLIGIDA ISHLATILADIGAN MATERIALLAR VA ULARNI ISHLATISH TEXNOLOGIYASI

O'tmishda ota-boblarimiz qurgan muhtasham binolar hozirgi kungacha maftunkor jilvasini yo'qotmagan. Yuksak did bilan ishlangan naqshlar kishini hayratga soladi. Chet ellardan tashrif buyurgan sayohatchilar ham did bilan ishlangan naqshlarning umri boqiyligini ko'rib lol qolmoqdalar. Binolarning pishiq-puxta, chidamli hamda mukammal qilib qurilganligi olimlarimizbu binokorlar va arxitektchlarni hayratga soladi.

Qadimiy obidalarning va bezaklarning umri boqiyligi shundaki, ota-boblarimiz yuqori sifatli, g'oyat chidamli hamda davr sinovlaridan o'tgan qurilish materialari: yog'och, ganch, tuproqdan unumli foydalanganlar. Ular bu materiallarni qayerda va qanday qo'llanish sirasorini yaxshi bilganlar.

Ganch – mahalliy qurilish materiali bo'lib, uning rangi ko'kish yoki sarg'ish bo'ladi. Ganch turli joylarda turlicha nomlar bilan yuritiladi. Kavkazda «gaja», forscha «gaj», tojikcha «ganch», turkcha «urunak», o'zbekcha «ganch» deb yuritiladi. Ganch gips bilan tuproqning tabiiy aralashmasi bo'lib, uning tarkibida 40 – 70 foyizgacha gips bo'ladi. Ganch ikki xil: tabiiy va sun'iy bo'ladi. Tabiiy ganch katta xarsang tosh holida bo'lib, uni to'g'ridan-to'g'ri o'yib, yo'nib ustun, haykal va bezak sifatida foydalaniadi. Sun'iy ganch esa maxsus pechlarda qizdirilib, keyin maydalab tayyorlanadi. Qadimda ganch tayyorlaydigan ustalar bo'lib, ularni «ganchkorlar» deb ataganlar. Ganchkor tabiiy ganch toshlarni xumdonda 120-150 daraja haroratda kunduzi 6-7 soat qizdirgan, so'ng ertalabgacha sovitib qo'yan. Erta bilan ganch toshlar maxsus to'qmoqlar bilan maydalangan, so'ng g'alvir va elakdan o'tkazilgan. Bu ganch navlarga ajratilgan. Eng mayin, donachali ganch *gulganch* deb, ya'ni «gul o'yish uchun ishlataladigan ganch» deb atalgan. Ganch qanchalik mayin bo'lsa, o'yma shunchalik nafis chiqqan. Mayin ganch nafis o'ymakorlikda, pardoz suvoqda ishlataladi. Yirik ganch har xil suvoq, qora suvoq va g'isht terishda ishlataladi. Yuqori haroratda qizdirish natijasida ganch tarkibidagi nam juda kamayib, quvvati oshadi. Ganch o'rniga alebastr ham ishlataladi. U suvoq, g'isht terishda, ayrim hollarda esa *gulganch*

o'mida ham ishlataladi. Ganch o'ymakorligi bilan shug'ullangan ustalar ganchning quvvatini qanchalik tez yoki sekin qotishiga qarab aniqlaydilar. Tajribali ustalar ganchni qo'liga olib qisib ko'rgan zahotiyoyq uning eski yoki yangilagini, quvvatini aytib bera oladilar. Odatda, ganchning quvvatini aniqlash uchun ozgina qorib, o'yib ko'radilar. Agar u juda quvvatli bo'lsa, ming martagacha suvda qorishtirishni talab qilishi mumkin. Ganchning juda ko'p xususiyatlari bo'lib, ular mohirona, omilkorlik va shoshilmay foydalananish kerak. Ganch qorish texnologiyasi uncha murakkab bo'lmasa, o'ziga xos nozik tomonlari bor. Ganch qadimda sirli lagan idishlarda qorilgan, hozir esa plastmassa idishlardan foydalaniadi. Ganch qorishning *tez ganch, soxtaganch, do'g'ob, xovonda* usullari bo'lib, ular o'ziga xos, nozik yoki murakkab bo'ladi. Qorishma tayyorlashda ushbu nozik jihatlarni e'tiborga olish ustuning muhim vazifasidir.

**Tez ganch** – tez qotuvchi ganch qorishmasi bo'lib, ganchkorlikda ravoq bog'lashda, suvoqda va har xil ishlarda ishlataladi. Bu qorishmani tayyorlash uchun idishdagagi suv ustiga ganch solinadi va tez qoriladi. Ganch ko'p aylantirilmaydi hamda tezda kerakli joyga ishlataladi. Tez ganch qorishmasi tezlik bilan ishlatilmasa, u qotib qoladi hamda isrof bo'ladi.

**Soxtaganch** – qorilganidan keyin 30 minut atrosida qotmay turadi. Soxta ganch qorishmasini tayyorlash uchun idishdagagi suvga elangan ganch sepib solinadi, bu suv yuzasi ganch bilan berkitilgunga qadar takrorlanadi. Bunda ganch suvga to'yib boradi. Usta shu soxta ganch qorishmasini bir chekkadan olib, kerakli joyga ishlataladi.

**Do'g'ob usuli** – biror yuzani yoki to'ldirish, yoki berkitish uchun ishlataladigan suyuq qorishma. Idishga suv solinib, suv yuzi berkitilguncha ganch sepiladi. Bu ganch soxta ganchga qaraganda bir oz suyuqroq bo'ladi. Bu ganch berkitish yoki to'ldirish uchun ishlataladi.

**Xovonda** – gul o'yishga mo'ljallab, kuchi ma'lum qadar kamaytirilgan ganch qoriladi. Uni tayyorlashning o'ziga xos tomonlari bor. Buning uchun plastmassa tog'oraga suv solinadi. Unga

clangan mayda ganch ohista, shoshilmay solinadi, suv yuzaga chiqib ketmasligi uchun ganch idish ostidan kaft bilan aylana shaklida aralashtiriladi. Tayyorlangan qorishma bir oz qota boshlagach, uni ishlatish mumkin. Ganch qanchalik kuchli bo'lsa, shuncha ko'p qoriladi. Qadimda ustalar juda quvvatli ganchlarni ishlatganlar. Ular xovondani mohirlik bilan tayyorlashgani uchun ishlari bejirim, nafis va go'zal chiqqan. Ustalar quvvatli ganchni juda ko'p qorganlar, natijada ganch qorishma nafislashgan, mayinlashgan. Sekin va yumshoq holatda qotgan xovondaga ustalar shirach qo'shadilar. Shirach uning quvvatini oshigan.

Ganch o'rniga gips ham ishlatiladi.

**Gips** – oq, rangsiz, shaffof, qoramtil yoki qora rangdagi mineral. U juda mo'rt bo'lib, suvda criydi. 80–90° haroratda qizdirilganda tarkibidagi suv bug'lanib ketadi. Agar 120–140° qizdirilsa, alebastrga aylanadi. U qurilish materiali; undan qog'oz, sement sanoatida, tibbiyot va haykal-taroshlikda, o'ymakorlik va bo'yoq tayyorlashda ham foydalaniladi. Gips suvgaga chidamsiz. Gipsni namdan asrash uchun usti suv o'tmaydigan muhofaza pasta yoki bo'yoq bilan bo'yaldi. Gipsdan quruq suvoq devor toshlari, to'siq plita, qavatlararo yopmalar, karnizlar, tovush yutuvchi materiallar va yong'indan muhofaza-lovchi buyumlar yasaladi. Gips hozir ganch o'rnida ishlatilmog'nda. O'zbekistonda, Markaziy Osiyo mamlakatlari va boshqa yerlarda gips konlari bor.

Qadimda gips toshlari 200–250° qizdirilgan. hosil bo'lgan gips sekin qotib, quvvati oshgan. 400–750° haroratda qizdirilganda esa, u kuygan, bu *yaproqsiz gips* deb ataladi. 200–250° dan past haroratda qizdirilgan ganchning quvvati past hisoblangan. Qadimda misrliklar mashhur ehromlarni qurishda gips ishlatganlar. Bu gips 800 darajada qizdirilib, asta-sekin sovutilgan. hozir bu texnologiya unutilib, bizgacha yetib kelmagan.

**Aleastr** – gipsning dag'alroq turi. Tez qotadi, qattiqligi gips vaganchdan qolishmaydi. Donachalari yirikroq, oq va havorang tusda bo'ladi. U suvoq va boshqa ishlarda qo'llaniladi. Buning uchun aleastr elakdan o'tkazilib, suv bilan aralashtirilib, qorishma tayyorlanadi. U pechkada 80–90° qizdirilganda tarkibidagi suv yo'qola boshlaydi. Harorat 120–140 darajaga yetganda, u yetiladi. Ba'zan toza aleastrlardan o'ymakorlik ishlarini bajarishda foydalanilgan.

IX-X asrlarda pishirilgan g'isht keng qo'llana boshlagan. G'isht terishda loy o'miga ganch ishlatilgan.

XIV–XV asrlarga kelib ganch, ajoyib texnologik xususiyatlarga ega bo'lgani uchun, binolarning qovurg'alarini mustahkamlashda, ya'ni hozirgi beton o'rnida ishlatilgan.

Ganch issiqni juda kam o'tkazadi. Uning bu xususiyatini bilgan me'morlar uylarning devor, shift, hattoki, polini zax o'tmasligi uchun ganch bilan suvaganlar. Qadimda qurilgan uy, masjid, madrasalar qishda pechkasiz, hech qanday elektr isitgichsiz issiq bo'ladi. Yozda esa bu xonalar salqin bo'lgan. Chunki devor qo'sh sinchli qilinib, orasida bo'shliq qoldirilgan, buning ustiga devor qalin ganch suvoq qilingan. Hozir esa beton uylar qishda sovuq, yozda esa qizib ketadi. Bu inson sog'ligiga, umuman, salbiy ta'sir etadi. Betonning o'z o'rni va ishlatish joyi bor. Ganchning ijobji tomonlaridan yana biri – uning yengilligidir. Ganch betonga qaraganda 38–40 foyiz yengil bo'lgani uchun har xil gumbaz va maxsus binolarni qurishda ishlatiladi. O'tmishda binolarning gumbaz va maxsus joylari, har xil quyma bezaklari faqat ganchdan qilingan. Ganchning yana bir fizik-mekanik xususiyati – sisfati yaxshiligidadir. Xususan, ganch qotgandan so'ng torayish o'rniga kengayadi, bu esa yog'och konstruksiyalarni yanada mustahkam bog'lab turadi. Ganchning xususiyatlardan yana biri – u yuqori bosimga chidamli, egiluvchan (mo'rt emas), ya'ni u qattiq zarbada ham sezilar-sezilmas darajada o'z-o'zidan amortizatsiya berish qobiliyatiga ega. Ganch bilan terilgan g'isht devor yoki ganch suvoq dahshatli zilzilalar bo'lganda ham unchalik zarar ko'rmaydi. Ganch tez yopishib qolgani uchun devor va g'ishtni sidirg'a suvash, shakl tayyorlash, o'yma naqsh ishlash, ustidan bo'yab, tasvir va naqsh tushirish qulay. Ko'p risolalarda ganch suvgaga chidamsiz, ko'pincha binoning ichkarisida ishlatiladi, deyiladi. Lekin biz bu fikrga qo'shila olmaymiz, chunki ota-bobolarimiz qadimda juda kuchli ganch tayyorlay olganlar. Shuning uchun ham ular binoning yomg'ir, qor tushadigan tom, gumbazlari g'ishtlarini ganch bilan terganlar. Ulardan hech qachon chakka o'tmagan. Ular, hattoki, hammomlarning ichki qismini ham *kir qorishmasi* deb ataladigan ganch bilan suvaganlar. Ganch suvoq aslo ko'chib tushmagan.

Qorishmani tayyorlash va undan foydalanish quyidagicha bo'lgan. Bir chelak ohak, bir chelak

qum, mayda ko'mir kukuni hamda qamish kuli qorishtirilgan. Bu qorishmani olovga qo'yib, 10-12 soat aylantirib, pishitishgan. Keyin u bilan hovuzlarni suvaganlar. Hovuzning kichik yoriqlari sutga qorilgan ganch bilan suvalgan. Bunday suvoq namgarchilikka uzoq chidagan. G'isht terishda va suvoq ishlarida *ganchxok* ishlatilgan. Uni tayyorlashda bir chelak alebastri yoki tezganch, bir chelak qum va bir chelak soz tuproq elanmasdan obdan aralashtirilgan. Hosil bo'lgan qorishma kerakli yuzaga kaft bilan chaplab surtilgan. Bu suvoqni ganchkor ustalar «kapganch» deb ataydilar. Ganch tuproqqa o'xshash qoramtr bo'ladi. Avvalgi ustalar ishdan chiqqan ganchlarni tashlab yubormasdan qayta ishlatgan. Chiqindi ganch qozonga solib qizdirilgan. Qayta ishslash natijasida ganch oldingi quvvatiga kelgan. Qayta ishlangan ganch suvoq va g'isht terishda ishlatilgan.

Ganch akustiklik xususiyatga ham ega. Ganch bilan suvalgan xonada tovush jaranglab chiqadi. Chunki ganchli devor tovushni yaxshi qaytaradi. Ganch bilan suvalgan katta zallar yorug' va akustiklik xususiyatiga ega. Shu bois ilgarilari katta zallarda mikrofonning keragi bo'lman. Ganchga mineral bo'yoqlar qo'shib, rangli ganch ham tayyorlangan. Ganch o'ymakorligida *qirma* ham ishlatilgan; bunda o'yilgan yerlar rangli qorishma bilan to'ldirilgan. Bu ruschada «ganchevaya mozaika» deb yuritiladi.

Naqsh turining eng kenjası — qirmadir. Qirma ganchda o'yilgan chuqurchalarga rangli qorishma kiritiladi. Uning o'ziga xos xususiyatlari bor. U ko'p rangni yoqtirmaydi. Uning pardozi ham odadagidek emas. Qirmada ko'p rang ishlatilsa, ish bosqichi o'shancha ortadi. Bunga sabab — nusxada bir-biriga yaqin bo'yoqlarning o'rinnari bir yo'la o'yilgan bo'lsa, rangli qorishmani quyganda u kirishi zarur bo'lman o'ringa tushib ketadi. Buning oldini olish uchun naqqosh oldin bir xil rang joyini o'yib bo'lgach, rangli qorishma quyadi va naqsh sathini tekislab qirib tashlaydi. Shunda bo'yoq kirgan chegaralar aniq va chiroyli chiqadi. Keyin yana qayta axta yordamida ikkinchi marta nusxa tushirilib, ikkinchi bo'yoqning o'rni o'yiladi va rang beriladi, yana oldingisi singari naqsh sathi (yuzi) ochilguncha qiriladi. Uchinchi, to'rtinchi rangli qorishma kiritiladigan bo'lsa, ish xuddi shu tartibda takrorlanadi. Shuning uchun qirmada tanglar soni 2-3 xildan ortiq bo'lmaydi. Qirma yaxlitligi va rang turining kamligi bilan rangli naqshlardan yaqqol ajralib turadi.

Rangli ganch tayyorlashda oldinlari ustalar ko'mir kukunini tegirmonda maydalab, qizg'ish yoki jigarrang g'isht kukunini va boshqalarni qo'shgan. Hozir esa tayyor har xil rangli pigmentlardan foydalanilyapti.

Rangli pigment ganchga qancha ko'p qo'shilsa-da, ganch uning kuchini kesib, mo'tadil holga keltiradi. Mineral bo'yoq nisbati 1:10 dan oshmasligi kerak, aks holda tayyorlangan rangli ganchning quvvati pasayib ketadi. Odatda qirma uchun quruq qorishma tayyorlashda ustalar biror idishni o'Ichov qilib, ganchga o'zları xohlagancha rang qo'shib, quruqligida aralashtiradilar. So'ngra bu quruq aralashmani oz-oz qorib ishlatadilar. Oldindan kerakli miqdorda quruq aralashma tayyorlab olinmasa, uning rangi to'qlashib qolishi mumkin.

Qirmaning yana bir xislati shuki, quyosh nuri tushsa ham yaltiramay, bir xil mayinlikda ko'rinadi. Vaqt o'tishi bilan naqsh ustini chang bossa, uni qaytadan qirib, yangilash mumkin. Qirma pardojni ko'pincha Usta Shirin Murodov, Quli Jalilov va boshqalar qo'llaganlar.

Qadimdan g'isht teruvchi va ganch o'ymakor ustalar maxsus tayyorlangan shirachni ganchga qo'shib ishlatganlar.

**Shirach** — lotincha «*eremurs*», ruscha «*keley*». Shirach ganch o'ymakorligida va g'isht terishda qadimdan foydalaniib kelingan. Shirachni ganchga qo'shishdan maqsad — ganch sekin qotishini va qotgandan so'ng toshdek qattiq bo'lib qolishini ta'minlashdir. 1933-yil arxeolog olimlar B.G.Zasipkin va V.P.Vyatkin O'zbekistondagi arxitektura yodgorliklarida terilgan g'isht va o'yma ganch qoldiqlarini tekshirib, ganchga maxsus tayyorlangan shirach qo'shib ishlatilganligini aniqladilar. Shirach qo'shilgan ganchning quvvati 45 foyizgacha oshgan. O'zbekistondagi arxitektura yodgorliklarining qariyb hammasi shirachli, baquvvat ganchdan ishlangan. Shuning uchun bu arxitektura yodgorliklari monolitga aylanib, zilzilaga bardosh bergan. Qadimda shirach tayyorlaydigan maxsus ustalar bo'lgan. Buxoroda Sitorai Mohi Xosani bezashda maxsus usta o'sha yerda shirach tayyorlagan va Usta Shirin Murodovga yetkazib turgan. Bu shirach tosh oyna zaminli o'ymaga ishlatilgan. Shirach tayyorlaydigan usta qassoblardan buqacha yoki qo'yning payi va suyagini sotib olgan, keyin maxsus o'tlarga qo'shib, qozonda past olovda qaynatgan. Suyuqlik to'xtovsiz aylantirilib,

qaynaganda hosil bo'lgan ko'piklar tez-tez olib tashlangan, chunki ko'pik olib tashlanmasa, tayyorlanayotgan shirachning quvvatiga putur yetgan. Bir tekis qaynatilgan va asta-sekin sovitib hosil qilingan shirachni maxsus idishda o'ymakor ustalarga yetkazib bergenlar. Ustalar ganchga ma'lum miqdorda shirach qo'shganlar. Hattoki, bu shirachlar chet ellarga, Angliya va Shvetsiyaga sotilgan. Ganch sekin qotishi uchun ariq suvi, sirka qo'shganlar. Bunda ganchning quvvati bir oz kamaygan. Hozir ba'zi ustalar, masalan, Samarqand ganch o'ymakor ustalari ganchga shirach qo'shib ishlattyaptilar. Keyingi yillarda shirach texnologiyasi juda keng qo'llanilmoqda.

Bino qismlari, ustunlar, haykalchalar, sharafa, muqarnas, hajmli naqsh va boshqa unsurlarni quyma usulida tayyorlash uchun sut, kamedi, kazein, shirach va boshqa moddalar qo'shilgan. Bular ganchning quvvatini oshirgan, umrini uzaytirgan. Qadimgi ustalar yangi binoni kamida ikki yildan oshiqroq vaqt ichida bezaganlar. Chunki bino obdan qurishi va yerga yaxshi cho'kib, o'mashishi kerak bo'lgan. Aks holda bir necha yillardan keyin baquvvat qilingan bezaklar ham yorilib, ko'chib yoki to'kilib ketgan.

## TAYANCH TUSHUNCHALAR:

Ganch; Ganchkop; Gulganch; Tez ganch; Gips; Alebastr; Shirach.

### Savollar

1. Ganch o'ymakorligida qaysi materiallar ishlataladi?
2. Ganch necha xil bo'ladi?
3. Ganchning gipsdan farqi nimada?
4. Xovonda qanday tayyorlanadi?
5. Ganch qadimda qanday tayyorlangan?
6. Ishdan chiqqan ganchni yana ishlatsa bo'ladi?
7. Rangli ganch qanday tayyorlanadi?
8. Shirachdan qanday foydalaniladi?
9. O'yma ganchlarning to'kilib ketishining sababları nimada?

### Test savollari

#### 1. *Gulganch nima?*

- A. Ganchning bir turi.
- B. Ganchning oliv navi.
- C. Ganchkor usta.
- D. Alebastr suvoqchi.
- E. Gul o'ymakor usta.

#### 2. *Ganchning gipsdan farqi nimada?*

- A. Ganch qattiq bo'ladi.
- B. Ganch gipsiga qaraganda tez qotadi.
- C. Farqi yo'q.
- D. Rangi bilan.
- E. Ganchning tarkibida tuproq bo'ladi.

#### 3. *Avvalgi ustalarimiz g'isht terishda va ganch o'yishda gulganch qorishmasining sekin qotishi uchun nima qo'shganlar?*

- A. Tuproq.
- B. Suv.
- C. Shirach.
- D. Sut, loy.
- E. Loyqa suv.

#### 4. *Gips nima?*

- A. Mineral bo'yoq turi.
- B. Mineral.
- C. Bo'yoq.
- D. Oq, rangsiz, shaffof, qoramtil yoki qora rangdagi mineral.
- E. Loy turi.

#### 5. *Alebastr nima?*

- A. Gipsning dag'alroq turi.
- B. Ganchning asosiy turi.
- C. Tuproq.
- D. Qumning bir turi.
- E. Gipsning dag'alroq turi.

#### 6. *Rangli ganch tayyorlashda qanday bo'yoqlardan foydalaniladi?*

- A. Pigment, guash va boshqalardan.
- B. Suv va loydan.
- C. Ko'mir va gipsdan.
- D. Kul va sutdan.
- E. Qum va ko'mirdan.

#### 7. *Ganchkorlikda ishlataladigan asosiy materiallar?*

- A. Bolta, mix, qalam.
- B. Qog'oz, igna, pichoq.
- C. Ganch, alebastr, gips.
- D. Mo'yqalam, siyohqalam.
- E. Iskana qalam.

#### 8. *Ganch nima?*

- A. Tuproq va qum aralashmasi.
- B. Alebastr bilan tuproq aralashmasi.
- C. Sement bilan qum aralashmasi.
- D. Gips bilan tuproqning tabiiy aralashmasi.
- E. Sement, alebastr va qum aralashmasi.

**9. Tez ganch nima?**

- A. Tez o'yiluvchi ganch.
- B. Tez qotuvchi ganch qorishmasi.
- C. Zaminli ganch.
- D. Faqat skalpelda o'yiluvchi ganch.
- E. Sekin qotuvchi ganch.

**10. Ganch necha xil bo'ldi?**

- A. 4 xil.
- B. 3 xil.
- C. Tabiiy, sun'iy ganchlar.
- D. Aralash va sun'iy ganchlar.

**11. Gilkor kim?**

- A. Ganch quyuvchi usta.
- B. Ganchkor usta.
- C. Loy suvoqchi usta.
- D. Loy tayyorlovchi.
- E. Ganch o'ymakor ustaning yordamchisi.

**12. Ganchxok nima?**

- A. Loyning bir turi.
- B. Ganchkor usta.
- C. Loy tayyorlovchi usta.
- D. Soz tuproq, qum va ganchni suv bilan aralashtirib hosil qilingan qorishma.
- E. Qum va gips aralashmasi.

**13. Shirach qo'shishning sababi nimada?**

- A. Ganchning tez qotishini ta'minlaydi.

**B. Ganchning sekin qotishini va qotgandan so'ng qattiq bo'lishini ta'minlaydi.**

**C. Ganchning tez va oson o'yilishini ta'minlaydi.**

**D. Ganchga suv o'rnila qo'shiladi.**

**E. Ganch sifatini oshiradi.**

**Adabiyot**


1. Б у л а т о в С. Ganchkorlik., «O'qituvchi». Т., 1989.
2. Bulatov S. O'zbek xalq amaliy bezak san'ati. «Mehnat». Т., 1991.
3. Р е м п е ль Л. Далёкое и близкое. Изд.лит.иск. им.Г.Гуляма, Т., 1981.
4. Справочник архитектуры. Сос.
5. У с м о н о в М. San'atim-saodatim. «Yosh gvardiya», Т., 1983.
6. O'zbek sovet ensiklopediyasi. Т., 1972.
7. Zohidov P. Me'mor olami. Qomuslar Bosh tahririyyati. 1996.
8. Bulatov S. Ganchkorlik, naqqoshlik va yog'och o'ymakorligiga oid atamalar izohli lug'ati. «Mehnat», Т., 1991.
9. Г р а ж д а н к и н а Н. Архитектурно-строительные материалы Средней Азии. «Узбекистон». Т., 1989.
10. X a q q u l o v A., Ta'mir san'ati. «Mehnat». Т., 1981.



Naqsh




Tokcha




Qandil



Alisher Navoiy nomidagi opera va balet teatri qurilishida ishtirok etgan ustalar. 1944-yil




Xiva. Islomxo'ja madrasasi va minorasi. XX asr boshi



Buxoro. Ismoil Somoniy maqbarasi. IX-X asr




Buxoro. Masjidi Kalon. XV–XVI asrlar




Samarqand. Go'ri Amir maqbarasi. XV asr boshi



Samarqand. Imom al-Buxoriy maqbarasi



Samarqand. Imom al-Moturidiy maqbarasi



Samarqand. Shohizinda maqbaralar majmuasi.  
XI–XIX asrlar

## PARDOZ VA UNING TURLARI

Binoni bezashdan avval uning tuzilishiga mos ganch o'ymakorligi turini tanlash muhim ahamiyatga ega. Kichik xonaga mayda, tekis o'ymakorlik va unga mos bo'lgan pardoz turi, katta mehmonxonaga esa yirik ganch o'ymakorligi qo'llaniladi. Ganch o'ymakorligi *yirik o'yma, chuqur o'yma, yassi o'yma, qirma, zamini ko'zguli o'yma, zamini rangli o'yma, chizma pardoz, panjarasimon o'yma, zanjira, hajmli o'yma* turlaridan iborat. Bundan tashqari, ganch o'ymakorligi *zaminli* va *zaminsiz o'ymakorlikka* bo'linadi.

**Zaminli o'yma** binolarning fasadlari (tashqi tomoni)ni va katta mehmonxonalarini bezatishda qo'llaniladi. O'yma relyefning chuqurligi 2–3 sm bo'ladi. O'yma zamin butun yuzaning 15–30% ni egallaydi. O'yma ganch qora fonda oppoq, faqat soyasini qop-qora bo'lib ko'rindi.

Yirik o'yma namunalari qadimdan ishlangan. Bunga Termiz (IX–X asr), Samarqand (X asr) va boshqa shaharlardagi o'yma ganch namunalari dadil bo'la oladi. Hozir binolarning katta xonalari, ba'zan tashqi tomoni, ya'ni fasadi ganch o'ymakorligi bilan bezatiladi. Ganchkorlikda hajmli – barelfli, haykalsimon muqannaslar, qubba, tosh va boshqalar ishlatiladi. Ularga «hajmli o'ymalar» deyiladi. Ular o'yildi. Eng ko'p qo'llaniladigan – *yassi o'ymadir*. U interyerda ko'p qo'llaniladi. Katta bo'limgan xonalarda o'ymaning chuqurligi 1–1,5 sm bo'lib, u har xil pardozlanadi. O'yma naqshning zamini umumiyligi yuzaning 30–60%ni egallaydi. Unga joyiga moslab pax pardoz, choka pardoz, lo'la yoki tabaqo pardoz beriladi. Qirma pardoz X asrdan boshlab ishlatilgan. U Buxoro va Samarqand shaharlarda XVI asrda keng qo'llanilgan. Uni, ayniqsa, Buxoro ustalari yaxshi bilganlar. Qirma binolarning interyer va eksteryerlarida ham keng qo'llanilgan.

Qirma – o'yilgan joylarni rangli ganch qorishmasi bilan to'ldirishdir. Qirma ikki turga bo'linadi: birinchisi – tekis yuzali qirma, ikkinchisi – relyefli qirma. Tekis yuzali qirma – devorda xuddi grafik usulda bajarilgan naqshga o'xshab ko'rindi. Bu qirma *zamini muayyan* chuqurlikda chaka qilib chiqilib, gullar oralig'i qaytadan rang aralashmali ganch bilan to'ldiriladi. Uning yuzasi shuturgardon va andavada qirib chiqiladi. Natijada rangli tekis yuzali gullar hosil bo'ladi. Bunga «tekis yuzali qirma», deyiladi.

Relyefli qirmada tekis yuzali qirmani davom ettirib, gul va novdalarga o'yib, choka pardoz beriladi.

O'yma zaminini ko'zgu tashkil etgan ganch o'ymakorligining oynavandlik turini XIX asrda buxorolik Usta Shirin Murodov yaratgan. U birinchi bo'lib Sitorai Moxi Xosadagi «Oq uy» (Xonai safed)ni bezatdi (1913–1914-yillarda). U yerdagidagi ko'zguli o'yma ganch nafis ko'rinishga ega.

O'ymakorlikning bu turi boshqa turlardan oz mehnatu yuqori samaradorligi bilan ajralib turadi.

Ganch o'ymakorligida o'ymani yanada ko'rkmak qilish uchun o'yma zaminiga rang berishadi.

O'yma zaminiga rang berishning ikki yo'li bor:

1. Ganch suvoq ustidan 2 mm dan 5 mm gacha qalinlikda rangli ganch suvaladi. Keyin ustidan gul (oq ganch chiqquncha) o'yiladi. So'ngra u shundoq qoldiriladi yoki pardoz beriladi. Rangli ganch tayyorlashda quruq bo'yoqlar (pigmentlar)dan foydalaniladi.

2. Relyef o'yilgandan so'ng, yelim bo'yoq yoki moy bilan zamini mo'yqalamda bo'yab chiqiladi. O'ymani rangli bo'yoqlarda bo'yash, ayniqsa, XIX asrda juda keng tarqaldi.


**Chizma pardoz** – ganch yuzasiga tushirilgan naqsh nusxasining ustidan tirnab chizib chiqishdir. Tirnalgan joyining chuqurligi 2–3 mm atrofida bo'ladi. Chizma pardoz, ayniqsa, yorug' xonalarda qo'llaniladi.

Panjarasimon o'yma binodagi tokcha va tuynuklarni pardozlashda qo'llaniladi. Bu o'yma boshqa turlardan farq qiladi. Bunda o'yilayotgan ganch taxtaning ikkinchi tomonidan teshib, o'ziga xos pardoz beriladi.


Panjarasimon o'yma qadimdan qo'llanadi. Uning ajoyib namunalarini Varaxsha (XIII asr) binolarida, Shohi Zinda majmuasida (XIV asr), Mir Arab, Abdullaxon (XVI asr) madrasalarida ko'rish mumkin.

Panjarasimon o'yma naqshning tuzilishi o'simiksimon, geometrik va nishon tarzida bo'ladi. Muqimiy nomli teatr, Xalq amaliy san'ati muzeyi, «Moviy gumbaz» kafesi, metro stansiyalari va boshqa joylarda panjarasimon ganch o'ymakorligini ko'rish mumkin.

Ganch o'ymakorligida zanjira asosiy naqsh bilan hoshiya naqshni bog'lab turadi. Zanjira



Pardoz turlari.



Ganchni pax pardoz uslubida o'yish.



Ganchni to'la pardoz usulida o'yish.

namoyon, tokcha, eshik, deraza taxmonlari, izora (panel) va boshqa joylarning chetiga ishlataladi. U ramka vazifasini o'taydi. Zanjiraning eni 2–8 sm bo'ladi. Uning naqshi geometrik va o'simliksimon bo'ladi. Geometrik zanjira ko'proq qo'llaniladi. Zanjira sodda bo'lishiga qaramay, shakllari soya holida o'ziga jalg etadi.

Zanjiraning g'ishtin zanjira, arazlagan zanjira, chashmi bulbul, qo'sh zanjira va boshqa turlari bor.

Chuqur o'yma binolarning tashqi tomonini, katta xonalarini bezashda qo'llaniladi. O'ymasining chuqurligi 2–3 sm bo'ladi. Zaminga qarab, 45°–60° qiyalikda o'yiladi. Ularning chuqur yoki uncha chuqur bo'lmasligi o'ymaning hajmiga bog'liq. Chuqur o'ymalarga bo'yoq berish talab etilmaydi. Ba'zan umumiy qoli pga bitta rang berilishi mumkin. Chuqur qancha sayoz bo'lsa, naqsh shuncha kontrast ko'rindi. Agar o'yilayotganda yorug'lik tik tushsa, naqsh yarim soyali, mayinroq ko'rindi. Chuqur o'yma «yorug'-soya o'yiniga» boy va yaxshi ko'rindi.

Xalq amaliy san'ati turlari – zargarlik, ganch o'ymakorligi, misgarlik, kulolchilik, yog'och o'ymakorligi kabilarda buyumga oxirgi ishlov berish – jilolash, pardoz berishdan iborat. Ganch o'ymakorligida, umuman, 6 ta pardoz turi bor. Ular *qirma pardoz*, *chizma pardoz*, *pax (yoyma) pardoz*, *choka (yorma) pardoz*, *lo'la pardoz* va *tabaqa pardozlari*. Shundan to'rt xili (pax pardoz, lo'la, choka pardoz, tabaqa pardoz) relyefga pardoz berishda ishlataladi. Ulardan pax, choka va lo'la pardoz oddiy pardozga, tabaqa pardoz esa murakkab pardozga kiradi.

Tabaqa pardoz – «tabaqa» arabcha «qatlam», «daraja» degan ma'noni anglatadi. U XIX asrda Buxoro ustalari tomonidan yaratilgan bo'lib, barg, gulni ikki yoki uch qatlam qilib o'yishdan iborat pardoz texnikasi. Tabaqa pardoz yevropacha pardozga o'xshab ketadi. Tabaqa pardoz pardoz turlarining ichida eng murakkabi bo'lib, ustadan yuksak mahoratni talab etadi. Bu texnikani yaxshi o'zlashtirgan buxorolik ustalar naqsh o'ymalarining uncha chuqur bo'Imaganiga qaramay, ulardan naqshning hajmini kattalashtirib ko'rsatuvchi ajoyib jimjimalar hosil qiladilar. Usta Shirin Murodov bu pardozni juda ko'p qo'llagan.

Choka pardoz – (yorma pardoz) naqsh bandining qiyaligini o'rtaga olib, uzunasiiga o'yilgan pardoz turi. Uni Farg'ona vodiyining ustalari ko'p qo'llaydilar. Baland bo'Imagan uyldarda ko'p qo'llaniladi. Unda nur va soya yaxshi ko'rindi.

Pax pardoz – ganch o'ymakorligida o'yma naqsh relyefini bir tomonga qiyalatib kesiladigan oddiy pardoz turi. Bu pardoz «yoyma pardoz» deb ham yuritiladi. Ustalar pax pardoz zanjirani o'yish natijasida yuzaga kelgan, deydilar. Lo'la pardoz, choka pardoz, tabaqa pardozlarga qaraganda, pax pardozni o'yish ancha oson. Pax pardozlangan o'ymadagi nur va soya mayin ko'rinishga ega bo'ladi.

Pardozning bu turi ko'proq shifti baland mehmonxonalar va uyldarda qo'llaniladi. Hozirda turar joy va jamoat binolarini bezashda bu xil pardozdan keng foydalanilmoqda.

Lo'la pardoz – o'yma relyefiga yarim yumaloq shaklda ishlov berilgan oddiy pardoz. Ganch, yog'och, tosh va boshqa o'ymakorliklarda qo'llaniladi. Bu pardoz XIX asrdan boshlab qo'llanib, choka, pax va tabaqa pardozlar ichida eng yoshi hisoblanadi. Lo'la pardoz texnikasi kundaldan<sup>1</sup> keskin farq qiladi. Lo'la pardoz texnikasida o'yma fonini chuqurlashtirish va relyefni kesib olib tashlash bilan naqsh hosil qilinsa, kundalda fonnинг ustida bo'rtma hosil qilinadi.

## TAYANCH TUSHUNCHALAR:

**Qirma; Chizma pardoz; Panjarasimon o'yma;**  
**Lo'la pardoz; Choka pardoz; Tabaqa pardoz;**  
**Pax pardoz.**

### Savollar

1. Ganch o'ymakorligining qaysi turlarini bilasiz?
2. Zaminli va zaminsiz o'ymakorlik o'rtasida qanday farq bor?
3. Chizma pardoz deganda qanday pardozni tushunasiz?
4. Chuqur o'ymada qaysi pardoz turlarini qo'llash mumkin?
5. Relyefda, asosan, nechta pardoz turi qo'llaniladi?
6. Bir xildagi relyefga 4 xil pardoz qo'llanilsa, o'yma qaysi tomonlari bilan ajralib turadi?
7. Lo'la pardoz ko'pincha qaysi ganch o'ymakorligida foydalaniladi?

### Test savollari

1. *Lo'la pardoz berishda qaysi asbob ishlataladi?*  
A. Morpech qalam.  
B. Lo'lakash, pilta qalam va boshqalar.  
C. Pux qalam.

<sup>1</sup> Kunda1 – bo'rtma bezak turi.

- D. Sharafa qalam.  
E. Hamma asboblar.

2. *Qirma pardozi nechanchi asrlardan boshlab ishlataligan?*

- A. X asr.  
B. X–XI asr.  
C. XIX asr.  
D. XVI asr.  
E. III asr.

3. *Yassi o‘ymada o‘ymaning umumiy yuzasi necha foyizini egallaydi?*

- A. 70.  
B. 30.  
C. 30–60.  
D. 80.  
E. 40.

4. *Yirik o‘ymada relyefning chuqurligi necha sm bo‘ladi?*

- A. 4–5 sm.  
B. 8–9 sm.  
C. 5 sm.  
D. 2–3 sm.  
E. 4 sm.

5. *O‘yma zaminiga rang berishning necha yo‘libor?*

- A. 1 xil.  
B. 3 xil.  
C. 2 xil.  
D. 5 xil.  
E. 4 xil.

6. *O‘yma zamin qanday bo‘yoqlarda bo‘yaladi?*

- A. Akvarelda.  
B. Suvli bo‘yoqda.  
C. Moy bo‘yoqda.  
D. Yelim va moy bo‘yoqda.

7. *Qaysi pardozi turi arabcha «qatlam» degan ma‘noni bildiradi?*

- A. Zaminli pardozi.  
B. Pax pardozi.  
C. Lo‘la pardozi.

- D. Chizma pardozi.  
E. Tabaqa pardozi.

8. *Ganchkorlikda eng ko‘p ishlataladigan pardozi turi qaysi?*

- A. Qirma, choka, lo‘la, chizma.  
B. Choka, lo‘la, tabaqa, pax.  
C. Pax, choka, chizma, lo‘la.  
D. Tabaqa, pax, lo‘la, qirma.  
E. Qirma, chizma, choka, tabaqa.

9. *Oddiy pardozi turiga qaysilar kiradi?*

- A. Lo‘la va pax.  
B. Lo‘la va tabaqa.  
C. Pax va lo‘la.  
D. Tabaqa va choka.  
E. Choka va lo‘la.

10. *Pux qalam qanday vazifani bajaradi?*

- A. O‘yma zaminni tozalashda.  
B. Egri sirtlarni tekislashda.  
C. Yarim silindr sirtlar hosil qilishda.  
D. Relyeflarni yumaloq qilib kesishda.  
E. Ganch o‘yishda ishlataladi.

11. *Chuqur o‘yma ko‘pincha binoning qaysi qismida qo‘llaniladi?*

- A. Ishlatilmaydi.  
B. Ichida.  
C. Binoning tashqi qismida.  
D. Binoning yon qismida.  
E. Ichki va tashqi qismida.

## Adabiyot

1. Bulatov S. O‘zbek xalq amaliy bezak san‘ati, «Mehnat», T., 1991.
2. Bulatov S. Ganchkorlik. «O‘qituvchi» T., 1990.
3. Bulatov S. Ganchkorlik, naqqoshlik va yog‘och o‘ymakorligiga oid atamalar izohli lug‘ati. «Mehnat», T., 1991.
4. Bulatov S. Ganchkorlik (6-sinf). «O‘qituvchi», T., 1997.
5. Ремпель Л. Панжара. Архитектурные решетки и их построение, Т., 1957.

## ZANJIRA VA UNING TURLARI

Ganch o'ymakorligi kasbini o'rganish oddiy zanjira o'yishdan boshlanadi. Zanjira ganch o'ymakorligining alifbosi hisoblanadi. Zanjirani o'yishdan maqsad — dastlabki ganchkorlik asbobini to'g'ri ushslash, ko'zda chandalab to'g'ri chiziq chizish, yuzani tekis, bir xilda o'yishni o'rganishdir. Zanjiraning o'zi nima? Uning qanday turlari bor? Zanjira ganch o'ymakorligida nima uchun ishlatiladi? Uni bezakda qanday qo'llash kerak? Nihoyat, uni chizish va o'yishning qanday qoidalari bor?


Zanjira — forscha «zanjir», degan ma'noni bildiradi. U kompozitsiyada asosiy naqsh bilan rutani bog'lab turadigan ingichka hoshiya — naqshdir. U oddiy shakllarning takrorlanishidan hosil bo'ladigan zanjirasimon naqsh. U zaminsiz o'yma naqshdir va ko'pincha handasiy bo'ladi. Ganchkorlik, yog'och, tosh, marmar va metall o'ymakorligida, naqqoshlik, kashtado'zlik, kulolchilikda ko'p ishlatiladi. Zanjiraning quyidagi turlari mavjud: *zanjira raftor (raftorsimon zanjira naqsh)*, *islimiylan zanjira (o'simliksimon naqsh elementlaridan tashkil topgan ensiz hoshiya naqsh)*, *aylanma zanjira (aylana shaklidagi zanjira turi)*, *ari zanjira (ari ini shakliga o'xshatib o'yilgan zanjira turi)*, *gul zanjira (gul shaklida o'yilgan ensiz, zaminsiz hoshiya naqsh)*, *jingalak zanjira (jingalak shaklidagi zanjirasimon naqsh)*, *lola zanjira (lola shaklidan tashkil topgan ensiz hoshiya naqsh)*, *qosh lola zanjira (lola shaklda o'yilgan ikki qator zanjira)*, *g'ishtin zanjira (eng oddiy zanjira turi bo'lib, g'isht shaklini eslatuvchi ensiz naqsh)* va boshqalar. Ko'pincha tasviriy san'at asarlarida hoshiya hosil qilish uchun ishlatiladi.

Yog'och, tosh, metall, ganch o'ymakorligida, naqqoshlik, zardo'zlik, kashtachilikda murakkab bo'lmagan geometrik yoki o'simlik-simon elementlardan tashkil topgan guldar ensiz hoshiyani ko'rish mumkin. Uni ham «zanjira» deb ataydilar. Zargarlikda zanjira zarbaldoqqa, qashqarbaldoqqa qilsimon simdan ishlanadi.


Misgarlikda har xil narsalarga zanjira tushiriladi. Kulolchilikda lagan, kosa, ko'za, xum va boshqa idishlarga har xil zanjiralar ishlatiladi. Kulolchilikda zanjiraning quyidagi turlari bor: rohi zanjira, tumorcha zanjira, zulma zanjira, qanot zanjira, karniz zanjira, zuluk zanjira, koptok

zanjira, kulcha zanjira, gandum zanjira, jingalak zanjira, ilmoq zanjira, g'ildirak zanjira, qo'chqor zanjira, kapalak zanjira, zanjirai islumi, chor yaproq va boshqalar.


Zanjira sodda bo'lsa-da, jozibali ko'rinishiga ega. Geometrik shakllar o'yilganda soya, yorug' va yarim soyalar o'ziga xos nafis ko'rinishiga ega bo'lib, kishida ajoyib taassurot hosil qiladi. Zanjiradagi soya, yorug' va yarim soyalar juda chiroyli ko'rinati, o'yilgan zanjira go'yo harakat qilayotgandek tuyuladi. Ganch o'ymakorligida namoyon, tokcha, eshik, deraza, taxmonlar va boshqa joylarning chetiga ishlatiladi. Ganch o'ymakorligida ustalar har bir o'ymani, masalan, namoyon, tokcha, izora va boshqalarni uzoqdan va yaqindan yaxshi ko'rinishini hisobga olgan holda o'yadilar. Shuning uchun ham yaxshi ganchkorlik asari har xil masofadan jozibali ko'rindi. Bu o'rinda zanjira katta rol o'ynaydi. Zanjira uzoqdan o'yma naqshning umumiy bog'lovchisi vazifasini bajarib, namoyon, tokcha va boshqalarning go'zalligini oshiradi. Tokcha, taxmonlarning umumiy ko'rinishida o'yma zanjira katta ahamiyatga ega. Yaqindan esa o'yma zanjira elementlari yorug' — soyaning har xil o'zgarishlari sharoitida yanada o'zgacha ko'rinish hosil qiladi. O'ymalarning chetida qo'llashda zanjira juda yirik olinsa, o'ymani ko'rimsiz holatga olib kelishi mumkin. Agar juda mayda olinsa, o'yma zanjira ko'rinnay, oddiy chiziqqa o'xshab qoladi va ishlangan o'yma yaxshi ko'rinnaydi. Shuning uchun ham o'ymanning chetiga zanjira tanlashda yangilishmaslik kerak. Zanjiraning eni ganch o'ymakorligida 8 santimetrgacha bo'ladi. Zanjiralarning tuzilishi va mazmuniga qarab, ularga *g'ishtin zanjira*, *yakka zanjira*, *porsul zanjira*, *aylanma zanjira*, *yelpig'ich zanjira* va boshqa nomlar beriladi. Zanjiraga nom qo'yishning o'ziga xos qoidalari bor. Agar bir qator zanjira bo'lsa, unga «yakka zanjira» deyiladi, agar ikki qator bo'lsa, unga «*qo'sh zanjira*», *yelpig'ich* ko'rinishida bo'lsa «*yelpig'ich zanjira*» deyiladi. O'yilgan oddiy zanjira bo'lak yuzlarining o'rtalariga yakka chizilsa, bu zanjira «chashmai bulbul zanjira» deb yuritiladi va hokazo. «Chashmai bulbul zanjira» haqida xalq orasida bir rivoyat bor.




Zanjira turlari.





Qolip.







Zanjira turlari.






Murakkab  
zanjira.



G'ishtin zanjira.



Yelpig'ich zanjira.



Gul zanjira.

O'tgan zamonda bir podshoning xushro'y qizi bo'lgan ekan. U misgarning o'g'lini sevib qolibdi. Bu voqealga ovoza bo'lib, podsho darg'azab bo'libdi-da, yigitning otasini zindonga tashlatibdi. Yigit esa kunu tun iztirobda yangi naqsh ishlabdi. Nihoyat, kumush barkash hoshiyasiga otasini bandi etgan zanjirning tasvirini naqshlabdi. Misgarning o'g'li shoh irodasiga shak keltirdi, deb podsho yigitning boshini tanidan judo etishni buyuribdi. Shunda bir donishmand usta yigit naqshlagan barkashni saroya keltiribdi. «Shohim, debdi donishmand, yosh yigitning bir qoshiq qonidan keching. U zanjir halqasi ichida bulbulning ko'zini tasvirlamoqchi bo'lgan ekan. Lekin yasovullar uni sudrab kelishgan. Shu sababli bola paqir bunga ulgurolmay qolgan». U shunday debdi-yu, zanjira halqalari orasiga nuqtalar qo'yib chiqibdi. Naqsh xuddi bulbulning ko'ziga o'xshab qolganini ko'rgan podsho yigitni ozod etibdi. Shu-shu bu naqshni «chashmai bulbul zanjira» deydigan bo'lishibdi»<sup>1</sup>.

Zanjirani o'yishga o'tishdan avval, uni chizish qoidalarini o'rganib olish kerak. Buning uchun albomga oddiy g'isht ko'rinishidagi zanjira chizishni mashq qilib o'rganing.

Endi ganchkorlikda ko'p qo'llaniladigan ganch taxtasi quyishga o'tamiz. Avval stol ustiga oyna yotqizib, ustiga uzunligi 60 sm bo'lgan reykalarini kerakli o'lchamda (masalan, 20:20, 20:30, 30:30, 25:25 va hokazo) qo'yib olamiz. Bu ramka ganch taxtasi quyish uchun qolip rolini bajaradi. Qolip tayyor bo'lgandan so'ng xovonda tayyorlashga o'tamiz. Xovonda gul o'yishga mo'ljallangan bo'lib, kuchi kamaytirilgan ganch qorishmasidir. Xovonda tayyorlash uchun avval kerakli miqdorda ganch (yoki gips, aleastr) elakdan (g'alvirdan emas) o'tkaziladi. Xovonda tayyorlash uchun uch nisbatda suv, ikki nisbatda ganch qorishtiriladi. Gul o'yish uchun xovondani taxminan necha marta aylantirish kerakligini bilib olish kerak. Ganch quvvatini aniqlash uchun yarim stakan suvga ganch solib, 50 marta aylantirib, ganch taxtasi quyiladi, keyin esa skalpelda o'yib ko'rildi. Agar o'yishda ganch taxta qattiq bo'lsa, ikkinchi qorganimizda 100 marta, yana qattiq bo'lsa 300 marta, hattoki 900 marta aylantirish talab qilinadi. Lekin hozir kuchli ganchlar kam. Quvvati past, sifatsiz ganch juda ko'p aylantirib yuborilsa, u ishdan chiqadi, ya'ni ganch qotgandan so'ng, salga uvalanib, sinib ketadigan, mo'rt bo'lib qoladi. Ba'zi kuchli ganchni kam

aylantirsak, tayyorlangan ganch taxtani skalpel o'y may, sinib ketishi mumkin. Ganch quvvatini (gul o'yish uchun suv bilan ganchni necha marta qorishtirish nisbatini) aniqlab olgandan so'ng, ganch taxtaga mo'ljallab xovonda tayyorlanadi.

Plastmassa chelak yoki sirli tog'oraga kerakli miqdorda suv solinadi, suv sirtiga elangan ganch o'ng qo'lda oz-ozdan solib turiladi, ganch suv bilan yaxshi qorishishi uchun chap qo'l panjalari bilan ezb aylantiriladi. Agar yaxshilab ezib aylantirilmasa ba'zi ganchlar suvda erimay qolib, gul o'yayotganda qiyinchilik tug'diradi. Ganch taxminan 2–3 minut, masalan, 100 marta aylantirilgandan so'ng, suyuqroq qaymoqqa o'xshab quyula boshlaganda ramkaga, ya'ni qoli pgaquyiladi. Ganch quyishda ikkinchi kishi qoli pni ushlab tursa, reykalar surilib ketmaydi. Quyib bo'lgandan so'ng, ganchning ustti chizg'ichga o'xshash reykada tekislanadi. Quyilgan ganchning qalinligi taxminan 2 sm atrofida bo'lgani ma'qul. Quyilgan ganch 10–20 minutdan so'ng qotadi. Shundan so'ng ehtiyyotkorlik bilan ramkalarni olib tashlab, ganchning notejis joylarini skalpelda to'g'rilab, oynadagi ganch taxtasi sirtiga asta-sekin oddiy zanjirani chizamiz. Shundan so'ng skalpel yordamida o'yishga o'tamiz. Skalpeli o'ng qo'lda ushlab, chap qo'lingiz yordamida rasmida ko'rsatilganidek qilib o'yib chiqing. Zanjira o'yayotganiningizda ganch taxta atrofida aylanib o'ymasdan, balki bir joyda turib o'yishni o'rganing. Zanjirani o'yishda bir xil chuqurlikda o'yishga va o'yilgan qirralarning bir tekis chiqishiga alohida e'tibor berish kerak. har bir qirraning kesishgan chiziqlari bitta nuqtada tutashishi natijasida piramidalar hosil bo'ladi. Ayniqsa, o'ymaning qirrali bo'lishiga e'tibor bering. O'ymani bir kunda tugata olmasangiz, ertasiga davom ettirishingiz ham mumkin. Buning uchun ganch taxtani ho'l latta bilan o'rab, sellofan paketga solib qo'ysangiz, u bir necha kun qotmasdan turadi. Keyin bemalol o'yishni davom ettirishingiz mumkin.

**Mashq:** Yelpig'ich zanjira, aylanma zanjira, gul zanjira va boshqa zanjira turlarini chizish va o'yish.

**Texnika:** qora qalamda chizish, ganchni o'yish.

**Material:** qog'oz, ganch yoki gips.

**O'lcha:n:** 20:20 yoki 30:30 o'lchamlar olinadi.

<sup>1</sup> Qarang: Usmonov M. San'atim – saodatim: «Yosh gvardiya», T., 1983, 40-bet.

### *Bajarish bosqichlari:*

1. Zanjira kompozitsiyasini chizish.
2. Zanjira axtasini tayyorlash.
3. 20:20 yoki 30:30 o'lchamda ganch taxta tayyorlanadi.
4. Naqsh nusxasi ganch taxtaga tushiriladi.
5. Zanjira o'yiladi.
6. Zanjiraga pardoz beriladi.

### **TAYANCH TUSHUNCHALAR:**

Lola zanjira; Yelpig'ich zanjira; Islimiylar zanjira; Aylanma zanjira; Gul zanjira; Jingalak zanjira.

#### **Savollar**

1. Zanjira nima?
2. Qaysi amaliy san'at turlarida zanjira ishlataladi?
3. Amaliy san'at turlarida ishlataladigan zanjiralar qaysi tomonlari bilan bir-biridan farq qiladi?
4. Zanjira o'yishda qanday qoidalarga rioya qilish kerak?
5. Zanjira kompozitsiyalar yaratishning qanday usullari bor?
6. Gul zanjirani doskada chizib bering.
7. Yelpig'ich zanjirani tuzilishini tahlil qilib bering.
8. Binolarni bezatishda zanjira qayerlarda ishlataladi?

#### **Test savollari**

1. *Zanjira naqshining vazifasi nimadan iborat?*
- A. Kompozitsiyada asosiy naqsh bilan rutani bog'lab turuvchi ingichka hoshiya vazifasini bajaradi.
- B. Chiroy beruvchi.
- C. Naqshga joziba beruvchi.
- D. Shakl beruvchi naqsh.
- E. Kompozitsiyada asosiy bog'lovchi vazifasini o'tovchi islimiylar naqsh.

2. «Zanjira» atamasi qanday ma'noni bildiradi?
- A. Halqa (arabcha).
- B. Zanjir (o'zbekcha).
- C. Doira.
- D. G'isht (turkcha).
- E. Novda (forscha).

3. *Zanjira naqsh qaysi amaliy san'at turlarida ishlataladi?*
- A. Yog'och o'ymakorligida.
- B. Ganchkorlikda.
- C. Hamma turlarida.
- D. Faqat ganchkorlik va zardo'zlikda.
- E. Ganchkorlik, naqqoshlik, yog'och o'ymakorligi, zardo'zlik va boshqalarda.

### *4. Ari ini shakliga o'xshatib o'yilgan zanjiraning nomi?*

- A. G'ishtin zanjira.
- B. Yelpig'ich zanjir.
- C. Ari zanjira.
- D. Jo'ja zanjira.
- E. Gul zanjira.

### *5. Gul zanjira – bu...*

- A. Ari iniga o'xshatib o'yilgan zanjira.
- B. Barg ko'rinishidagi zanjira.
- C. Novda ko'rinishiagi zanjira.
- D. Gul shaklida o'yilgan zanjira.

### *6. Qo'sh zanjira nima?*

- A. Bir qatorli zanjira.
- B. Ikki qatorli zanjira.
- C. Uch qatorli zanjira.
- D. Ikki va uch qatorli zanjira.
- E. Gulli zanjira.

### *7. Ganch o'ymakorligini o'rganish nima uchun zanjiradan boshlanadi?*

- A. Chamalab o'yishni o'rganish uchun.
- B. Geometrik naqshligi uchun.
- C. Oddiyligi uchun.
- D. Murakkabligi uchun.

### *8. Zanjira uchun ganch necha qatlam qilib quyiladi?*

- A. 3.
- B. 2.
- C. 1.
- D. 4.
- E. 1,5.

### *9. Hozirda zanjirani o'yishda qaysi asbobdan foydalilanadi?*

- A. Iskanadan.
- B. Pichoqdan.
- C. Minqordan.
- D. Skalpeldan.
- E. Shuturgardondan.

### *10. Zanjira naqsh qaysi o'yma turiga kiradi?*

- A. Zaminli o'yma.
- B. Rangli o'yma.
- C. Zaminkor o'yma.
- D. Zaminsiz o'yma.
- E. Turli o'yma.

*11. Zanjirada to'la pardoz ishlatsa bo'ladimi?*

- A. Yo'q.
- B. Ha.
- C. Ba'zida.
- D. Ayrim hollarda.
- E. Katta zanjirada.

B. O'yish va pardoz berishda.

C. Kompozitsiya chizish, zanjira axtasini tayyorlash, ganch taxta qo'yish, o'yish va pardoz berishda.

D. Ganch taxta qo'yish, o'yish va pardoz berishda.

E. Yetti bosqichda.

*12. Namoyon kompozitsiyada ko'pincha zanjira nima o'mida ishlataladi?*

- A. Gul.
- B. Hoshiya.
- C. Gul.
- D. Barg.
- E. Ramka.

*15. Zanjira bo'yaladimi?*

- A. Ba'zida.
- B. Yo'q.
- C. Ha.
- D. Ayrim hollarda.
- E. Ko'pincha.

*13. Zanjira o'yma namoyonga nisbatan yirik bajarilsa ...*

- A. Chiroyli bo'ladi.
- B. Ko'rinish buziladi.
- C. Ramkasi yanada ochiladi.
- D. Dabdabali ko'rinish beradi.
- E. Nafis bo'ladi.

### Adabiyot

1. Bulatov S. O'zbek xalq amaliy bezak san'ati. «Mehnat», T., 1991.
2. Bulatov S. Amaliy san'at qisqacha izohli lug'ati. T., 1990.
3. Ganchkorlik. (6-sinf uchun o'quv qo'llanma) «O'qituvchi», T., 1997.
4. O'zbek sovet ensiklopediyasi. T., 1971-1987.
5. Ремпель Л. Архитектурный орнамент Узбекистана. Т., 1961.

*14. Zanjira qaysi bosqichda bajariladi?*

A. Kompozitsiya chizish, o'yish va unga pardoz berishda.

## ODDIY NAQSH NAMUNALARINI O'YISH VA PARDOZLASH

Biz o'nta naqsh namunasini oddiydan murakkabga qarab qalamda mashq qilgan edik. Endi xuddi shu: «Bargli zanjira» (1-gul), «Yak raftor» (2-gul); «Bargli raftor» (3-gul), «Bargli islimi» (4-gul), «Aylana islimi» (5-gul), «Gulli raftor» (6-gul), «Qo'sh mehrobli islimi» (7-gul), «Bofta islimi» (8-gul), «Patnis gul (islimi) 9-gul), «Shukufta islimi» (10-gul) naqshlarni o'yishni va padozlashni o'rganamiz.

Dastlab naqsh namunalari avvalgi o'lchamga nisbatan ikki marta kattalikdagi qog'ozda chiziladi. Shundan so'ng shu o'ymani bajarish uchun kerakli materiallar to'plab olinadi. Ya'ni, ganch xovonda tayyorlash uchun idish-tovoqlar, ganch elash uchun elak, qolip, o'yma asboblar va boshqalar hozirlanadi. Shundan so'ng oddiy naqsh namunalari bajarishga o'tamiz. Oddiy naqsh namunalari o'yish va padoz berish quyidagi tartibda amalga oshiriladi.

1. Ustaxonada ganch o'yish uchun stol ustiga oyna qo'yiladi.

Bu oyna ganch quyish uchun tekis va qulaydir.

2. Oynaning ustiga qolip reykalari kerakli o'lchovda qo'yiladi.

3. Qolip yuzasiga moslab xovonda tayyorlanadi.

4. Xovonda ganch qolipa quyiladi, ganch taxminan 1,5 yoki 2 sm qalinlikda bo'ladi.

5. Xovonda bir oz qotgandan so'ng, ganch taxta qoli pdan ajratib olinadi. Shundan so'ng taxtaning notejis joylari, cheti va yonlari skalpela qirib, tekislanadi.

6. Ganch taxta ustiga katak daftarcha yoki albomga chizgan naqsh namunasi qora qalamda yoki siyohli qalamda ikki barobar kattalashtirib tushiriladi.

7. Ganch taxta sirtidagi chiziqlar o'chib ketmasligi uchun skalpel uchida chiziq ustidan tirnab chizib chiqiladi.

8. O'yma zaminini o'yishdan avval yarim marg'ula, gajak va novdalarning atrofi o'yib chiqiladi hamda naqsh zamini iskanada qirib tekislanadi.

9. O'qituvchi ko'rsatmasi bo'yicha o'yma

naqsh bo'rtmasiga kerakli padoz turi beriladi.

Avvalgi darslarimizda relyefga to'rt xil — pax padoz, choka padoz, lo'la padoz va tabaqa padoz berilishi aytib o'tilgan edi.

1—4-gullar ikki qatordan, qolgan gullar bir martadan o'yib o'rganiladi.

Oddiy naqsh namunalari o'yish va ularga padoz berish mashqlari quyidagi tartibda bajariladi:

1-mashq. Bargli zanjira (1-gul) namunasini o'yish va padozlash.

a) ganch taxta quyish;

b) ganch taxta yuziga naqsh namunasini siyohli qalamda chizish;

v) jarrohlik pichog'ida zanjirani o'yish;

g) padozlash.

2-mashq. Pechak islimi (2-gul) namunasini o'yish va padozlash.

a) ganch taxta quyish;

b) ganch taxta yuziga naqsh namunasini siyohli qalamda chizish;

v) jarrohlik pichog'ida naqsh chiziqlarini tirnab chizib chiqish;

g) naqsh zaminini o'yish;

d) naqsh zaminini tekislash;

e) relyefga padoz berish;

j) 3—10-gullar 2-gulni bajarish bosqichlari asosida bajariladi.

3-mashq. Bargli raftor (3-gul) namunasini o'yish va padozlash.

4-mashq. Bargli islimi (4-gul) namunasini o'yish va padozlash.

5-mashq. Aylana islimi (5-gul) namunasini o'yish va padozlash.

6-mashq. Mehrob islimi (6-gul) namunasini o'yish va padozlash

7-mashq. Qo'sh mehrobli islimi (7-gul) namunasini o'yish va padozlash.

8-mashq. Bofta islimi (8-gul) namunasini o'yish va padozlash.

9-mashq. Patnisgul islimi (9-gul) namunasini o'yish va padozlash.

10-mashq. Islimi shukufta islimi (10-gul) namunasini o'yish va padozlash.



a




b



c



d




e




f



g




h



i



Oddiy naqsh namunalarining o'ymasi:  
 a) 1-gul, b) 2-gul, c) 3-gul, d) 4-gul, e) 5-gul, f) 6-gul,  
 g) 7-gul, h) 8-gul, i) 9-gul, j) 10-gul.



O'yma bosqichlari:

1. Ganch yuzasiga tushirilgan naqsh chegara chiziqlarini shuturgardonda o'yish.
2. Shuturgardonda naqsh zaminini o'yish.
3. Minqor yordamida zaminni qirib tekislash.
4. Shuturgardonda naqsh bo'rtiqlariga pardozi berish.



Oddiy naqsh  
kompozitsiyasini  
o'yish  
bosqichlari.

## Savollar

1. Naqsh namunalarini kattalashtirib chizishda nimalarga e'tibor berish kerak?
2. Ganch taxta qanday quyiladi?
3. Naqsh namunalarini o'yishda nimalarga e'tibor berish kerak?
4. 2-gul bilan 9-gul o'rtasidagi farq nimada?
5. Naqshlardagi ravonlik, tabiiylik va nisbiylik deganda nimani tushunasiz?
6. «Naqshlarning nomlanishi» deganda nimani tushunasiz?
7. Murakkab naqsh elementlari nomini aytib bering.
8. Oddiy naqsh namunalarini chizishda, asosan, nimalarga e'tibor berish kerak?

### Test savollari

1. *Bargli zanjira bilan shukufa islimiyl naqshlarining bir-biridan farqi nimada?*
  - A. Oddiyligida.
  - B. Elementlarining kichkinligida.
  - C. Elementlarining yirikligida.
  - D. Naqshlarining rangida.
  - E. Murakkabligida.
2. *Naqshlarni o'yishdan avval zamin o'yildimi yoki relyesga pardoz beriladimi?*
  - A. Naqsh chiziladi.
  - B. Ganch taxta qo'yiladi.
  - C. Naqsh tushiriladi.
  - D. Zamin o'yiladi.
  - E. Pardoz beriladi.
3. *Oddiy naqsh namunalarini o'yishda ganch taxta qalinligi necha sm qalinlikda quyiladi?*
  - A. 2,5 sm.
  - B. 1,5 sm yoki 2 sm.
  - C. 2,3 sm.
  - D. 2,6 sm.
  - E. 4 sm.
4. *Naqsh zaminini qanday o'yiladi?*
  - A. Naqsh gullari o'yiladi.
  - B. Naqshning cheti o'yiladi.
  - C. Marg'ula, gajak va noydalarning atrofi o'yib chiqiladi.
  - D. Naqsh novdalarining atrofi o'yiladi.
  - E. Shukuftalar atrofi o'yiladi.
5. *Oddiy naqsh namunalarida qaysi pardoz turlari bajariladi?*
  - A. Pax pardoz, choka pardoz, tabaqa pardoz.
  - B. Choka pardoz va to'la pardoz.

- C. Lo'la pardoz va tabaqa pardoz.
- D. Choka pardoz va tabaqa pardoz.
- E. Barcha pardoz turlari.

### 6. *Bargli zanjira qaysi tartibda bajariladi?*

- A. Naqsh chiziladi va o'yiladi.
- B. Naqsh o'yiladi.
- C. Axta tushiriladi va o'yiladi.
- D. Ganch taxta quyiladi va o'yiladi.
- E. Ganch taxta quyiladi, ganch sathiga naqsh tushiriladi, zanjira o'yiladi va pardoz beriladi.

### 7. *Ganchni suv bilan aralashtirib xovonda tayyorlashdan avval nima qilinadi?*

- A. Naqsh chiziladi.
- B. Asbob-uskunalar tayyorlanadi.
- C. Xoka tayyorlanadi.
- D. Ganch elanadi.
- E. Ganch chelakka solinadi.

### 8. *Ganch taxta qaysi bosqichda quyiladi?*

- A. Gulganch quyiladi va naqsh chiziladi.
- B. Qoli pga tezganch, keyin gulganch quyiladi.
- C. Naqsh chiziladi va tezganch quyiladi.
- D. Tezganch quyiladi va yuzi latta bilan tekislanadi.

### 9. *Ganch taxta tayyorlashda latta nima uchun ishlataladi?*

- A. Ganchni bo'yash uchun.
- B. Ganchni qorish uchun.
- C. Tezganch yuzasini latta bilan tekislash uchun.
- D. Asboblarni tozlash uchun.
- E. Ish stolini tozalash uchun.

### 10. *Zaminni tekislash uchun qaysi asbobdan foydalaniladi?*

- A. Pichoqdan.
- B. Lattadan.
- C. Iskanadan.
- D. Oynadan.
- E. Paxtadan.

### 11. *O'yma relyeflarga pardoz berishda qaysi asbobdan foydalaniladi?*

- A. Lattadan va skalpeldan.
- B. Minqordan.
- C. Iskanadan.
- D. Shutugardondan.
- E. Skalpeldan.

*12. Oddiy naqsh namunalarining qaysi birida tanob elementidan foydalanylган?*

- A. 1–4-gullarda.
- B. 5–10-gullarda.
- C. 3–6-gullarda.
- D. 4–10-gullarda.

**Adabiyot**

1. **B u l a t o v** S. O'zbek xalq amaliy bezak san'ati. «Mehnat», T., 1991.
2. **B u l a t o v** S. Amaliy san'at qisqacha izohli lug'ati. T., 1990.
3. **Ganchkorlik.** (6-sinf uchun o'quv qo'llanma) «O'qituvchi», T., 1997.
4. **O'zbek sovet ensiklopediyasi.** T., 1971–1987.
5. **Р е м п е л ь Л.** Архитектурный орнамент Узбекистана. Т., 1961.

## KOMPOZITSIYA. ODDIY NAQSH KOMPOZITSIYALARI TUZHISH

**Kompozitsiya (mujassamot)** – lotincha «kompositio» so‘zidan olingen bo‘lib, to‘qish, tuzish, bir-biriga solishtirish, naqshni g‘oyasi, xarakteri va vazifasiga muvofiq uyg‘un hamda mutanosib joylashtirish, degan ma’noni anglatadi.

Naqqoshlik, ganchkorlik, kashtachilik va boshqa xalq amaliy san’ati turlarida kompozitsiya tuzishda simmetriyani, markaz topishni, bezaklarning takrorlanishi, bezakning dinamikligi, chiroylligi va tabiiyligi, ranglarning yorqinligi va uyg‘unligini hisobga olish kerak. Bulardan har birining o‘ziga xos qonun-qoidalari bor.

Ustalar chizadigan nusxalar o‘z xususiyatiga ko‘ra namoyon, turunj, kitoba, ruta, munabbat, la‘li, morpech, zanjira kabi maxsus kompozitsiyalarga bo‘linadi.

Ustalar har bir naqshning tuzilishi, xarakteri va falsafiy ma’nosiga qarab, ularga nom qo‘yadilar. Chunonchi, Toshkent ganchkorlik maktabining yirik namoyandası Mahmud Usmonov «San’atim-saodatim» risolasida naqsh kompozitsiyalari nomini birma-bir sanab o‘tar ekan: «xashti tufson, sarnig‘on, tufsoni qanot, turna qanot, xonagi bo‘rtma, xashti davra, chorsor davra yulduz, mashdona, parrak, oftoba, lola islimi, bofta islimi, erkin islimi, turunj, bandi rumiy, islimi guldon, islimi madohil, lo‘la hoshiya» va boshqa atamalar mavjud, deb qayd qiladi.

**Kompanovka** (joylashtirish) – chizish kerak bo‘lgan naqshni yoki biror tasvirni qog‘oz, ganch, faner yoki biror yuzaga to‘g‘ri joylashtirish.

**Simmetriya** – grekcha bo‘lib, o‘lchovlarning bir-biriga mutanosibligidir.

**Ritm** – naqsh elementining ma’lum masofada bir tekisda takrorlanib kelishi bo‘lib, naqshdagagi harakatning uzluksiz va go‘zal ko‘rinishini ta‘minlaydi.

**Asimetriya** – kompozitsiyada simmetrik muvozanatning buzilishi.

**Stilizatsiya** – tabiatdagi o‘simplik, hayvon va boshqalarning tasviri, rangi, shakli va tuzilishini badiiy usulda umumlashtirish.

Naqsh kompozitsiyasini chizishda quyidagilarga:

– tanob yoki novda tagidan gul, bargni goldirib tasvirlash mumkin emasligiga;

- tanob bilan novdani farqlab tasvirlashga;
- taqsimda ortiqcha nusxa chizib qo‘ymaslikka;
- tanobdan hech qachon gul, novda, g‘uncha va boshqalar o‘sib chiqmasligiga;
- naqsh elementlarining nisbatini saqlashga;
- ganch o‘ymaga moslab naqsh kompozitsiyasi tuzishga;
- naqshning zichligiga;
- naqsh orasidagi zamin bo‘shliqlari nisbatini saqlash va hokazolarga amal qilish kerak.

O‘rgangan naqsh elementlarimiz asosida oddiy naqsh kompozitsiyalarini tuzamiz. Simmetrik naqshlar tuzmoqchi bo‘lsak, avval qog‘ozga taqsimlash asosida simmetrik to‘r chiziqlarni chizib olamiz. Naqshlarning takrorlanuvchi eng xarakterli qismi «taqsim» deb yuritiladi.

Taqsim naqqoshlikda naqshning ma’lum bir shaklda takrorlanuvchi qismi, bo‘lagi.

O‘rta Osiyo naqshlari o‘ziga xos xarakterga ega bo‘lib, naqshlarning deyarli hammasi takrorlanuvchi bo‘lakdan (qismdan) iboratdir. Shu taqsim sati «taqsim yuzi» deyiladi. Naqqoshlar naqsh chizishdan avval taqsim yuzini qog‘ozga belgilab, naqsh kompozitsiyasining bir qismini chizib, axtasini oladilar. Naqqosh bezatiladigan yuzaga shu axta yordamida naqshni takrorlab tushirib, to‘ldirib chiqadi va bezatadi. Taqsim kompozitsiyasining takrorlanuvchi qismi har xil bo‘ladi. Chunonchi, uchburchak, to‘rburchak, kvadrat va hokazo. Doira yoki gumbazga mo‘ljallangan naqsh taqsimiy kompozitsiya yuzining to‘rdan, oltidan, sakkizdan, o‘n ikkidan bir va hokazo qismlarini tashkil etib, taqsim doirasida yonma-yon takrorlanadi. Bunday taqsim «aylana taqsim» deb ataladi. Taqsim to‘g‘ri chiziq bo‘yicha takrorlansa, «to‘g‘ri taqsim» deb yuritiladi. Taqsim to‘g‘ri va oyna shaklida almashinib takrorlansa, unda «chopurost taqsim» deyiladi. Ganch o‘ymakorligida taqsimning o‘zi chizib olinsa bo‘ldi. Keyin shu taqsim bo‘yicha muayyan naqsh kompozitsiyasining axtasini bemalol tayyorlash mumkin.

Kompozitsiya chizishni yaxshilab o‘rganib olish uchun naqsh kompozitsiyalaridan bir nechta chizib, mashq qilinadi. Chizilgan kompozitsiyalarning eng yaxshisi tanlab olinadi. Zanjiralardan birini hoshiya tariqasida qo‘llash ham mumkin.

Agar zanjira qilmasangiz chetidan, albatta, ramka qoldiring. Ramkasiz naqshni bezalmagan uuga o'xshatish mumkin.

Tuzilgan naqsh kompozitsiyasini kalka (shaffof) qog'ozga ko'chirib, axta (ulgi) tayyorlanadi.

Axta – naqsh yoki biror rasmni shaffof qog'ozga chizib, chiziq yo'llarini igna bilan teshib, buyum yuziga tushirish uchun tayyorlangan andaza (99-rasm). Xorazmda «ulgi», Buxoroda «so'zan» deb yuritiladi. Ilk davrlarda ustalar buyum yuziga yoki naqsh chiziladigan sirtga tasvirni to'g'ridan-to'g'ri chizib, o'yib, naqsh ishlay bergenlar, keyinchalik axta orqali tasvir tushirish qulayligini bilib, undan foydalana boshlaganlar.

Naqqoshlar, ganchkorlar, yog'och o'ymakorligi ustalari va boshqalar naqsh kompozitsiyalarining andazasini yillar davomida saqlab kelganlar. Bu esa xohlagan vaqtida ulardan foydalanish, zarur bo'lsa uni takomillashtirish imkonini berar edi. Bu axtalar otadan bolaga meros bo'lib qolardi. Ustalar axtani maxsus sandiqlarda saqlab kelganlar. Ba'zi axta namunalari davlat arxivlarida saqlanib kelinmoqda. Masalan, mashhur ganchkorlar: Usta Shirin Murodov, Toshpo'lat Arslonqulov, naqqoshlar: T.To'xta-xo'jayev, Jalil hakimov va boshqalar tayyorlagan axtalar arxivlarda saqlanmoqda. Axtani tayyorlash uchun shaffof qog'oz naqsh kompozitsiyasiga moslab simmetriya o'qi bo'yicha ikkiga, to'rtga va hokazoga buklahadi. Buklamaning bir qismiga naqsh chiziladi. Naqshli shaffof qog'oz yupqa yostiqcha ustiga qo'yiladi va naqsh chiziqlari ustidan igna bilan teshib chiqiladi. Naqshning yirik va maydaligiga qarab igna tanlanadi. Ignan bilan teshiladigan teshiklarning oralig'i naqshning mayda va yirikligiga bog'liq bo'ladi. Agar naqsh mayda bo'lsa, igna oralig'idagi masofa yaqin bo'ladi va, aksincha, naqsh yirik bo'lsa, teshiklar oralig'i masofasi katta bo'ladi. Naqsh nusxasi igna bilan teshib bo'lingandan keyin, shaffof qog'oz yoyib yuboriladi, natijada axta hosil bo'ladi. Tayyor bo'lgan axtani ish yuzasiga qo'yib, ustidan xoka urib va bosib yurgizib chiqiladi. Natijada naqsh nusxasi ish yuzasiga ko'chiriladi. Ganch taxta tayyor bo'lgandan so'ng, uning ustiga naqsh kompozitsiyasi axta va xoka yordamida tushiriladi yoki qo'l bilan qora qalamda to'g'ridan-to'g'ri chiziladi. Naqshning o'yiladigan chegara chiziqlari skalpelda tirmab kesib chiqiladi. Shunday qilinmasa ganchni o'yish jarayonida chiziqlar o'chib ketishi va o'yma

noto'g'ri o'yilishi mumkin. Naqsh zamini skalpelda o'yilib, chetlari iskana yordamida tekislab chiqiladi. O'yma relyefiga mos pardoz turi beriladi. Masalan, pax pardoz, choka pardoz, lo'la pardoz yoki tabaqa pardoz. Ayrim hollarda kompozitsiyada bir necha pardozni bir vaqtida qo'llash ham mumkin. Ishning so'ngida o'ymaning chetiga ishlangan zanjirani o'yib, pardoz beriladi. Uyingizda 87-betda berilgan naqsh kompozitsiyalaridan birini bajaring.

Mashq. Ruta kompozitsiya tuzish va o'yish.


Biz avvalgi darslarimizda oddiy naqsh namunalarini chizish, o'yish hamda ularga pardoz berishni o'rgangan edik. Bu mashg'ulotda esa ganchkorlikda ishlatiladigan naqsh elementlaridan foydalanib, oddiy ruta kompozitsiyasi tuzishni o'rganamiz. Chizgan kompozitsiyani o'yib, unga mos pardoz turini beramiz. Ruta kompozitsiyasini chizish va uni o'yishdan avval «ruta nima?» va «uning qanday o'ziga xos tomonlari bor?», degan savolga javob olishimiz lozim.

Ruta – ikki tomonga ulanuvchi naqsh taqsimi, ya'ni hoshiya naqsh (87-betda). Uning o'lchami ko'pincha 14-20 sm atrofida bo'ladi. hoshiya naqsh har xil bo'lib, uning mehrobga, xonaga ishlanishiga qarab, lo'la hoshiya, ishkomcha va boshqa turlari bo'ladi.


Hoshiya naqshlari deraza va eshikning qaddibastiga qarab, ensiz, enli, yupqa yoki qalin olinadi. Enli olinsa islimiy girihlardan foydalanish mumkin. Chizilayotgan naqsh nusxasining xarakteriga qarab, hoshiyalar ketma-ket to'nkarma usulda ulanishi mumkin. Naqqosh to'nkarma usulda takrorlanuvchi ruta chizayotganida taqsim asosini qog'ozga (ikki buklab) chizadi, axtani aylantirib, undan foydalanadi.

To'nkarma ruta kompozitsiyada bir yoki ikki, ba'zan uch chiqish nuqtasi, odatda, o'rtada bo'ladi (u bo'sh joylarni to'ldirishga xizmat qiladi). Ketma-ket ulanuvchi rutalar bir, ikki, uch yo'nalishli bo'lishi mumkin. har yo'nalishda bittadan chiqish nuqtasi bo'ladi. Ikki chiqish nuqtali rutalarda «aylantirma nusxa» deb ataladigan kompozitsiya ham uchraydi. Taqsim chegaralaridagi ikki chiqish nuqtasidan chiquchchi novdalar soat yo'liga o'xshatib, ikkinchi nuqtani bosib o'tadi, ya'ni ikki nuqtadan chiq-qan novdalar halqa hosil qiladi. To'ldiruvchi elementlar ham novdalarning o'mashgan joyiga moslab chiziladi.


Biz ruta kompozitsiyani o'rganishdan oldin uni chizish bosqichlarini yaxshilab o'rganib





Gulli girih kompozitsiyasi. Z.Bositxonov.







Simmetrik naqsh.




Taqsim.




Naqshlarning ritmik takrorlanishi.




Axta.




Kompozitsiya chizish bosqichlari.




**Madohili kompozitsiya.**




**Islimiya ruta. Z. Bositxonov.**



Ruta naqsh kompozitsiyasi.



Ruta. Usta Shirin Murodov kompozitsiyasi.



Munabbat kompozitsiyasi.



Ruta seraftor islimi.  
Usta Shirin Murodov.



Munabbat.



Davragul.

olishimiz kerak. Uni albom yoki alohida qog'ozga chizib, mashq qilamiz.

Ruta naqsh kompozitsiyasini chizishda simmetriyaga, naqsh elementlarining nisbatlariga, ularning ravonligiga va boshqalarga e'tibor berish kerak.

Belgilangan naqsh kompozitsiyasiga mo'ljallab ganch taxta quyiladi hamda ruta naqshining axtasi tayyorlanadi. Tayyorlangan axta ganch taxtaga tushiriladi va o'yiladi, so'ngra unga tegishli pardoz turi beriladi. Endi o'zingiz shu tariqa kompozitsiyalardan ijodiy foydalanib, mustaqil ruta naqsh kompozitsiyasini tuzing. Tuzgan kompozitsiyangizga mos ganch taxta quyib, naqshni o'ying hamda unga tegishli pardoz turini bering.

### Munabbat shaklidagi naqsh kompozitsiyasini tuzish va uni o'yish

Endi biz to'g'ri to'rtburchak (munabbat) shaklidagi naqsh kompozitsiyasi tuzish, o'yish va unga tegishli pardoz berishni o'rjanamiz. Bunday naqsh kompozitsiyasi kvadrat bo'lishi mumkin. Bundan tashqari, kvadrat va to'g'ri to'rtburchak ichidagi naqsh kompozitsiyasi hech tomonga ulanmaydigan oddiy naqsh kompozitsiya yoki har tomonga ulanuvchan munabbat naqshi ham bo'lishi mumkin. Xo'sh, munabbat naqsh turi nima?

Munabbat — arabcha «o'stirmoq» degan ma'noni anglatadi. Asosi kvadrat yoki to'rtburchakdan tashkil topib, to'rt tomonga takrorlanadigan naqsh taqsimi. Katta yuzalarni bezashda munabbatdan foydalaniladi. U O'rta Osiyo naqsh kompozitsiyasida ko'p qo'llaniladi. Naqqosh munabbatni chizishdan avval uning to'rtadan bir bo'lagini chizib olib, keyin axtasini tayyorlaydi. Munabbatning o'simliksimon, *geometrik va boshqa turlari bor. Uning munabbati mehrob, munabbati bofta, munabbati islami, munabbati girih* va boshqa atamalari mavjud.

Biz munabbat shaklidagi naqsh kompozitsiyasi tuzishni mashq qilish uchun, avvalo, munabbat shaklidagi naqsh kompozitsiyasini ko'rib chiqamiz va shu asosda uni chizamiz. Chizishda kompozitsiyaning biror takrorlanadigan ikkidan bir yoki to'rtadan bir qismini chizib olamiz. Keyin esa shu naqshning axtasini tayyorlaymiz. Ganch taxta quyib, ustiga axta yordamida naqsh nusxasini tushirib o'yamiz va unga tegishli pardoz beramiz.

## Davragul kompozitsiyasi tuzish va uni o'yish

Davragul ikki so'zdan iborat bo'lib, «davra», ya'ni doira va gul, ya'ni «doira ichidagi naqsh» ma'nosini anglatadi. Davragul — davra shaklidagi naqsh kompozitsiyasi keng tarqalgan kompozitsiya turlaridan biri.

Davragul asosan shiftning markaziga yoki devorga ko'p ishlatiladi. Bu naqsh turi tuzilishi jihatidan *islimi*, *handasiy (geometrik)* va boshqa naqsh turlaridan iborat bo'ladi. Ko'proq binolarning ichki va tashqi qismalarini bezashda ishlatiladi. Davragul kompozitsiyasi quyma va o'yma asosida ham ishlanadi. Biz hozircha faqat o'yma usuldag'i davragul kompozitsiyasi ishlashni o'rjanamiz.

Davragul kompozitsiyasi chizishdan oldin, bu naqsh binoning qayeriga joylashtirilishiga qarab, uzoqdan ko'rinishi uchun yirikroq, yaqindan ko'rinishiga ega bo'lishi uchun maydaroq naqsh tanlanadi. Davragul naqshi diametrikaniqlab olinadi. Albom varag'ida kichkina xomaki naqsh nusxalari bajariladi. Shulardan o'zingizga ma'qul tushgan xomaki rasm bo'yicha kattalashtirilgan davragul naqsh kompozitsiyasi bajariladi.

Buning uchun davragulning haqiqiy kattaligidagi diametrda aylana chizib olinadi va shu aylana to'rt, sakkiz, o'n, o'n ikkiga va hokazolarga bo'lib olinib, naqshning taqsimi aniqlanadi. Bu taqsim doirada yonma-yon takrorlanadi, ya'ni aylanma taqsimga naqsh kompozitsiyasi chiziladi.

Shu naqsh taqsimi bo'yicha uning axtasi tayyorlanadi. Ganch taxta quyilib axta yordamida naqsh nusxasi tushiriladi va o'yib pardoz beriladi.

## TAYANCH TUSHUNCHALAR:

Kompozitsiya; Kitoba; Ruta; Munabbat; Morpech; Taqsim; Axta (ulgi).

### Savollar

1. Kompozitsiya nima?
2. Kompozitsyaning qanday turlari bor?
3. Kompozitsiya tuzishda qaysi qoidalarga rioya qilish kerak?
4. Axta nima? U qanday tayyorlanadi?
5. Taqsim va uning qaysi turlarini bilasiz?
6. Ruta kompozitsiyasi qanday tuziladi?
7. To'rtburchak va munabbat kompozitsiyalari o'rtasida qanday farq bor?
8. Kompozitsiyada tanob va gul nima vazifasini o'taydi?

## *Test savollari*

### *1. Kompozitsiya – bu ...*

- A. Joylashtirish.
- B. Qurish.
- C. To‘qish, tuzish, bir-biriga solishtirish.
- D. Bo‘yash.
- E. Pardozlash.

### *2. Madohil naqshi qanaqa shaklda bo‘ladi?*

- A. Lola tasvirlangan geometrik shakl.
- B. Kvadrat naqsh.
- C. Geometrik shaklning bir turi.
- D. Chapu-rost takrorlanuvchi lolasimon naqsh turi.
- E. Uchburchak.

### *3. Epigrafika nima?*

- A. Chiroqli yozuv.
- B. Chiroqli naqsh.
- C. Geometrik naqsh.
- D. Ganch yozuv.
- E. Unvonli yozuv, bezakli yozuv.

### *4. Anorgul nima?*

- A. Anorgul tasvirlangan naqsh.
- B. Anor elementidan tashkil topgan kompozitsiya.
- C. Anor gullaridan tashkil topgan kompozitsiya.
- D. Oddiy geometrik naqsh.
- E. Naqsh elementi.

### *5. Ruta – bu ...*

- A. Namoyonning bir turi.
- B. Turunj naqshi.
- C. Ikki tomonga takrorlanuvchi naqsh.
- D. Girix turi.
- E. Madohili.

### *6. Ritm – bu ...*

- A. Naqshning bir necha bor takrorlanishi.
- B. Turunj naqsh turi.
- C. Go‘zallikning bir turi.
- D. Naqshning assimetrik ko‘rinishi.
- E. Naqsh, biror element yoki tasvirning ma’lum masofada bir tekisda takrorlanib kelishi.

### *7. «Aylanali islimi» deganda qanaqa naqsh tushuniladi?*

- A. Yarim aylanali naqsh.
- B. Doira shaklidagi geometrik naqsh.

C. Yoysimon naqsh.

- D. Doira, aylana shaklidagi mustaqil naqsh.
- E. Doira shaklidagi mustaqil naqsh.

### *8. Munabbat naqsh qanaqa naqsh kompozitsiyaniga kiradi?*

- A. To‘rt tomonga takrorlanuvchi naqsh turi.
- B. Oddiy naqsh turi.
- C. Doira naqsh.
- D. Bir-biriga mos kompozitsiya.
- E. Ikki tomonga takrorlanuvchi naqsh.

### *9. Assimetriya nima?*

- A. Naqsh elementi.
- B. Simmetriyaning aksi.
- C. Uzoqdan ko‘rinish.
- D. Bo‘rttirib ko‘rsatish.
- E. Stillashtirib ko‘rsatish.

### *10. «Lola hoshiya naqsh» deganda nimani tushunasiz?*

- A. Lola shaklidagi murakkab naqsh.
- B. Lolaga o‘xhatib ishlangan munabbat naqsh.
- C. Lolasimon geometrik naqsh.
- D. Lola shaklidagi tuzilgan oddiy hoshiyasimon naqsh.

### *11. «Xoka» ta’rifi qaysi qatorda to‘g‘ri ko‘rsatilgan?*

- A. Naqshga shakl beruvchi chiziq .
- B. Naqshni tushirish uchun qo‘llaniladigan qora yog‘och kukuni.
- C. Hoshiya naqshi.
- D. Handasaviy naqsh.
- E. Doira shaklidagi naqsh.

### *12. Axta bilan ulgining farqi nimada?*

- A. Tuzilishida.
- B. Chiroyligida.
- C. Farqi yo‘q.
- D. Naqshlarida.
- E. Rangida.

### *13. Naqsh kompozitsiyasi chizish va uni ranglashda kompyuterning qaysi grafik dasturlaridan foydalanish mumkin?*

- A. Word, Microsoft Exell, Flash.
- B. Microsoft Power Point.
- C. Microsoft Access, Qutlook Express.
- D. Corel Draw, Adobe Photoshop.
- E. Jamidan.

*14. Naqshda «taqsim» deganda nimani tushunasiz?*

- A. Naqshda eng xarakterli taqsimlanuvchan bo'lak.
- B. Xarakterli nuqta.
- C. Nusxa ko'chirish.
- D. Naqshning asosi.
- E. Joylashtirish.

### **Adabiyot**

1. **B o s i t x o n o v Z.** Ganchkorlik san'ati. G'.G'ulom nomli Adabiyot va san'at nashriyoti, T., 1978.
2. **B u l a t o v S.** O'zbek xalq amaliy san'ati. «Mehnat», T., 1991.
3. **Ремпель Л.** Архитектурный орнамент Узбекистана. Т., 1961.
4. **P r i s a I.** Toshkent ganchkorligi, O'zSSR Davlat badiiy adabiyot nashriyoti, T., 1960.
5. **Z a h i d o v P.** Me'mor olimi. T., 1996.

## NAMOYON KOMPOZITSIYASINI TUZISH VA O'YISH

Avvalgi darslarimizda oddiy ruta, to'rtburchak va doira kompozitsiyalar tuzish, o'yish va ularga mos pardoz turini berishni o'rgangan edik. Endi biz murakkabligi bilan farq qiladigan namoyon kompozitsiyani bajaramiz.

**Namoyonning o'zi nima?**

Namoyon – forscha «ko'rinish, manzara» demakdir. Namoyon murakkab etuk naqsh kompozitsiyasi. Namoyon voqelikning umum-lashgan tasviriy obrazini o'zida aks ettiradi. Namoyon kompozitsiyasida, masalan, chamanzor, bog'u bo'stonlar, daryolar, gullar, barglar va boshqalar ko'proq tasvirlanadi. Namoyon chetlaridagi hoshiya namoyonning badiiy ko'rinishida muhim rol o'ynaydi. Namoyon hech nimaga ulanmaydigan mustaqil kompozitsiyadir. Uning *o'simliksimon, geometrik, gulli girih, ramziy* va boshqa turlari mavjud. Namoyonni ishlashda ustalar uning uzoq va yaqindan ko'rinishini ham hisobga oladilar.

Namoyon islimiyl naqshdan iborat bo'lsa, unda uning band va tanoblari darajalarga bo'lib chiqiladi. Namoyonda girih asosiy, islimiyl naqsh esa to'ldiruvchi hisoblanadi. Namoyon girihsidan tashkil topgan bo'lsa, uni ham asosiy, ham to'ldiruvchi girihlarga bo'lish mumkin, ya'ni yirik giriqlar ichiga mayda giriqlar chiziladi.

Namoyon simmetrik va asimetrik tuzilishiga ega bo'ladi. XIX asrning o'rtalarida har bir vohaning namoyonlari o'ziga xos bo'lib, ular bir-biridan farq qilgan. Ular xarakterli naqsh uslubiga ega. Masalan, Xiva naqqoshligidagi namoyonlarda bandlar bir-biri bilan spiralsimon ulanib ketadi. Barg, gullar kam qo'llaniladi. Ularning kompozitsiyasi dinamik xarakterga ega bo'ladi. Toshkent ustalarining namoyon kompozitsiyalari o'ziga xos bo'lib, o'simlik va gullarning ko'pligi bilan ajralib turadi.

Farg'ona namoyon naqsh kompozitsiyalarida gul, barg, meva (lola, atirgul, bodom gul, majnuntol, anor va hokazolar) va boshqalar to'g'ridan-to'g'ri

tasvirlanadi. Ularning *mehrobi namoyon, chorsi namoyon serafor, shabaki namoyon, majnuntol namoyon* va boshqa atamalari bor.

Amaliy ishga o'tishdan avval namoyonning mavzusini aniqlab olamiz. Chunonchi, namoyoni Samarqand, namoyoni Buxoro, islimiyl namoyon, A.Navoiy, Ulug'bek, majnuntol, anor kabi mavzulardan biri tanlab olinadi. Masalan, «Go'ri Amir» mavzusidagi namoyonni olaylik. U quyidagi bosqichda bajariladi:

1. «Go'ri Amir» mavzusiga oid rasmlar jurnal, gazeta, kitob va boshqa manbalardan yig'iladi va yaxshilab o'rganiladi.

2. Shu mavzuga bag'ishlangan kompozitsiyalar chiziladi va ularidan eng yaxshisi tanlab olinadi.

3. Shu xomaki kompozitsiyaning haqiqiy kattalikdagi rasmini chizib, uning axtasi tayyorlanadi.

4. Ganch taxta tezganch va gulganch usuli bilan quyilib tayyorlanadi.

5. Ganch taxtaga naqsh kompozitsiyasi tushiriladi.

6. Kompozitsiya o'yib, unga tegishli pardoz turi beriladi.

7. «Go'ri Amir» mavzusidagi kompozitsiya kerakli joyga ilib qo'yiladi.

**Mashq.** Namoyon kompozitsiyasini tuzish va uni amalda bajarish.

**Texnika:** qog'ozga qalamda chizish, ganch taxtani jarrohlik pichog'ida va iskanada o'yish.

**Material:** ganch, gips yoki alebastr, qog'oz, shaffof qog'oz va boshqalar.

**O'lcham:** 50x50, 50x60, 80x40 va boshqalar.

**Rajarish bosqichlari:**

a) namoyon naqsh kompozitsiyasini chizish;

b) axta tayyorlash;

c) ganch taxta tayyorlash;


d) naqsh namunasini ganch taxtaga ko'chirish;

e) naqsh namunasini o'yish;


j) pardozlash.




Namoyon Usmon Ikromov kompozitsiyasida.




Gulli girih  
namoyoni.




Islimiy namoyon.



«Go'ri Amir» namoyoni.



Islimiyl namoyon.



Olti burchak shaklidagi islimiyl namoyon.

## TAYANCH TUSHUNCHALAR:

Namoyon; Mehrobiy; Tabaqa namoyon;  
Majnuntol namoyon.

### S a v o l l a r

1. Namoyon nima va uning qanday turlari bor?
2. Namoyon kompozitsiyasini bajarishning qanday qonun-qoidalari bor?
3. Kompozitsiyaga qanday nom qo'yiladi?
4. Namoyon binoning qayerlarida ishlataladi?
5. Biror mavzuga moslab kompozitsiya tuzishda qanday materiallar to'planadi? Namoyon kompozitsiyasida hoshiyani qanday qo'llash mumkin?

### Test savollari

1. «Namoyon» atamasining ma'nosi nima?

- A. Arabcha – ilon.
- B. Forscha – daraxt.
- C. Lotincha – gul.
- D. Forscha – ko'rinish, manzara.
- E. Arabcha – go'zallik.

2. Namoyonning qanaqa turlari bor?

- A. Islimiylar.
- B. Islimiylar, geometrik va boshqalar.
- C. Ramziy.
- D. Raqamlar, islimiylar, o'simliksimon, hoshiyali.
- E. Yoysimon va ovalsimon.

3. Namoyon chetiga qanaqa naqsh ishlanadi?

- A. Ruta.
- B. Zanjira.
- C. Munabbat.
- D. Girih.
- E. Aylana islimi.

4. Namoyonda qanaqa pardoz turlarini qo'llash mumkin?

- A. Lo'la pardoz, pax pardoz.
- B. Chizma pardoz.
- C. Choka pardoz.
- D. Pax pardoz.
- E. Hammasini.

5. Namoyonda geometrik naqsh bilan o'simliksimon naqshning qaysi biri asosiy hisoblanadi?

- A. O'simliksimon.
- B. Geometrik shakl.
- C. Hech qaysisi.

- D. Rang.
- E. Hammasi.

6. Namoyonlar qaysi jihatdan farqlanishi mumkin?

- A. Rangi.
- B. O'ymasi, pardozi.
- C. Naqshi, o'ymasi, mazmuni, pardozi va b.
- D. Ishlash texnikasi bilan.
- E. Rangi bilan.

7. Namoyonni necha usulda tayyorlash mumkin?

- A. O'yma usulida.
- B. Chizma usulida.
- C. O'yma va quyma usulida.
- D. Rang berish va o'yish usulida.
- E. Bo'yash usulida.

8. Namoyon bajarishdan avval nima tayyorlanadi?

- A. Eskizi.
- B. Ganch taxta.
- C. Eskiz va ganch taxta.
- D. Ganch taxta.
- E. Ramka.

9. Namoyon naqshida rangli ganch ishlataladimi?

- A. Yo'q.
- B. Ha.
- C. Faqat zanjirali.
- D. Har doim.
- E. Ba'zida va ayrim pardoz ishlarida.

10. Islimiylar namoyonda gulli girih bo'lishi mumkinmi?

- A. Yo'q.
- B. Ha.
- C. Ba'zida.
- D. Har doim.
- E. Markazida.

11. Namoyondagi humo qushining ma'nosi nima?

- A. Baxt.
- B. Erkinlik.
- C. Yovuzlik.
- D. Manmanlik.
- E. Kenglik.

12. Qaysi naqsh nomi arabcha so'z bo'lib, «oston, kirish, eshik» ma'nosini bildiradi?

- A. Namoyon.
- B. Madohili.

C. Ruta.  
D. Morpech.  
E. Idora.

*13. Namoyon kompozitsiyasida yordamchi tanob ishlataladimi?*

- A. Faqat islimiy naqshda.
- B. Girih naqshida.
- C. Yo‘q.
- D. Ha.
- E. Bo‘yashda.

**Adabiyot**

- 1. Зохидов П. Самаркандская школа зодчих. Т., 1965.
- 2. Ноткин И. Бухарская резьба по ганчу. Т., 1961.

- 3. Prisa I. Toshkent ganchkorligi. – Т., O‘zSSr Davlat badiiy adabiyot nash. 1960.
- 4. Ремпель Л. Архитектурный орнамент Узбекистана. Т., 1961.
- 5. Usmonov M. San’atim-saodatim. Т., 1983.
- 6. Bulatov S. O‘zbek xalq amaliy bezak san’ati. Т., 1991.
- 7. O‘zbekiston xalq san’ati. Muallif-tuzuvchilar Morozova A., Avezova N., Mahkamova S. G. G’ulom nomidagi Adabiyot va san’at nash., Т., 1979.
- 8. Bulatov S. Ganchkorlik, naqqoshlik va yog‘och o‘ymakorligiga oid atamalar izohli lug’ati. Т., 1991.
- 9. Yusuf Tovassliy. Hikmatlar xazinasi. Т., Navro‘z, 1994.

## ATAMALAR LUG'ATI

### A

**ADILAK** – ob tarozi, «shayton», yuzaning tekisligini aniqlaydigan asbob.

**ALEBASTR** – gipsning dag'alroq turi.

**ANDAVA** – suvoqchilikda qo'llaniladigan tekislash asbobi. Chaplangan loy ganch, sement ustidan yurgizib, yuzasini silliqlashda ishlatiladi. Asosan temirdan ba'zan yog'ochdan ham yasaladi. Uning uzunligi ko'pincha 30–40 sm, eni 8–10 sm, qalinligi 2 mm, keng va silliq uchi sal tor, ustida dastasi bo'ladi.

**ANDAZA** – o'lchov, ulgi; kiyim, poyabzal, buyum va b. tayyorlashda ularning qismlarini bichish uchun nuxsa ko'chiriladigan namuna. Qog'oz, karton, tunuka, charm va boshqa materiallardan shakliga aynan moslab qirqib olinadi.

**ANORGUL** – anor ko'rinishidagi islimiyl naqsh turi. Ba'zan anorning ichki qismi ham tasvirlanadi.

**APPLIKATSIYA** - q. *Quroq*.

**ARAQI** – devor bilan shift orasiga, eshik, deraza tepasiga ishlangan taxta hoshiya.

**ARRA** – yog'och, shox, suyak, sadaf, ganch, mis, temir va b.ni kesish asbobi; qattiq temir yoki po'latdan yasalgan. Ikki bo'lak – qirra tishli qism va dastadan iborat. Yasaladigan buyumlarning xillari hamda ishlab chiqarish talabiga muvofiq turli kasb egalari arraning bir qancha turlaridan foydalanadilar.

**ARRAGUL** – arrasimon shaklidagi naqsh nuri.

**ASBOB** – ish quroli; duradgorlik, o'yma-korlik, chilangarlik, kandakorlik, sartaroshlik, uy-ro'zg'or va b.da biror ish bajarish uchun foydalaniadi. Masalan, – pichoq, qaychi, qozon, tovoq, cho'mich va h.k. – uy-ro'zg'or asboblari; ustara, qayroq va h.k. – sartaroshlik asboblaridir.

**ASOSIY RANG** – tabiatdagi sariq, qizil, ko'k ranglar. Shu ranglarning bir-biriga muayyan miqdorda aralashtirilishi natijasida boshqa ranglar kelib chiqadi.

**ATIRGUL** – atirgul shaklidagi naqsh.

**AXTA** – (ulgi), naqsh yoki rasmni qog'ozga chizib, chiziq yo'llari igna bilan teshib tayyor-

lanadigan andaza. Naqshni yuzaga tushirishda ishlatiladi.

**AYLANA ZANJIRA** – aylana shaklidagi zanjira.

**AYLANA ISLIMIY** – yo'l ichida aylananing ma'lum masofada takrorlanishi natijasida hosil bo'lgan islimiyl naqsh turi.

### B

**BAND**, novda – islimiyl naqsh bo'lagi. Tabiatdagi o'simliklar novdasi tasviri.

**BARG** – o'simlik bargaining badiiy ifodasi. Quyidagi turlari bor: shobarg (shohbarg), qo'sh barg, ko'p barg, chor barg, tol barg, madoxil barg, qo'shbodom barg, qalampir barg va b.

**BARG GULI** – bodom elementining ma'lum masofada ritmik takrorlanishidan hosil bo'lgan, oddiy, yo'lqinsimon naqsh turi.

**BARGLI RAFTOR** – yo'l ichida bargning to'lqinsimon ritmik takrorlanishidan hosil bo'lgan islimiyl naqsh turi.

**BOFTA ISLIMIY** – naqsh tanobi, boftaning takrorlanishidan hosil bo'lgan islimiyl naqsh turi.

**BARGLI ISLIMIY** – yo'l ichida bargning to'lqinsimon takrorlanishidan hosil bo'lgan oddiy islimiyl naqsh turi.

**BEZAK** – naqsh, gul.

**BEZAK SAN'ATI** (Dekorativ san'at) – inson atrofidagi moddiy muhitni aks ettiruvchi, unga obrazlilik bag'ishlovchi san'at. Kishilarning moddiy va ma'naviy qiziqishlarini o'zida mujassamlashtiradi, turli tarixiy davrlarda o'sha davrning badiiy yo'nalichlari, uslublari unga o'z ta'sirini ko'rsatadi.

**BICHISH** – andaza olish, ulgi yasash:

1. Kiyimni tikishdan oldin kishining bo'y-bastiga muvofiq qilib andaza asosida qiyib olish.

2. Misgarlik, tunukasozlik kabilarda mis va tunuka qismlarini o'lchab qirqib olish.

**BODOM** – bodom shaklidagi naqsh; zargarlik, kashtado'zlik, do'ppido'zlik, zardo'zlik buyumlarini bezashda keng qo'llaniladi.

**BODOM GULI** – bodom shakli takrorlanishidan hosil bo'lgan sodda islimiyl naqsh turi.

**BOFTA** – to‘qima, to‘qilgan shakldagi islimiy naqsh bo‘lagi.

**BO‘YOQLAR** – bo‘yash, rang berish uchun ishlataladigan modda. Moyli, sirli, nafis va b. turlari bor. Naqqoshlik, ganchkorlik, yog‘och o‘ymakorligi, misgarlik, rassomlik va b.da keng qo‘llaniladi. Xalq amaliy bezak san‘atida asosan, akvarel, guash, tempera, elimli va moy bo‘yoqlar qo‘llaniladi. Bo‘yoqlar qog‘oz, karton, gazmol, yog‘och, mis va b. buyumlarni bo‘yash uchun ishlataladi. Buyoqlar o‘ziga xos xususiyatlari va ishslash usuli bilan farqlanadi. Suyuq, quyuq, qattiq, xamirsimon ko‘rinishda tayyorlanadi.

**BO‘RTMA NAQSH** – relyef; zamindan bo‘rttirib shakl hosil qilish usuli. Shakl, tasvir zamin fondan bo‘rttirib yoki, aksincha, zaminga o‘yib hosil qilinadi.

## CH

**CHIZMA PARDOZ** – ganch o‘ymakortigining turlaridan biri, ganch yuzasiga tushirilgan naqsh nusxasining ustti, tirmab chizib chiqish.

**CHOKA PARDOZ** – (yorma pardozi) naqsh bandining qiyaligini o‘rtaga olib, uzunasiga o‘ylgan pardozi turi.

**CHINNI BARG** – chinnigul bargi tasvirlangan islimiy naqsh turi.

**CHOR ISLIMIY** – islimiy hoshiya naqsh turlaridan, to‘rt qanotli turunjdan iborat. Yog‘och, ganch, tosh o‘ymakorligi, misgarlik va naqqoshlikda ishlataladi.

**CHOR ISLIMIY PAXTAGUL** – islimiy naqsh bo‘lagi. Paxta guli tasviridan tashkil topgan islimiy naqsh.

**CHORBARG** – to‘rt bargdan iborat naqsh bo‘lagi.

**CHORBARG G‘UNChA** – to‘rt yaproqli g‘unchasimon gul, naqsh turi.

**CHORGUL** – to‘rt yaproqli gulsimon islimiy naqsh bo‘lagi.

**CHORDONA** – to‘rt dona, qator nuqtalar-dan tashkil topgan oddiy hoshiya-naqsh.

**CHORSAR** – to‘rtburchak handasiy naqsh bo‘lagidan tashkil topgan naqsh turi.

## D

**DAVRAGUL** – davra shaklidagi mujassamot; islimiy, handasiy yoki gulli girihi naqshlari asosida yaratiladi.

**DUDAMA QALAM** – ikki yoqlama tig‘li qalamsimon asbob.

**DO‘G‘OL GANCH** – ganch turi; ganchkorlikda biror chuqurlikni to‘ldirish uchun ishlataladigan suyuq qorishma.

## G‘

**G‘UNCHA GUL** – gul g‘unchasiga o‘xshatib tasvirlangan shakl.

## G

**GAJAK** – 1. Ayollarning bezak buyumi. Chakkaga, qulqoq yoniga taqiladi. Toshkent, Farg‘ona vodiysida bodom, Buxoro, Samarqand viloyatida qo‘shgajak, yarimoy, bodombarg xillari mavjud;

2. Zulf, gajaksimon naqsh turi;

3. Me’morlikda gumbaz ostidagi burchak konstruksiya.

**GAZCHO‘P** – 1. Maxsus yog‘och moslama; ganchkorlik yoki suvoqchilikda devor yuzasini tekislash, eshik va deraza qirralarini chiqarish uchun ishlataladi.

2. Bir gaz uzunlikdagi o‘lchov asbobi.

**GANCH** – alebastrning bir turi; gips va tuproqdan iborat toshsimon jinsni o‘tda qizdirish yo‘li bilan hosil qilinadigan binokorlik materiali. Ganchning tarkibida 40–70 foiz gips bo‘ladi. Qizdirilgach, maydalangan ganch g‘alvir va elakdan o‘tkazilib, navlarga ajratiladi. Eng mayda va toza ganch kukuni – gulganchdan o‘ymakorlik va b. pardozi ishlarida foydalaniladi, nisbatan yirikroq kukuni – tezganch suvoq ishlarida, g‘isht terish va b. da ishlataladi.

**GANCHKOP**, ganchkob – ganch tayyorlaydigan usta. Ganchkop ganch toshlarni yuqori darajada issiqlik beradigan xumdonda 120–150° da 6–7 soat qizdirib, so‘ng o‘g‘ir, yorg‘uchqanda maydalagan.

**GANCHKOR** – ganch ustasi.

**GANCHKORLIK** – ganchkor usta kasbi. O‘rta Osiyoda 1-asrdan ganch o‘yma naqsh ishlangan. Xorazmdagi Tuproqqa‘, Buxoro hukmdorlari saroylari va b. joylardagi arxeologik qazishmalar jarayonida ganchkorlik san‘ati namunalari topilgan. XVIII–XIX asrlarda ganchkorlik san‘atidan turar joy va b. binolarga bezak berishda keng foydalanilgan. O‘yma ganchlar, asosan, binolarning ichki qismidagi

devorlar, namoyon, taxmon, tokcha, sharaflar va b. joylarni bezashda ishlatiladi. Ganchkorlik san'ati asrlar davomida rivojlanib, har bir vohaning o'ziga xos ganchkorlik maktablari emas., Buxoro, Toshkent, Farg'ona, Xiva maktablari va h.k. paydo bo'lgan.

**GANCHXOK** – qorishma, soz tuproq, qum va ganchni suv bilan aralashtirib hosil qilinadi. G'isht terishda va devorga qora suvoq urishda ishlatiladi.

**GARDISH** – halqa; elakning gardishi.

**GILKOR** – suvoqchi usta; gilkor ustalar, odatda, qorishma tayyorlash, g'isht, tosh terish, suvash, naqsh ishslash bo'yicha ham ixtisoslashgan bo'ladi.

**GILKORLIK** – suvoqchilik sohasi.

**GIPS** – ganch, oq yoki sarg'ish rangli mineral, qurilish materiali. Juda mo'rt bo'lib, suvda kam eriydi. Xumdonda 60-90° qizdirilsa, tarkibidagi suv yo'qola boradi. haykaltaroshlik, o'ymakorlik va b.da foydalaniladi. Suvga chidam'siz. Gipsdan quruq suvoq, to'siq, qavatlararo yopmalar, karnizlar, tovush yutuvchi material va yong'indan muhofazalovchi buyumlar yasaladi.

**GIRIH** – geometrik shakklardan tashkil topgan murakkab naqsh turi.

**GUL ZANJIRA** – gul shaklida o'yilgan ensiz zaminsiz hoshiya naqsh.

**GIPS** – mineral, rangsiz (shaffof), oq, qizil, qoramtil qora rangda bo'ladi, mo'rt, suvda kam eriydi.

**GUASH** – elim va oq bo'yoqni aralashtirib tayyorlanadigan bo'yoq, u suvda eriydi. Naqqoshlik, ganchkorlik, yog'och o'ymakorligi va rangtasvida keng ishlatiladi.

**GUL** – islimiyl naqsh elementi. Tabiatdagi gullarning badiiy shakli. Gullarning har xil turlari bo'lib, o'ziga xos nomlari bor. Chunonchi uch-besh yaproqli oygul, bargli oygul, lola guli, paxtagul, pistagul, no'xatgul, bodomgul, chinnigul, safsargul, atirgul, gulafshon, gultojixo'roz va b.

**GULGANCH** – ganchning oliy navi. Juda nozik ish joylarida – badiiy o'yma, quyma va suvoq ishlarida ishlatiladi. Ganch elakdan o'tkazilib, sifati va quvvatiga qarab, kam yoki ko'proq suv aralashtiriladi. Qadimda gulganch tez qotib qolmasligi uchun shirach qo'shilgan. Uning xususiyati shundaki, birinchidan, ganch tez qotmasligini ta'minlagan, ikkinchidan, ganch qancha ko'p shirach qo'shilsa, uning quvvati shuncha oshgan.

**GULDON** – gul solingan idish va uning tasvir; islimiyl naqsh qismi. Amaliy san'at turlarida naqqoshlar gul solingan tuvaklarning badiiy qiyofasini tasvirlaydi.

**GULLI GIRIH** – girih oralari islimiyl naqsh bilan to'ldirilgan murakkab naqsh turi.

**GULTOJIXO'ROZ** – gultojixo'roz guli shaklidagi naqsh.

## H

**HAVOZA** – narvon, zinapoya shaklidagi muvaqqat qurilma. Ustalar binoning tashqi va ichki qismini bezashda foydalanadi.

**HAL** – tunj, alyuminiy, jez, rux, qalay, kumush hamda oltindan tayyorlangan kukun, bo'yoq; buyumlargi jilo berish, bezaklarni jozibali qilish uchun ishlatiladi. Metall buyumlar sirtiga hallab, jilo beriladi. Ular galvanik usulda yoki metallash, kimyoviy ishlov berish yo'li bilan qoplanadi. Nometall buyumlar sirtiga metall va metall qotishmalaridan tayyorlangan kukun, ya'ni hal yuritiladi. U spirtli lakka qoriladi, keyin sirtga suriladi. Zargarlik, miniatyura, naqqoshlik va me'morchilikda bezakka juda yuva qilib halning bir turi – zarhal /oltin suvi/ yurgiziladi.

**HOSHIYA GUL** – hoshiyaga moslab ishlangan naqsh.

**HUNARMAND** – uyida yoki do'konida biror mahsulot ishlab chiqarish bilan shug'ullanuvchi usta, biror hunarni yaxshi egallagan usta.

**HUNAR M A N D C H I L I K**, hunarmandlik – oddiy mehnat qurollari yordamida xom ashyodan turli mahsulotlar ishlab chiqarish kasbi. Yirik sanoat ishlab chiqarishi vujudga kelgunga qadar keng tarqalgan, ayrim sohalari hozir ham saqlangan. U davr o'tishi bilan takomillasha borib, turli ixtisosliklar(kulollik, duradgorlik, temirchilik, misgarlik, binokorlik, toshtaroshlik, o'ymakorlik, kashtado'zlik, ko'nchilik, tikuvchilik, to'quvchilik, zargarlik, degezlik, rixtagarlik, zardo'zlik, bo'yoqchilik, kemasozlik, tunukasozlik va b.)ga ajrala borgan.

**HUNAR** – muayyan tayyorgarlikni talab etadigan va tirikchilik manbai bo'lgan ijodiy mehnat faoliyati.

## I

**ISKANA** – uchi yapaloq, po'lat tig'li, dastasi yog'ochdan iborat asbob; yog'ochsozlikda va ganchkorlikda ishlatiladi. Iskananing o'yuvchi

hamda yo'nuvchi xillari bor. Yo'nuvchi iskanada taxta chetlariga qirra chiqariladi, teshik tirnoqlar rostlanadi, uyalar yo'nib, kengaytiriladi. Qalin hamda qattiq yog'ochlarni o'yish va teshish ishlari o'yuvchi iskanalar bilan qilinadi.

**ISLIMIY** – o'simliksimon nabotiy naqsh turi. Bu naqsh tanob, band bargli, kurtakli butalardan tashkil topib, bir-biri bilan chirmashib ketib, o'simlik tasvirini beradi.

**ISLIMIY ZANJIRA** – o'simliksimon naqsh elementlaridan tashkil topgan zanjira turi.

**ISLIMIY SHUKUFTA** – islimiy naqshning tanobi shukufta elementidan hosil bo'lgan naqsh turi.

## J

**JIYDAGUL** – jylda guli shaklidagi naqsh.

**JILVIR** – buyumlarning sirtini silliqlab pardozlash uchun moslab tayyorlangan dag'al qog'oz.

**JILO** – silliqlash, sayqallash natijasida paydo bo'lgan yaltirash.

**JINGALAK** – jingalak shaklidagi naqsh bo'lagi. Naqshda to'ldiruvchi qism vazifasini o'taydi.

**JINGALAK ZANJIRA** – jingalak ko'rinishidagi zanjiri turi.

## K

**KASB** – mehnat faoliyatining muayyan bilim va mahorat talab etadigan turi. Unga umumiyl yoki maxsus ma'lumot hamda amaliy tajriba yo'li bilan erishiladi. Masalan, ganchkorlik kasbi.

**KATAK GUL** – to'rsimon girih naqsh turi. Ko'proq kandakorlikda ishlataladi.

**KITOBA** – o'yma ganch yoki naqshli usulda yozilgan yozuv namoyon. Yozuvli bezak. Zardo'zlikda me'moriy bezak elementlariga o'xshatib tikilgan kashta yoki to'rt burchakning ichida o'simliksimon naqshlar bilan to'ldirilgan bezak.

**KOSIB** – hunarmand, kasb egasi. Mahsi, etik, kavush va b. oyoq kiyimlar tayyorlaydigan mutaxassis, usta.

**KOMPOZITSIYA** – lotincha «kompositio» so'zidan olingen bo'lib, tuzish, bir-biriga solishtirish, «naqshni g'oyasi, xarakteri va vazifasiga muvofiq uyg'un hamda mutanosib «joylashtirish» degan ma'noni anglatadi. Qarang: mujassamot.

## L

**LOLA** – lolani eslatuvchi islimiy naqsh bo'lagi.

**LOLA HOSHIYA** – lola shaklidagi hoshiya naqsh.

**LOLA ZANJIRA** – lola shaklidagi zanjira turi.

**LO'LAKASH** – o'ymakor bo'rtma naqshlarga lo'la pardoz berishda ishlataligan asbob.

**LO'LA PARDOZ** – o'yma relyefiga yarim yumaloq shaklida berilgan pardoz. Ganch, yog'och, tosh o'ymakorligi va boshqalarda qo'llaniladi.

## M

**MADOHILI** – chapu rost takrorlanuvchi lolasimon naqsh turi. Madoxil ko'rinishi jihatidan xilma-xil bo'lib, g'uncha, lola, gul, uch barg va b. shakllardan iborat bo'ladi.

**MARG'ULA** – gajak ko'rinishidagi islimiy naqsh bo'lagi.

**MAJNUNTOL NAQSh** – majnuntol tasvirlangan naqshli namoyon.

**MEHROBI** – mehrobsimon shaklda ishlanadigan naqsh turi. Agar ishlangan naqsh shakli murakkab bo'lsa, mehrobi namoyon deb yuritiladi.

**MEHROB ISLIMI** – yo'l ichida mehrob shaklidagi naqshning ma'lum masofada takrorlanishidan hosil bo'lgan islimiy naqsh turi.

**MINQOR** – qush tumshug'ini eslatuvchi ganch o'ymakorligi asbobi. Uchburchak kurakchali o'tkir keskich ko'ndalang holatda dastaga o'rnatiladi. U o'ymaning zaminini tozalash, tekislash va chuqurlatishda ishlataladi. Minqorning katta /2,5-3sm/ va kichik /1,5-2 sm/ keskichli turlari bo'ladi.

**MORPECH** – ilon izi o'rami shaklidagi hoshiya naqsh. Morpech misgarlikda mis buyumlarning chetiga va ichiga, ganchkorlikda tokcha, namoyon, izora chetlariga hamda yo'g'och o'ymakorligida eshik, xontaxta, yog'och o'rindiq va h.k. narsalarning chetiga ishlanadi.

**MORPECH QALAM** – o'yilgan naqshlarning chetlariga aylana shaklidagi nuqtalarni chiqarish, bo'rtiq hosil qilish va o'rovlanri qirqish uchun ishlataladigan asbob.

**MOH** – yarim oy; ramziy naqsh. Zardo'zlik va misgarlikda ko'p ishlataladi.

**MUJASSAMOT** – kompozitsiya.

1. San'at, adabiyot va b. da badiiy asar, buyum va h.k.larning tuzilishi, tarkibi, o'zaro nisbati, uyg'unligi kabilar.

2. Me'morlikda bino yoki uning qismlarini barpo etishda, tasviriy va amaliy san'at turlarida ularning g'oyasi, xarakteri va vazifasiga muvofiq joylashtirilishi, o'zaro uyg'unligi va mutanosibligi.

**MUNABBAT** – to'g'ri to'rtburchakdan tashkil topib, to'rt tomoniga takrorlanadigan naqsh taqsimi. Katta 'yuzalarni bezashda foydalaniadi.

**MUSAVVIR** – rassom, rasm ustasi.

**MUQARNAS** – ravoqli kosachalardan tashkil topgan murakkab hajmdagi bezak turi. Muqarnaslarning ajoyib namunalarini Samarqanddagi Shohi Zinda ansamblida, Ulug'bek madrasasida va b. binolarda uchratish mumkin. Karniz shaklidagi muqarnasga «sharafa» deyiladi.

**MUQOVASOZLIK**, muqovachilik, sahhoflik – kitob, jurnal va b.ni muqovalash kasbi.

**MO'YQALAM** – naqqoshlik, rassomlikda b.da tasvirlash, bo'yash, chizish kabilarda ishlataladigan asbob. Mo'yqalam hayvonlar juni va plastmassadan tayyorlanadi. Mayin jundan (bo'rsiq, suvsar, olmaxon) tayyorlangan mo'yqalamdan naqqoshlik, tempera, grafika, rangtasvirda foydalaniadi. Qattiqroq jundan tayyorlanganlari esa moybo'yoq rassomligida, naqqoshlik va bo'yoqchilikda qo'llaniladi.

**MO'NDI** – sopol ko'zaning dastasiz xili. Og'zi tor, qorni keng bo'ladi. O'tmishda yog', suv solingan.

## N

**NAVO** – xonaning devor bilan shift o'rtaisdagi qayrilma qismi.

**NAMOYON** – forscha «ko'rinish, manzara» demakdir. Namoyon mukammal, yetuk naqsh kompozitsiyasi.

**NAMUNA** – nusxa, etalon.

**NAQSH** – badiiy bezak; biror narsani o'yib yoki bo'yab, tikib hosil qilinadi; bo'lak elementlari ma'lum tartibda takrorlanishi mumkin. Har xil shakllar, o'simlik, qush, hayvon va b. tasviridan tashkil topadi. Naqshlar islimiy, girih, ramziy kabi turlarga bo'linadi. Naqsh tushiriladigan material xossasi va ishlanishiga ko'ra turli sohalarga bo'linadi. Mas.,

ganchkorlik, yog'och o'ymakorligi, kandakorlik, toshtaroshlik, kashtado'zlik, zardo'zlik, kulolchilik va b.

**NAQSHI GIRDOB** – ku'lcha shaklidagi naqsh; islimiy, handasiy gulli girih, nishon tarzida bo'ladi.

**NILOBI (OCH ZANGORI RANG)** – naqshlarda gul va g'unchani, shuningdek, naqsh zaminini bo'yashda foydalaniadi.

## O'

**O'SIMLIKSIMON NAQSH** – tabiatdagi barg, band, daraxt, buta, gul va boshqa narsalarning stillashtirib olingen shakli ma'lum qonuniyat asosida takrorlanishidan hosil qilingan naqsh turi.

**O'YMA** – sirtni o'yib, zarb berib ishslash. O'ymakorlikda olti xil o'yma mavjud: chiziq o'yma, zanjira o'yma, yassi o'yma, chuqur o'yma, panjarasimon o'yma va hajmli o'yma. Shuningdek, zaminli va zaminsiz o'yma ham bor. Qirma pardozi, yorma va yoyma pardozi, lo'la pardozlar zamiinli o'ymaga, chizma va zanjira pardozi zaminsiz o'ymaga kiradi.

**O'YMAKORLIK** – o'yib naqsh solish kasbi; xalq amaliy san'atining eng qadimiylari keng tarqalgan turlaridan (ganch, yog'och, metall, suyak, tosh va boshqalar). Naqsh va biror tasvir yog'och, ganch, metall, tosh, suyak va boshqalarga o'yib, yo'nib, tirnab, chizib, bo'rttirib, teshib ishlanadi. O'ymakorlik namunalari bino qismlarini, uy-ro'zg'or buyumlarini bezashda, haykalchalar tayyorlashda keng qo'llaniladi.

## O

**OYGUL** – oygul islimiy – oy shaklidagi islimiy naqsh bo'lagi.

**OYNAVAND O'YMA** – toshoyna zaminli o'yma. Naqshlar oyna sirtiga yupqa ganch qatlami quyib ishlanadi. Bunda ko'zgu o'ymaning zaminida ko'rinish turadi.

**OLMA** – olma shakidagi islimiy naqsh bo'lagi.

## P

**PARDOZ** – buyum sirtiga oxirgi ishlov berish, jilolash; xalq amaliy san'ati turlari (zargarlik, misgarlik, ganch, yog'och o'ymakorligi va boshqalar)da keng ishlataladi.

**PARGORI GIRIH** – pargori usulida yaratiladigan handasiy naqsh.

**PARGORI NAQSH** – pargor bilan yaratiladigan naqsh.

**PATNISGUL ISLIMIY** – patnis shakliga moslab ishlangan islimiyl naqsh turi.

**PANJARASIMON O'YMA** – tokcha va tuyuklarni pardozlashda va qandillar tayyorlashda qo'llaniladi.

**PATAK BINDI** – shuturgardanning bir turi; tekis, uchi ko'ndalang kesilgan iskana. U raxlarni uchli qilib kesish va o'yishda, to'g'ri qirralarni qirqish va choklarni yamashda ishlatiladi.

**PAX PARDOZ** – ganch o'ymakorligida o'yma naqsh relyefini bir tomonga qiyalab kesib ishlatiladigan pardoz turi.

**PAXTA** – islimiyl naqsh bo'lagi, paxtaning soddalashtirib olingan shakli.

**PAXTAGUL** – paxta chanog'i (elementi) asosida tuzilgan islimiyl naqsh turi.

**PILTA QALAM** – o'ymakorlik asbobining bir turi, uchi qayrilgan bo'ladi. U relyeflar hosil qilishda ishlatiladi.

**PECHAK ISLIMIY** – chirmashib o'sadigan o'simlik tasviri, islimiyl naqsh turi. Pechak islimiyning ko'p xillari bor: egri-bugri novdalarni, bargli va gulli novdalarni, faqat guldan iborat novdalarni eslatadi.

**PISTA KO'MIR** – yog'ochni havosiz sharoitda chala kuydirib hosil qilinadigan yuqori uglevodli qattiq, g'ovak mahsulot. Amaliy san'atda xoka tayyorlashda ishlatiladi.

**PICHOQ** – dastaga o'rmatilgan bir tomoni o'tkir tig'li kesuvchi asbob. Tuzilishiga ko'ra bodomcha pichoq; katta-kichikligiga ko'ra o'rtasuyamlik, kezlik /bolapichoq/, chalabuzar; bezatilishiga ko'ra sodda pichoq, guldor pichoq, chilmix pichoq, rufta pichoq; dastasining tuzilishiga ko'ra yog'och sopli, suyak sopli, shoxdastali, dandon sopli, 13 sadafli, 15 sadafli va b.

**PUX QALAM** – uchi qayrilgan ganch o'ymakorligi asbobi; nozik chiziqlarni chizish va o'yishda ishlatiladi.

## Q

**QALAM** – 1. O'rtasiga ingichka, uzun grafit joylashgan cho'p shaklidagi yozuv-chizuv asbobi. Ular ishlatish va xususiyatlariga ko'ra har-xil turlar va ranglarga ajratiladi. 2. Ganch, yog'och, tosh va sh.k. materiallar o'ymakorligida

ishlatiladigan metall asbob. 3. Kandakorlikda xilma-xil naqsh zarb qiladigan asbob.

**QALAMDON**, juzdon – naqqosh va rassomlarning ish qurollari saqlanadigan idishcha.

**QALAMPIR** – islimiyl naqsh bo'lagi; turli ko'rinishda tasvirlanadi.

**QALAMTOK** – asbob, ganch yuzasiga chiziqlar chizish va panjarasimon ganch ishlarini bajarishda ishlatiladi. Uchiga tomon torayib boradi, ikki tomoni xanjarga o'xhash, o'tkir. Uning bir necha turlari bor.

**QANDIL** – bir necha lampochka yoki sham qo'yildigan osma chiroq; chilchiroq, lyustra. Metall, plastmassa, ganch va billurdan yasaladi.

**QIR** – maxsus tayyorlanadigan qorishma: shirach, qamish kuli, pista ko'mir, so'ndirilgan ohak qo'shib tayyorlanadi. Binolarni namgarchilikdan saqlash uchun ishlatiladi. Ko'pincha hammomlarni suvashda ishlatilgan.

**QIRMA** – naqsh yaratish usuli va shu usulda yaratilgan naqsh turi. Ganch o'ymakorligida o'yib olingan chuchurchalar rangli qorishma bilan qisman to'ldiriladi. Qirma usuli o'ziga xos bo'lib, ko'p rangni xohlamaydi, pardozi ham odatdagidek emas. Qirma yaxlitligi va rang turining kamligi bilan rangli naqshlardan ajralib turadi.

**QOLIP**, qolib – 1. Nusxa ko'paytirishda foydalaniladigan hajmli moslama; ganch o'ymakorligida o'yma naqshni ko'paytirish uchun foydalaniladi. 2. Matoga bosma naqsh /gul/ tushirishda ishlatiladigan moslama. 3. Andaza, shablon.

**QOLIPAKI** – qolip asosida idishlarga naqsh ishslash uslubi. Po'latdan yoki birinjdan yasalgan qolip /o'yib yoki quyib ishlanadi/ naqshning ustiga mis bo'lagi, uning ustiga yupqa qo'rg'oshin plastinkasi qo'yiladi. Bolg'a bilan asta-asta urish natijasida mis bo'laklarida naqsh paydo bo'ladi. Hosil bo'lgan naqshli mis bo'laklari mis buyum-ning xohlagan joyiga yopishtiriladi.

**QUBBA** – 1. Zargarlik va zardo'zlikda bezak turi; qirrali yoki dumaloq qubbasimon shaklda bo'ladi. Kashta yoki gulga qo'shib qadaladi. Ostoba, qumg'on bezashda ham foydalaniladi. 2. Me'morchilikda gumbaz ustidagi toj.

**QUBBA ZANJIRO** – bir-biri bilan chirmashib ketgan qubbasimon zanjira naqsh.

**QUROQ** – mayda bo'laklardan ulab, to'plab yasalgan bezak.

**QO'SH BARG** – qo'shaloq shakldagi bir just barg.

**QO'SH BODOM** – ikki bodom ko'inishidagi naqsh bo'lagi.

**QO'SH GAJAK** – islimiy naqsh bo'lagi; juft holda qayrilib ishlangan gajaksimon naqsh.

**QO'SH ZANJIRA** – ikki yo'lli zanjira naqsh.

**QO'SH MEHROBLI ISLIMIY** – mehrob shakllardan hosil bo'lgan islimiy naqsh turi.

## R

**RAFTOR** – bir yoki ikki tomonga to'lqinsimon o'sgan novdasimon naqsh. Tasvirlangan novda soniga qarab yakraftor, duraftor, seraftor kabi turlari bor.

**RAMZIY** – arabcha «ishora qilmoq» so'zidan olingen; tabiatni, voqelikni va boshqa narsalarni jonli chiziqlar hamda ranglar orqali tasvirlash.

**RAMZIY NAQSH** – shartli bezak; biror g'oya, tushuncha, hodisa va sh.k.ni ifodalaydi, eslatadi.

**RANG** – biror narsaning o'ziga xos bo'yog'i, tunsi. Binafsha, ko'k, yashil, sariq, zarg'aldoq, qizil kabi ranglar bo'lib, asosiy ranglar /sariq, qizil va ko'k/ qo'shilishidan yashil, ko'kish, binafsha, zarg'aldoq, jigarrang kabi ranglar hosil bo'ladi. Ranglar, asosan, ikki turga, ya'ni iliq /qizil, sariq, zarg'aldoq kabi/ va sovuq /yashil, havorang va b./ ranglarga bo'linadi.

**RANGLAR UYG'UNLIGI** – ranglarning bir-biriga muvofiq tushishi, o'zaro uyg'unlashuvi.

**RASM** – tasvir, shakl; tekis yuzada qo'lda yaratiladi.

**RAX** – biror narsaning qirrasi, chekkasi.

**RITM** – naqsh elementining ma'lum tartibda va ma'lum oraliqda bir tekisda takrorlanishi; naqshdagi harakatning uzlusiz va go'zal ko'inishini ta'minlaydi. Usan'at turlari shakllarining mujassamotida eng kuchli va muhim hisoblanadi.

**ROMB** – handasiy naqsh elementi. Romb ilk tosh davrlaridan boshlab ayol, yer timsoli bo'lgan.

**RUTA** – hoshiya naqsh.

## S

**SALB** – xoch shaklidagi handasiy naqsh bo'lagi. Qadimdan keng ishlatiladi. Salb tabiatning paydo bo'lishi, quyosh, tirilish ramzini bildirgan.

**SEBARG** – uch barg; islimiy naqsh mujassamotlarda ko'p uchraydi.

**SEMURG'** – afsonaviy qush tasviri. Kulollik, naqqoshlik, misgarlik, ganch o'yma-korligi va b.larda keng ishlatiladi.

**SERAFTOR** – uch yo'nalishli hoshiya naqsh.

**SIRTMOQ** – boftaning bir turi, bandi rumiy.

**SKALPEL** – (jarrohlik pichog'i) tibbiyotda, jarrohlik ishlarida ishlatiladigan o'tkir tig'li pichoq.

**SOXTA GANCH** – ganch o'ymakorligida sekin qotadigan ganch qorishmasini tayyorlash usuli. Suv bilan qorilgan ganch 30 minut atrofida qotmasdan turadi. Soxta ganch qorishmasini tayyorlash uchun idishga suv solinib, elangan ganch suv yuzasiga sepib turiladi, bu ish to suv yuzasini ganch berkitguniga qadar takrorlanadi. Usta idishdagi qorishmaning bir chekkasidan olib ishlatadi.

**STILIZATSIYA** – quyosh, baliq, hasharotlar, barg, gul va shu kabilarning shaklini, ko'rinishini naqshga moslashtirilib hamda umumlashtirib olish.

## SH

**SHABAKA** – panjara; mis idishlarga mayda qilib ishlanadi.

**SHABAKA NAQSH** – panjarasimon shakldagi namoyon turi.

**SHARAFA QALAM** – mayda muqarnaslarni o'yishda ishlatiladigan uchi qayrilgan iskana.

**SHINGILA** – uzum donasiga o'xshash islimiy naqsh turi.

**SHIRACH** – lotinchcha «eremupos»; g'isht terish va ganch o'ymakorligida ganchning sekin qotishini taminlovchi maxsus yopishqok qorishma.

**SHOBARG** – shohbarg, islimiy naqsh bo'laklaridan biri bo'lib, barglar ichida eng kattasi.

**SHOBARG ISLIMIY** – shobarg asosida yasalgan islimiy naqsh turi.

**SHOGIRD** – ustanning rahbarligida hunar o'rganuvchi shaxs.

**SHOX** – shox shakli ifoda etilgan naqsh bo'lagi.

**SHUKUFTA** – novda va tanoblarni bog'lovchi islimiy naqsh bo'lagi.

**SHUTURGARDON** – ganch o'ymakorligi asbobi; naqshlarning kontur chiziqlarini kesish va o'ymali bo'rtma pardoz berishda ishlatiladi. Keskich qismi yassi po'latdan yasalgan, tig'i

uchli, keskich qismining ko'rinishi teng yonli uchburchak ko'rinishida bo'ladi.

## T

**TANOB** – murakkab naqshlar mujassamotining asosini tashkil etuvchi va naqshga shakl beruvchi chiziq. Naqshlarda bir xil yo'g'onlikdagi chiziq bo'ladi. Naqqosh naqsh mujassamotini yaratishdan oldin, birinchi navbatda, tanob tortib, keyin novdalarni chizadi, so'ngra novdalarning yo'nali shiga moslab, gullarni joylashtirib chiqadi.

**TANOB TORTISH** – naqshning asosiy qismi chizish.

**TARX** – chizma, reja, eskiz, loyiha.

**TARXKASH** – tarx ustasi.

**TAXMIN** – koshinkorlikda bezak shaklini chizib, ustiga koshin teriladigan taxta; koshin bezagining o'rni qabariq bo'lsa, taxmin ham qabariq qilib tayyorlanadi.

**TAXMON** – uy yoki ayvon devorida sandiq o'rnatib, ustiga o'rinn-ko'rpa yig'ib qo'yiladigan tokchasi mon maxsus joy.

**TAQSIM** – naqshning ma'lum bir shaklda takrorlanuvchi qismi; rapport. Ustalar avval taqsim yuzini qog'ozga belgilab, axtasi (ulgisi)ni tayyorlaydi. Keyin bezatiladigan yuzaga shu axta yordamida naqsh nusxasi takrorlab tushirilib, to'ldirib chiqiladi va bezatiladi.

**TEZ GANCH** – tez qotuvchi ganch qorishmasi. G'ishtkorlikda, ravoq bog'lashda, suvoq va b.larda ishlataladi. Tezganch o'ziga xos tayyorlanadi; mas.: idishga suv solib ustidan ganch solinadi va tez qorilib, ko'p aralashtirilmasdan, tezda kerakli joyga ishlataladi.

**TOKCHA** – idish-tovoq va b. anjomlar qo'yishga mo'ljallab devor qatida tayyorlangan maxsus joy. Ko'pincha o'yma ganch – naqshlar bilan bezatilgan, bu esa xonaga alohida ko'rk va fayz bag'ishlagan.

**TUGMACHA** – tugma naqsh, tugma shaklidagi naqsh turi.

**TURUNJ** – ovalsimon yoki doirasimon naqsh.

**TABAQA PARDOZ** – tabaqa arabcha «qatlam, daraja» degan ina'noni anglatadi. U XIX asrda Buxoro ustalari tomonidan yaratilgan pardoz texnikasıdir.

**TUS** – rangni, uning bir-biridan farq qiladigan har bir ayrim turini bildiruvchi so'z.

**TO'LQIN NAQSH** – zanjira naqsh turi,

to'lqin shaklini eslatadi. Bunda suvning to'lqinlanib kelayotgan shakli zinasimon shaklda o'yib tasvirlanadi. Bu naqsh turi misgarlikda o'ziga xos uslubda ko'p ishlataladi.

## U

**USTA** – hunar sohibi, biror sohada malaka ortirgan shaxs. O'z hunarini yaxshi biladigan kishi, ish boshi, rahbar, ustoz.

**USTAZODA** – usta darajasiga ko'tarilgan farzand.

**USTAKOR** – ustaxonaga boshchilik qiluvchi eng malakali va **tajribali usta**.

**UZUM** – islimiy naqsh bo'lagi; uzum g'ujumlari tasviri.

## X

**XASHT BARG** – sakkizta bargdan tashkil topgan islimiy naqsh qismi.

**XITOYI GUL** – islimiy naqsh qismi; xitoyi chinni buyumlarga ishlangan naqsh bezagidan olingani uchun ustalar shunday deb yuritadilar. Tuzilishi jihatidan o'ta nafis, o'ziga xos, chiroli. Naqqoshlik, yog'och va ganch o'ymakorligi va b.da qo'llaniladi.

**XOVONDA** – ganch o'ymakorligida ishlataladigan ganch qorishmasi. Gul o'yishga mo'ljallab ma'lum qadar kuchi kamaytirilib tayyorlanadi. Xovonda tayyorlash uchun biror idishga suv quyilib, elangan mayda ganch ohista, shoshilmay solinadi va aralashtirilib qoriladi. Tayyorlangan qorishma biroz qota boshlaganida uni ishlatalish mumkin. Ganchning quvvati qanchalik kuchli bo'lsa, shuncha ko'p qoriladi. Hozir ham ba'zi ustalar uni shirach qo'shib tayyorlashadi. Shirach xovondaning quvvatini oshiradi.

**XORKA** – maxsus tayyorlangan kukun. Naqsh yoki tasvirni axtadan bezatiladigan yuzaga o'tkazish uchun ishlataladi. Maydalangan pista ko'mir, bo'r kukuni yupqa latta yoki ikki qavat dokaga solinib, xaltacha holida tugiladi. Axtaning ustidan xoka urib chiqiladi yoki yengil bosib yurgiziladi, natijada naqsh nusxasi kerakli yuzaga o'tadi.

## Adabiyot

1. O'zbekiston Respublikasi Qonuni «Ta'lim to'g'risida», «Adolat», T., 1997.
2. Karimov I. A. O'zbekistonning siyosiy-iijtimoiy va iqtisodiy iqbolining asosiy tamoyillari. «O'zbekiston», T., 1995.
3. Karimov I. A. Biz kelajagimizni o'z qo'llimiz bilan quramiz. «O'zbekiston», T., 1999.
4. Qur'oni Karim (tarjima va izohlar muallifi Alovuddin Mansur). «Cho'lpon», T., 1992.
5. Abdullaev T. A. Remesla Uzbekistana XIX–XX vv. «Fan», T., 1976.
6. Axloq-odobga oid hadis namunalari. «Fan», T., 1990.
7. Bartold V. V. Istoriya kul'turnoj zhizni Turkestana. Izdatel'stvo Akademii nauk SSSR, M., 1927.
8. Bulatov S. O'zbek xalq amaliy bezak san'ati. «Mehnat» nashriyoti, T., 1991.
9. Bulatov S. Yoshlarga hunar o'rnatishning milliy, an'anaviy asoslari. Metodik tavsiya. RUMM, T., 1993.
10. Bulatov S., Yo'ldoshhev X., Turdiyeva Sh.E. Odobnomra (Akademik litsey va kasb-hunar kollejlari uchun o'quv qo'llanma). T., 2002.
11. Gavrilov M. O remeslennykh selakh Sredney Azii statyusakh-risoliya. T., Izd. Srednazkomtarsica. 1928.
12. Gavrilov M. Risoliya remeslen-nikov. T., Tip-Pri konf. Gen. Gubernat., 1912.
13. Ganchdag'i gullar bog'boni. Tuzuvchi M a d r a h i m o v A., «ARNAPRINT», T., 2006.
14. Yo'ldoshhev X., Bulatov S. Ustoz-shogird. «O'zbekiston», T., 2005.
15. Muxtorov A., Usta va shogird odobi. Mehnat, 1999.
16. Kaykovus. Qobusnomra. «O'qituvchi», T., 1986.
17. Mukminova R. G. Ocherki po istorii remesla v Samarkande i Buxare v XVI v. «Fan», T., 1976.
18. Nozimov D. Armug'onim Sotimxon. Ustalar haqida dilkash qissalar. «Fan», T., 1996.
19. Sadiy Sheroziy. Guliston. G'.G'ulom nomli Adabiyot va san'at nashriyoti, T., 1968.
20. Suhareva O. A. K istorii gorodov Buxarskogo hanstva. T., Izd. AN PUs, T., 1958.
21. Suhareva O. A. Pозднефеодальный город Бухара. T., 1962.
22. Usmonov M. San'atim – saodatim. «Yosh gvardiya», T., 1983.
23. Husayn Voiz Koshibi. Futuvvatnomai sultoniy. Abdulla Qodiriy nomidagi xalq merosi nashriyoti, T., 1994.
24. Shomaqsudov Sh., Shorahmedov Sh. Ma'nolar maskani. O'zbekiston Milliy ensiklopediyasi Davlat ilmiy nashriyoti, T., 2001.
25. Yusuf Xos Hojib. Qutadg'ubilig. «Yulduzcha», T., 1990.
26. G'ułomov S., Bulatov S. Sharqona usta – shogird odobi. O'z ROHMTV, 2000.

## DONISHMANDLAR HUNAR HAQIDA

Hunarki qilgaylor hunar fosh,  
Agar xorotaroshu, xoh naqqosh.

Bir hardam yo forshu izora,  
Ki qilgay havz yo forshu izora.

Bir har dam chekib yuz naqsh dilkash,  
Ki har bir qasrni qilgay munaqqash.

*Alisher NAVOIY*

To fazlu hunarla bezanmay inson  
Biron baxt eshigi ochilmish qachon  
Javhar bilan temir bo'ladi po'lat,  
Ilmsiz o'z jinsidan chiqmog'i guman.

*Abdulgodir BEDIL*

Hunarni o'rgan, chunki hunarda ko'p sir,  
Yopiq xazinalarni ochar birma-bir.

*Nizomiy GANJAVIY*

Bo'lsa bir hunarda agar yuz aybing,  
Do'st nazdida hunar yopar yuz aybing.

*Sa'diy SHEROZIY*

Bir hunar egasi bo'lsa odam gar,  
U emas, ko'rsatur o'zin shu hunar.

*Sa'diy SHEROZIY*

Kim hunarni desa, u dono bo'lur,  
Nodon qudrat deb boylikni bilur.

*Abdurahmon JOMIY*

Hech kimga yalinmas hunarli inson,  
Rizqin o'z bog'idan topadi bog'bon.

*Sayido NASAFIY*

Kishiga faqat hunar,  
Iqbol eshigin ochar.

*Abdulgodir BEDIL*

Hunarmandga doim ko'p jabru bedod,  
Hunarsizni etmas hech bir kimsa yod.

*Xusrav DEHLAVIY*

Kerakdir har mardga sinamoq hunar,  
Hunar kalit bo'lsa, ochilur gavhar.  
Kimki o'rganishni uyat, or demas,  
Suvdan dur topadi, toshdan la'l, olmos.

*Nizomiy GANJAVIY*

Nodonlardek otangning kimligini pesh qilma,  
O'zingga sen hunardan o'zgani ota bilma.

Hunar birla aqling birikkan hamon,  
Har ish bu jahonda yurishgay ravon.

*Abulgosim FIRDAVSIY*

G'ofil turma, yoyin vaqtimas,  
Hunardan unsin g'urur va havas.

*Abdurahmon JOMIY*

Hunarni asrabon netgumdir oxir?  
Olib tufroqqamu ketgumdir oxir?

*Alisher NAVOIY*

Kosibdan shodu xurram yo'q jahonda,  
Hunardan yaxshi dur ham yo'q olamda.

*Nosir XISRAV*

Bir kishi dediki: «Bunda ne sir bor,  
Otadin ustozga ta'ziming bisyor?»

*Abdurahmon JOMIY*

Yoshlikda bir shogird, o'zgarar ustod,  
So'ngra ustod bo'lib, dilni etdik shod.

*Umar XAYYOM*

Unda bo'lmas ersa gar sendan nishon,  
Hech erur menga bu umri jovidon.

*Jaloliddin RUMIY*

Pir oldida topqusi murodin biling,  
Har kimki agar shogirdi sodiq bo'lgay.

*Zahiriddin Muhammad BOBUR*

Bilim ham hunar ol, qadrla uni,  
Bilim-la hunar ham qadrlar seni.

*YusufXos HOJIB*

Zehnli, vafoli, kishi afzuni,  
Qiladi kishiga fido o'zini.

*YusufXos HOJIB*

Hayotda qayrilib, egilgan kishi,  
Ustodlikka loyiq: bilim har ishi.

*Abulgosim FIRDAVSIY*

Osonlikcha kelmas shodlik, farog'at,  
Mehnatsiz qozonmas hech kishi shuhrat.

*Faxriddin JURJONIY*

Tikansiz gul, sadafsiz dur,  
Mashaqqatsiz hunar bo'lmas.

*MASHRAB*

## GANCH O'YMAKOR USTALARING HAYOTI VA IJODI

### BUXORO GANCH O'YMAKORLIGI MAKTABI

Usta Shirin Murodov

Ganch o'ymakorligining eng rivojlangan joyi Buxoro bo'lgan. Buxoro ustalaridan biri — akademik Usta Shirin Murodov (1879—1957). U 1879-yili Buxoro shahrida quruvchi ganchkor oilasida dunyoga keldi. Uning bobokaloni Umid mashhur ustalardan bo'lgan. Shirin 14 yoshigacha maktabda o'qiydi. Uni 12 yoshidan boshlab otasi qurilishlarga olib borar, ganch o'ymakorlik asboblarida ishlashni, oddiy zanjiralar o'yishni, pardoz turlari va oddiy naqsh kompozitsiyalari chizishni o'rgatar edi. Shirinni 14 yoshida (otasi va onasi vafot etgandan keyin) amakisi Usta Hayot qaramog'iga oladi. Shirin Usta Hayot yonida san'at sirlarini o'rganadi. Usta Hayot o'sha vaqtarda mashhur quruvchi ustalardan edi. U 20 dan ortiq shogirdlar tarbiyalagan, yetim bolalarni shogirdlari qilib o'z qaramog'iga olgan. Usta Safar, Usta Adiz, Usta Rahim, Usta Muxtor, Usta Savri, Usta Isom, Usta Akrom, Usta Jo'ra va boshqalar katta usta bo'lib etishdilar. Shirin o'sha davrning ganchkor va quruvchi ustalari bilan birga ishlaydi. Shirin faqat qurilishda ishlab qolmay, ustaning boshqa shogirdlari bilan virga uyda rasm soldi, o'simliksimon, geometrik naqsh kompozitsiyalari, binolarning ko'rinishini, chizma va xomaki nusxalarini chizishni o'rgandi. Usta Hayot ko'pincha mashhur ustalar bilan suhbatlashar, dunyo voqealari, bo'lib o'tgan hodisalar haqida gaplashib o'tirar edi. Shirin bunday suhbatlarning juda ko'vida qatnashadi. Ayniqsa, u O'rta Osiyo tarixini yaxshi o'rganadi. Shirin amakisi qo'lida o'n sakkiz yil ishlaydi. Shundan so'ng u shogirdlikdan usta darajasiga ko'tariladi. Qobiliyatli Shirin Murodovga amakisi bir necha binolarni bezatishni topshiradi. O'sha vaqtida usta nomini olish juda qiyin edi. Chunki shogird usta bo'lishi uchun nazariy hamda amaliy bilimlarni puxta egallashi, shundan so'ng bir qancha ustalar orasida fotiha olishi kerak edi. Buxorodagi hamma ganchkor ustalarga ganch sotadigan Abduqodir bir kuni Usta Hayotni chaqirib, yangi uy qurishi va uni ganch

o'ymakorligi bilan bezashi kerakligini aytadi. Usta Hayot bu ishga 22 yoshli Shirinni bosh qiladi. Bu Shirinning birinchi mustaqil ishi edi. Shirin avval uyning planini tuzadi, keyin uning yaxshi chiqishini ko'zlab, Buxorodagi o'zi yaxshi ko'rgan arxitektura yodgorliklarini sinchkovlik bilan o'rganadi. Ayniqsa, binoning umumiy ko'rinishi va mehmonxona bezaklari bejirim bo'lishini, nisbatlari saqlanishini, bir butun ko'rinish berishi va boshqalarni hisobga oladi. Shirin mehmonxona va ayvonlarni sharafalar bilan bezaydi. Undagi o'yma ganchlar juda mayin, bejirim chiqqanligi sababli ustalar orasida hurmati va obro'si oshadi. Usta Hayot bir kuni Shirinni oldiga chaqirib: Men sendan xursandman, endi mustaqil ishlayversang ham bo'ladi», deydi. Azaliy odatga ko'ra, Shirinni usta, shogirdlar o'rtasiga chiqarib, beliga eng yaxshi ganch o'ymakorlik asboblaridan shuturgardonni qistirib qo'yishadi. Shirin Murodov shundan so'ng usta bo'ladi. Usta Shirin uylarni g'ishtidan tortib tomini yopish, oxirgi pardozigacha bo'lgan ishlarni juda yaxshi bilar edi. U mehmonxonalarini, ayvonlarni bezaganda bichig'ini to'g'ri topardi, uyning yorug'lik tushayotgan tomoni, binoning baland-pastligi, naqsh nisbatlari, umumiy mazmunini hisobga olar edi. Borgan sari Shirinning hurmat va obro'si ko'tariladi. Lekin hasadgo'ylar u haqda har xil ig'volar tarqatadilar. Oqibatda bir kuni uni erta tongda uyidan olib ketib, zindonga tashlaydilar. Amir Ahadxon keyinchalik Usta Shirinning aybini kechirganday bo'lib, uni sarbozlikka safarbar qiladi. Usta Karmanaga jo'natiladi. Sarbozlik juda og'ir edi. Qochganlar qattiq jazolangan. O'sha vaqtleri Ahadxonning 20 mingdan ortiq sarbozi bor edi. Usta Shirin Karmanada chorborg' va saroylar qurilishlarida ishtirok etadi. U oddiy g'isht terishdan bezatishgacha bo'lgan hamma ishni qilardi. Oladigan kunlik maoshi besh tangagina edi. Usta Shirinning 4—5 yil ishlab, yiqqan narsasi besholtita adres to'n va salsa bo'ldi. O'sha yili qish qattiq kelib, ishni og'irlashtirdi. Qish kunlarining birida oyog'i va barmoqlarini sovuq urdi. Natijada umrbod oqsaydigan bo'lib qoldi. Ahadxon o'sha vaqtarda bir qancha bog'lar,

saroylar, uylar qurdirtirdi. Usta Shirin bu ishlarning hammasida qatnashdi. Ahadxon vafot etgach, Usta Shirin Buxoroga qaytdi. Ahadxon o'rniga o'g'li Olimxon amir bo'ldi. Olimxon o'ziga saroy qurdirmoqchi bo'ladi. Usta tanlar ekan, amir Usta Shirinning nomini ham tilga oladi. O'sha kuni Olimxon huzuriga Usta Shirincha chaqirtiradi va ertalabgacha tokchasiagi singan panjaralarни tuzatishni buyuradi, aks holda uni jazoga tortishini aytadi. Usta Shirinning qo'lida faqat bitta ganchkorlik asbobi bor edi. Shunga qaramay, u ertalabgacha panjarani o'z holiday qilib tuzatadi, shunday qiladiki, panjaraning ulangan joyi bilinmaydi. Amir Olimxon Usta Shirinning ishini ko'rib, aybini topolmaydi, aksincha, unga qoyil qoladi. Amir Usta Shirin ga Sitorai Mohi Xosani bezatishni topshiradi. Usta Shirin saroy hech bir boyning uyiga o'xshamasligi va ajoyib chiqishi uchun ko'p izlanadi. Nihoyat 2 oy deganda uyning oyna zaminli ganch o'ymakorligi bilan bezatiladigan xomaki nusxasini chizib bitiradi. Olimxonga reja va o'ymanning xomaki nusxasi ma'qul tushadi va ishni darhol boshlashni buyuradi. Usta Shirin uchta usta va shogirdlari bilan ish boshlaydi. Naqsh kompozitsiyalarini chizib, axtasini o'zi qiladi. «Oq zal»ning eng qiyin ishlarini o'zi bajaradi. Qo'shni xonani bezash uchun Usta Shirin o'sha vaqtida mashhur yog'och o'ymakor Usta Abduqodirni va naqqosh Hasanjonni taklif qiladi. Oq zal ajralib turishi uchun qo'shni xonanining ranglari to'qroq qilinadi. Usta Shirin o'yma ganch sifatiga juda katta ahamiyat beradi. Ba'zi noto'g'ri qilingan joylarni boshqatdan o'zi qiladi. Saroyni bezashda usta butun tajriba va bilimini ishga soladi. Nihoyat Sitorai Mohi Xosa saroyi bitkaziladi. Usta Shirin «Oq zal» devorlaridagi oynalarga ganchdan gul solib, «oyna pardozi» nusxasini yaratadi. Baland va katta zal keng derazalar orqali nurga to'lib turadi. Mayin va oppoq rangli ganch xonaga yorqinlik va tantana baxsh etadi. Hovlidagi chiroyli ko'm-ko'k daraxtlar va rang-barang gullar oyna fonida ajoyib manzara hosil qiladi. Kechki payt esa qandildagi shaim nuri o'yma ganch zaminidagi oynada o'y-nab, o'ziga xos joziba bag'ishlaydi. Bularning hammasi Usta Shirinning qanchalik yetuk usta ekanligidan dalolat beradi. Oq uy 1912-yilda boshlanib 1914-yilda bitkaziladi. Bu ish Usta Shirinning obro'sini yanada oshiradi. Usta Shirin Murodov keyinchalik, sho'ro zamonida kasal-xona, jamoat binolari va turar joy qurilishlarida

faol qatnashadi. U Buxoro Davlat pedagogika instituti binosining qurilishida ikki yil ishlaydi. Shundan so'ng S.Ayniy nomidagi Buxoro viloyati teatri binosining qurilishida qatnashadi. Usta Shirin Murodov me'mor B.N.Zasipkin boshchiligidagi IX—X asrlarda qurilgan Ismoil Somoni maqbarasini, XII asrda qurilgan Attor maqbarasini, XVI asrda qurilgan Mir Arab madrasasini, XVII asrda qurilgan Sulton Bayonqulixon maqbarasini va boshqa arxitektura yodgorliklarini qayta tiklash, ta'mirlashda faol qatnashadi. 1937-yilda Usta Shirin Murodov samarqandlik Shamsiddin G'ofurov, Tursun Ismoilov va boshqa ganchkor, yog'och o'ymakor, toshtaroshlar bilan Moskvadagi Butunit-tifoq qishloq xo'jaligi ko'rgazmasining qurilishiga taklif qilindi. U erda ustalar O'zbekiston va Turkmaniston (me'mor V. Amistin) pavilyonlarini bezadilar. Ayniqsa, Usta Shirinning ishi me'morlar tomonidan yuksak baholandi. 1939-yili Samarqandda O'zbekiston xalq amaliy san'ati ustalari qurultoyi bo'ldi. Qurultoya eng yaxshi ganchkor, kulol, yog'och o'ymakor, naqqosh va boshqa ustalar taklif qilindi. Qurultoya xalq amaliy san'atining ahamiyati, qurilish ustalari tayyorlaydigan mакtablar ochish, unda ganchkor, duradgor, naqqoshlar va boshqa ustalar tayyorlash kerakligi masalasi qo'yildi. Shundan so'ng Toshkentdagagi komediya teatrini bezatishga samarqandlik va buxorolik ustalar taklif qilindi. Bu ish ganch o'ymakor ustalarning o'z hunari, mahoratini ko'rsatishi uchun fursat bo'ldi. Usta Shirin teatr binosida Buxoro sharafasini emas, binoga mos bo'lgan mutlaqo boshqa sharafani naqshladi. Viloyat ijroiya komiteti binosi qurilishida Usta Shirin ajoyib sharafa va panjaralar ishladi.

1940-yil sentabrda Samarqanddagagi Sherdor madrasasida qurilish ustalari tayyorlaydigan kurs ochiladi. Unga yuzdan ortiq qobiliyatli o'quvchilar qabul qilindi. U erda Usta Shirin Murodov ganch o'ymakorligidan dars berdi. Usta Shirin o'z tajriba va mahoratini o'rgatish uchun Samarqandga ko'chib ketadi. 1940—1945-yillarda Usta Shirin Murodov yoshlarga naqsh turlari, islimiy va girih naqshlari qonun-qoidalarini, ularni binoda qo'llash, oddiy va murakkab sharafalarni chizish va ularni amalda bajarishni o'rgatadi. 1941-yili o'qituvchilar urushga jo'nadilar. O'sha yillari juda og'ir edi. Usta Shirin qiyinchiliklarga qaramay, arxitektor V.N.Zasipkin va N.SH.Lukashova bilan «Ganch o'ymakorlik san'ati» qo'llanmasini yozadi. Lekin

bu qo'lyozma redaksiyada bir necha chizma va fotolari bilan yo'qolib ketdi. 1943-yili Usta Shirin Toshkentdagi Muqimiy nomli teatr binosi bezagini bajarishga taklif etiladi. U binoni bezatishga emas, balki qurishga ham yordam beradi. Endi Usta Shirin Toshkentda yashay boshladi. Teatr binosi g'ishtini terishda mashhur farg'onaliq me'mor usta Yusuf Ali Musayev, samarqandlik Akrom Umarov va boshqalar qatnashdilar. Usta Shirin teatrga kiraverishdagi bo'rtma ustunlar, panjara, sharafalar va boshqalarni yasadi. Usta 1947-yili Muqimiy nomli teatrning kiraverishi-dagi yo'lak tepasi va asosiy, markaziy gumbazni ganch o'ymakorligi bilan bezadi. 1946-yili me'mor Alisher Navoiy nomidagi opera va balet teatri binosini qurishda qatnashdi. Usta Shirin bu yerda «oyna pardozi»ni ishlatdi. Devor va shiftlar ajoyib va murakkab sharafalar bilan bezatildi, nafis ishlangan qandillar osildi.

Usta Shirinning o'ymakorlik texnikasi o'ziga xosligi bilan ajralib turadi. Ganch materialidan ustalik bilan foydalanish, buxorocha o'ymakorlik, ganchkorlik ishlari, bezaklarning nafis va go'zalligi, kompozitsiyasining quvnoqligi, nozikligi bu texnikaga xos unsurlardan. Ustaga Alisher Navoiy nomli opera va balet teatri binosi qurilishida ko'rsatgan xizmatlari uchun Davlat mukofoti beriladi. 1947-yilda Toshkent markazida kurant qurildi. Bu bino loyihasini arxitektor A.A.Muxamedshin chizadi. Uni bezash Usta Shirin Murodovga topshiriladi. Usta Shirin ustunning yuqori qismiga bo'rtma ganch va har xil panjaralar o'yib ishlaydi.

Usta 1952-yildan 1957-yilgacha P. Benkov nomidagi bilim yurtida ganch o'ymakorligidan dars berdi. Ko'pgina shogirdlar tarbiyaladi. Ayni zamonda u amaliy faoliyatni ham davom ettirdi. Usta Toshkentdagi Sobir Rahimov nomli kinoteatrda o'yma ganch ishlarini bajardi. Undagi sharafa va panjaralar nihoyatda nafisligi bilan ajralib turadi. Usta Shirin Shohimardonagi Hamza Hakimzoda maqbarasi, Toshkentdagi Alisher Navoiy nomidagi adabiyot muzeyi, Yosh tomoshabinlar teatri, go'sht-sut sanoati ministrligi, sovxoziyalar ministrligi, Navoiy ko'chasidagi uch qavatlari uy lojalarini va havozali ichki sharafalarni (M. Bulatov va L. Karash loyihalari asosida), Orjonikidze rayonidagi kolxozi choyxonasining o'yma namoyon va panjaralarini ishladi.

Usta umrining so'nggi yillarda yana arxitektura yodgorliklarini qayta tiklashga taklif etiladi. U Buxorodagi Ulug'bek, Abdulazizzon madrasala-

ridagi murakkab sharafalarni mohirona ta'mirladi. Toshkentdagi Baroqxon madrasasining tokcha va sharafalarini qayta tikladi. Usta Madaniyat yodgorliklarini muhofaza qilish qo'mitasining buyurtmasi bilan 600 ga yaqin bichimda chizmalar ishlab, ularni ishlash yo'llarini yozib chiqdi. Tadqiqotda naqsh tuzish metodikasining nazariy tomonlari yoritilgan. Usta Shirin Murodovning shogirdlari juda ko'p. Ulardan Anvar Quliyev, Abdurasul Ibodov, Rauf Ibodov, Ibrohim Shermuhamedov, Ismatulla Ne'matov, Nazrulla Murodov, Tohir Jalilov, G'aybullha Ne'matov, Robijon Qurbonov, Aminjon Salomov, Mahmud Usmonovlar o'ziga xos maktab yaratgan ustalar bo'lib yetishdilar. Usta Shirin Murodovning ajoyib san'ati yuksak taqdirlandi. 1943-yilda Murodova O'zbekistonda xizmat ko'rsatgan san'at arbobi unvoni berildi. Shu yili O'zbekiston Fanlar akademiyasining birinchi sessiyasida uni O'zbekiston Fanlar akademiyasining faxriy a'zosi qilib saylashdi. Usta orden va medallar bilan mukofotlandi. Usta Shirin Murodov 1957-yil 12-fevralda Toshkentda vafot etdi. Lekin uning nomi xalq dilida va tilida abadiy yashaydi hamda yashamoqda. Ustaning yaratgan boy an'analari shogirdlari tomonidan rivojlantirib borilmoqda.

## TOSHKENT GANCH O'YMAKORLIGI MAKTABI

Toshkentda ganch o'ymakorligi qadimdan rivojlanib kelayotgan san'at turlaridan biridir. Bu mactabdan Usmon Ikromov, Usta Toshpo'lat Arslonqulov, Mahmud Usmonov, Hayot Abdullayev, Ziyodulla Yusupov, Tohir Umarov kabi qator yetuk ustalar yetishib chiqqan.

### Toshpo'lat Arslonqulov

O'zbek ganchkorlik san'atining mashhur ustalaridan biri Toshpo'lat Arslonqulov 1882-yili Toshkent shahrida ganch o'ymakor usta oilasida tug'iladi. Otasi Arslonqul Nazarov o'sha davning mashhur ustalaridan edi. Uning otabobolari ham ganch o'ymakor bo'lgan. Arslonqul Nazarov o'g'liga 12 yasharligidan hunar o'rgata boshlaydi. Toshpo'lat naqsh kompozitsiyalar tuzish, ularni o'yib, pardozi, ayniqsa, choka pardozi berish yo'llarini va boshqalarni otasidan o'rgandi. Toshpo'lat ko'p yillar davomida otasiga yordamchi bo'lib yurdi. U avval otasiga ganch

qorib berib turdi, keyin naqshlar zaminini o‘ydi, so‘ngra oddiy pardozlarni bajardi. Toshpo‘lat asta-sekin murakkab vazifalarni bajara boshladi, ba’zi kompozitsiyalarini o‘zi mustaqil tuzadigan bo‘ldi, uning xatolarini otasi ko‘rsatib turdi. Asta-sekin Toshpo‘latni ishga taklif eta boshladilar. Ota-bola Toshkent, Qo‘qon, Samarqand, Buxoro, Farg‘ona kabi shaharlarda mahalliy boylarning mehmonxonalarini, saroylari ni ajoyib ganch o‘ymakorlik ishlari bilan bezadilar. Toshpo‘latning nomi ko‘pgina shaharlarga yoyildi. U xonani o‘yma gulli namoyonlar, tokchalar, kitoba va boshqalar bilan bezar, chetiga zanjira va ruta islimli hamda geometrik naqshlar ishlari edi. Xonaning nur tushadigan joylariga ko‘pincha ganch panjara qo‘yardi. XIX asrning oxirlarida ota-bola Yusuf Davidovning uyini ganch o‘yma bilan bezaganlar. Bino juda baland va serhasham bo‘lgan. Uyning shiftini ko‘tarib turish uchun muqarnas boshli ustunlar qo‘ylgan, xonalarga o‘ziga xos o‘yma va bezaklar tannangan. Mehmonxona va ayvonnning bichimi juda yaxshi tuzilgan va uning balandligiga mos nisbatda izora, namoyon, tokchalar, frizlar to‘g‘ri ishlatilgan. Ayvonning o‘rtalik devorlariga har xil shakldagi namoyonlar ishlangan, ayniqsa, majnuntol va bir qancha islimiy namoyonlar o‘zining dinamikligi bilan kishini maftun qiladi. Har bir namoyonning atrofi har xil qalinlikdagi geometrik zanjiralar bilan o‘ralgan. Bu namoyon kompozitsiyalarining ko‘rkamligini oshirgan. Zanjiradan keyin rax qoldirilgan. Xonadagi har bir namoyon atrofi duraftor hoshiya islimiy naqsh bilan o‘ralgan. Kitobaga esa to‘rtburchak yuziga mos «besh-sakkiz-o‘n ikki» raxli girih kompozitsiya ishlangan. Uning atrofi o‘ziga xos geometrik zanjira bilan o‘ralgan. Izoraga geometrik naqsh kompozitsiyasi o‘ylgan. Bino ayvонida muqarnasli tokcha, deraza atrofiga geometrik naqshlar o‘ylgan. Ganch o‘ymakorligining zamini yashil, havorang va qizil ranglar bilan bo‘yalgan. Ganch o‘ymakorligini Toshpo‘lat Arslonqulov choka pardozda bajargan. Pardoz berilayotganda xonaga tushayotgan yorug‘lik hisobga olingan. Toshpo‘lat Arslonqulov har bir tokcha, hoshiya, taxmon atrofini ikki qator har xil geometrik zanjiralar bilan o‘rab chiqqan, bu o‘yma naqshlar ko‘rimlilagini oshirgan.

1902—1903-yillarda A. Polovsevning uyi o‘zbek milliy naqshlari bilan bezatildi. Uyning ayvoni, katta mehmonxonasi va yotoqxonasi juda

jimjimador qilib bezalgan. O‘yma naqsh kompozitsiyasida shobarg va to‘pbarglar yirik, jimjimador qilib bezatilib, o‘yma choka pardoz berilgan. Devorlarga o‘ylgan ganch o‘yma namoyonlar vertikal hamda gorizontal joylashtirilgan bo‘lib, atrofi mayda, ensiz zanjira, islimiy ruta, ya’ni hoshiya naqshlar bilan o‘ralgan. Namoyonlar xuddi yuqoriga qarab o‘sayotgan o‘simlikni eslatadi. Bu esa Usta Arslonqul ota va T.Arslonqulovning tabiat qoidalariga asoslanib, kompozitsiyani yanada jonli va tabiiy chiqara olganini, mahoratini ko‘rsatadi. T.Arslonqulov gorizontal joylashtirilgan ikki peshtoqni o‘yib, bu peshtoqlarga turunjsimon islimiy kompozitsiyasi ishlagan. Bu namoyonlar lo‘la pardoz asosida bezatilgan. O‘yma chuqurligi 10 mm atrofida, derazadan tushayotgan yorug‘lik hisobga olingan, pardoz turlari to‘g‘ri tanlangan. Binodagi o‘yma naqshga, oppoq ganch zaminiga yashil va havorang berilganligi uni juda nafis qilib ko‘rsatadi. Namoyonga kishi xoh uzoqdan, xoh yaqindan qaramasin, u jozibador ko‘rinadi.

1910-yilda arxitektor A. Burmeyster usta Toshpo‘lat Arslonqulovni qurilish ishlariiga jalb qiladi. U qurilishda rus arxitektorlari — I. Markevich va quruvchilar G. Svarchevskiy, K. Tiltina va boshqalar bilan birga ishladi. U rus arxitektorlaridan ko‘p narsalarni o‘rgandi. Keyinchalik Toshpo‘lat Toshkentdagisi va Qo‘qondagi ko‘pgina rus binolarini quyma usulda bezadi. Arslonqulov rus ustalari ichida yurib, rus tilini yaxshi o‘rgandi va qurilishga oid ruscha adabiyotlar bilan tanishdi. Bular esa usta ijodiga ijobiy ta’sir etdi. Usta ruscha «lepka» usulini juda yaxshi o‘rgandi.

Toshpo‘lat Arslonqulov bezagan binolarining ayrimlari hozirgacha saqlanib qolgan. Usta «Azov Don» banki (hozir davlat banki), sobiq «Natsional» mehmonxonasi (hozirgi Sharq mehmonxonasi), sobiq xalq uyi, Bixovskiy uyi, Qo‘qondagi «Rus Osyo», hozirgi davlat banki va shu singari binolarni yevropacha qurib, lepka usulida bo‘rtma hoshiya naqshlar bilan bezadi. Ba’zi joylarda bo‘rtma quyma usulini ishlatdi. Toshpo‘lat Arslonqulovning tajribasi yil sayin oshdi. Usta sho‘rolar davrida yirik qurilishlarda faol ishtirot etdi. Me’mor Markevich va boshqalar taklifi bilan 1929-yili Toshkent shahrida O‘zbek Davlat akademik drama teatri binsining bezak ishlarini T.Arslonqulov bajardi. U foye, devor, teatrning fasadlarini turunj va doira naqshlar, teatrning ichki qismlarini islimiy hoshiya naqshlar bilan

bezaydi. Bu bezaklar rus lepkasiga o'xshab ketadigan uslubda bajarilgan. Afsuski, bu bino bizgacha yetib kelmagan. 30-yillarda Toshpo'lat Arslonqulov Toshkent viloyati ijroiya komiteti (hozirgi Adabiyot muzeyi) binosini ganch o'ymakorligi bilan bezaydi. 1936—1938-yillarda Moskvadagi Butunittifoq qishloq xo'jalik ko'rgazmasidagi O'zbekiston va Turkmaniston pavilonlarini bezashga o'z hissasini qo'shdi. 1939-yili S.Polupanov boshchiligidagi Toshkent ijroiya komiteti va estrada teatri binosini ganch o'ymakorligi bilan bezatdi. Bu bezaklarning kompozitsiyasini S.Polupanov chizadi, T.Arslonqulov bajaradi. Ular lepka usulida ishlangan. Geometrik naqshlar, musiqa asboblari, paxta, bug'doy va boshqalar barelyef shaklida taxtani o'yib ishlangan, bu esa ustaning fantaziysi boy ekanligidan dalolat beradi. Navoiy nomli opera va balet katta teatrini qurban ustalar ichida Toshpo'lat Arslonqulov ham bor edi. U shogirdlari bilan Toshkent zalini, vestibul va foyelarni bezadi. Teatr mehmonxonasini bezashda quyma usulidan foydalandi. Ko'pgina nusxalar chizib, qoli plar tayyorladi. Qoli plar asosida nusxalar tayyorlab, devorlarga yopishtirdi. Usta avval ma'lum o'yma naqsh taqsimini o'yib, uning asosida qoli p olar va qoli pga moy yoki kerosinda shamni eritib surtib, suyuq ganch quyib, qotganidan so'ng nusxa olar, nusxaning birikkan joyini pardozlar edi. Devor va shiftlariga yopishtirilgan ganch taxtalarning ulangan joylari tekislanardi. A.Shchusev teatr zali uchun ganch o'ymakorligining xomaki nusxasini chizib berdi. O'ymalarni esa T.Arslonqulov bajardi. Usta biror xonaga kompozitsiya chizar ekan, naqsh bitganda qanday chiqishi, zamini, o'ymasi, uning ingichka yoki yo'g'onligini, xona yorug'ligini hisobga olar va o'ziga xos pardoz turlarini tanlar edi. O'z ishida o'zbek milliy an'analariga suyanardi. T.Arslonqulov arxitektor R.Abdurasulov bilan zallarning naqsh kompozitsiyalarini tuzdi. U zalning devor qismini teng uch qismiga bo'lib, friz qismini o'simliksimon o'yma naqsh bilan bezadi. Shiftga geometrik naqsh kompozitsiyasini gir aylantirib, o'rtasiga barelyefli bo'rtma geometrik turunj tushirdi hamda ajoyib o'yma qandil yasadi. Usta Toshkent zalini «majnuntol», «paxta gul», «pushak islimi», «islimi palak», «kuzagi islimi» va boshqa o'yma kompozitsiyalar bilan bezadi. Uning o'ymalari chuqur bo'lib, xuddi lepka usulida bezatilganga o'xshab ketadi. T.Arslonqulovning o'yma «palak» kompozitsiyasi

judayaxshi chiqqan. Islimiylar naqshli to'rburchak rom ichiga doira shaklida o'yma naqsh ishlangan. Aylana markazida 8 raxli girih, keyin aylana va qo'sh rax, so'ngra aylana islimiylar naqsh, niroyat duraftor hoshiya naqsh tushirilgan. Bu «palak» kompozitsiya dinamikligi va o'ziga xosligi bilan diqqatni jalb etadi. Bu kompozitsiyalar xonaning ko'p joylarida turli kombinatsiyalarda ishlatilgan. Usta eshik tepasiga gorizontal holatda «pushak islimi» namoyon ishlagan, bu o'yma ham o'ziga xos. T.Arslonqulov Termiz zalini bitkazishga yordamlashgan hamda Farg'ona zaliga hoshiyalar uchun qoli plar tayyorlagan.

Toshpo'lat Arslonqulov muzeylar uchun ham bir qancha namoyon, frizlar yasagan. 1951-yili Leningraddagi etnografiya muzeyi uchun uchta namoyon tayyorlab bergan. Ularning birinchisi — «majnuntol», ikkinchisi — «chor kunj islimi», uchinchisi — «pushak islimi» kompozitsiyalaridir. Usta O'zbekiston Davlat san'at muzeyi uchun ham bir nechta namoyon ishladi. Toshpo'lat Arslonqulov juda ko'p shogirdlar tayyorladi. U ganch o'ymakorligidagi tajribalarini yoshlarga o'rgatdi. Ganch o'ymakorligi to'garagi ochib, m'aktab o'quvchilariga ganchkorlik sirlarini o'rgatdi. 1952-yildan boshlab P.P.Benkov nomli badiiy bilim yurtida ganch o'ymakorligidan dars berdi. I.Zaynudinov, I. Romanov, S. Beoxin, V. Zufarov kabi shogirdlar tayyorladi. U shogirdlari bilan ko'pgina binolardagi ganch o'ymakorligi ishlarini bajardi. Usta san'at dekadalari va ko'pgina ko'rgazmalarda qatnashdi, bir qancha mukofotlar olishga sazovor bo'ldi.

T.Arslonqulov 1962-yili Toshkent shahrida vafot etdi. Unga xalq amaliy san'atini rivojlantirishga qo'shgan hissasi uchun 1944-yili O'zbekiston xalq rassomi unvoni berildi. Usta Davlat mukofoti, orden va medallar bilan mukofotlandi.

## Usmon Ikromov

Usmon Ikromov 1875-yili Toshkentda tug'iladi. U yoshlik paytidan ganch o'ymakorligiga qiziqib, mashhur usta Rasulhojiga shogird tushdi. Usmon Rasulhojining qo'lida sakkiz yil ishlaydi. Shundan so'ng usta Rasulhoji unga oq fotiha beradi. U keyinchalik yetuk ustalar qatoridan o'rinn oladi. Usta Usmon Ikromov ko'pgina uylarni qurish va bezashda qatnashib, ajoyib ganch o'ymakorlik ishlarini bajaradi. U o'ziga xos uslubdagisi san'atni yaratdi. Bizgacha u yaratgan

o'yma ishlardan ba'zi birlarigina etib kelgan, uning ayrim o'yma ishlari O'zbekiston san'at muzeyida saqlanmoqda. Uning naqsh kompozitsiyalari rang-barangligi va tabiiyligi bilan ajralib turadi. Usmon Ikromov oz naqsh elementlaridan foydalanib, murakkab naqsh kompozitsiyalari yaratgan. Usmon Ikromov ko'pgina binolarni qayta tiklashga o'z hissasini qo'shdi. U 1941—1943-yillarda Toshkentdag'i Polovsev uyining (hozirgi Amaliy san'at muzeyi binosi) o'yma naqsh bezaklarini qayta tikladi. Usta Usmon bu binoda guldaста ustunni va ravoq atroflarini bezadi. U XV—XVI asrlarda keng tarqalgan guldaста shaklini yangicha usulda islimiy ruta, olti, sakkiz, beshu sakkiz raxli girihi lar bilan ishladi. Usta Usmon binoning old tomonini, qo'sh guldstali ustunni va ravoq atrofini ajoyib qilib bezadi. U avval qadimiy ganchkorlik namunalari bilan tanishib, Usta Shirindan maslahat oldi. Ustunning ko'ndalang ikki qatoriga girihi, qolgan qatorlariga islimiy rutalar o'ysi. U. Ikromov viloyatlardan kelgan ustalar qatori Navoiy nomli opera va balet katta teatrini bezashda qatnashdi. U choka va lo'la pardozni ko'p ishlatdi. Usmon Ikromov ko'pgina shogirdlar yetishtirdi. Ana shunday ajoyib shogirdlaridan biri o'g'li Mahmud Usmonovdir.

### Mahmud Usmonov

Mahmud Usmonov Toshkent shahar Ko'k-chcha dahasi, Obinazar mahallasida 1910-yil 3-yanvarda tug'ilgan. Otasi Mahmudga yoshlik chog'idanoq turar joylarni bezash sirlarini o'rgatdi. U avvaliga oddiy o'simliksimon va geometrik naqshlar chizishni, so'ng esa ganch clashdan tortib, to pardoz berishgacha ishlarni o'rgandi. Usta Usmon Ikromov uy bichimini juda to'g'ri topar va uning sirlarini yosh Mahmudga o'rgatar edi. Osha vaqtida u 15 yoshlarda bo'lib, mehmonxonalar, avyonlarni bezashda ishtirot etardi. Bora-bora Mahmud Usmonov ganch o'ymakorligining har xil turlarida bemalol ishlay oladigan mustaqil usta bo'lib etishdi. U 1936—37-yillari o'rgangan bilim va hunarini bolalarga o'rgata boshlaydi. Chunonchi, 36-bolalar uyida va maktablarda ganch o'ymakorligi to'garaklarida dars berdi. 1938-yilda O'zbekiston san'at muzeyining o'ymakorlikka oid eksponatlarini ta'mirlashda, 1940-yilda sobiq Polovsev uyining bezaklarini qayta tiklashda, 1943—1944-yillari hozirgi

Muqimiyl nomli teatrni bezashda, 1945—1947-yillarda A. Navoiy nomli teatr binosini qurishda qatnashdi. Usta Mahmud Usmonov Rassomlar uyushmasiga qabul qilinib, ijodi yanada ravnaq topadi. U o'sha vaqtlardanoq har xil ko'rgazmalarga qatnashadi, muzeylar uchun ganch o'ymakorlik namunalarini tayyorlab beradi. 1950-yildan boshlab Toshkent shahar o'quvchilar saroyida ganch o'ymakorlik to'garagini boshqardi. U ganchkorlik san'atining sirlarini o'quvchilarga o'rgata boshladi. O'quvchilarga iskana qalam bilan ganch o'yishni, minqor bilan uning zaminini tozalashni, shuturgardonda pardoz berishni o'rgatdi. Uning qilgan ishlari har xil ko'rgazmalarda namoyish etilib, ko'pgina faxriy yorliq va mukofotlarga sazovor bo'ldi. Usta Mahmud Usmonov shogirdlar tayyorlab, ular bilan bir necha binolarni bezadi. 1953-yili Mahmud Usmonovning iltimosiga ko'ra P. Benkov nomidagi o'quv yurtida ganch o'ymakorligi bo'limi ochildi. Bu yerda Mahmud Usmonov 1953-yildan 1960-yilgacha ganch o'ymakorligidan dars berdi. 1957-yili Usta Mahmud qirqa yaqin shogirdi bilan Usta Shirining mashhur Sitorai Mohi Xosa saroyidagi ganch o'ymakorligini qayta ta'mirladi. Bu ish usta uchun katta maktab bo'ldi. U 1961-yili Alisher Navoiy nomidagi Akademik opera va balet katta teatrining ganch o'ymakorlik bezaklarini shogirdlari bilan qayta tikladi.

1966-yili Toshkent shahrida yer qimirlashi natijasida ko'pgina uylar vayron bo'ldi, arxitektura yodgorliklariga shikast etdi. Bu arxitektura yodgorliklarini, jumladan Kurant binosini ta'mirlash Mahmud Usmonovga topshirildi. U o'z shogirdlari bilan ishni ko'ngildagidek bajardi. Mahmud Usmonov ganch o'ymakorligiga ajoyib yangilik kiritdi, ya'ni yog'och o'ymakorligida ishlatiladigan chakich zaminni ganch o'ymakorligida qo'llab, o'yma kompozitsiyani yanada mayinlashtirdi. Bu ishni avval hech bir usta qilmagan edi. Chakich zaminli naqsh kompozitsiyaning chakichlangan yuzasi umumlashib, tekis o'yilgan joylarga qaraganda oqish ko'rindi, natijada kompozitsiyani mayinlashtirib ko'rsatadi. Bu usulni Mahmud Usmonov boshqa joylarda ham ko'p qo'lladi. Ustaning ganch o'ymakorligiga xos xarakterli jihat shundaki, uning deyarli hamma kompozitsiyalarida paxta naqsh elementi ishlatilgan. Usta 1967-yili O'zbekiston Ministrlar Soveti binosini ganch o'ymakorligi bilan bezaydi. Zal bezagi uchun usta

ikki xil nusxa tayyorladi, ulardan biri olti raxli, ikkinchisi qo'shqavatli giriҳ edi. M.Usmonov ustunlarga pargori islimiy naqsh berib, ajoyib asar yaratdi, binoni bezatishda pax pardozdan foydalandi. 1967-1968 yillarda Mahmud Usmonov Akademik drama teatrini bezadi. U bu yerda qirma, choka, tabaqa pardozdan foydalandi. Bu asar Mahmud Usmonov ijodining eng yaxshi namunalaridan biridir.

1968-yili ustaga Markazqo'm ma'muriy binosini ichki ganch o'ymakorligi bilan bezash topshirildi. Bu yerda M. Usmonov ganch o'ymakorligining ajoyib namunalarini yaratdi, ayniqsa, «Xalqlar do'stligi» kompozitsiyasi ko'rkar chiqqan. U xalqlar do'stligini badiiy ifodalashga erishdi. Bunda chizmalar nisbati, o'yma naqshning dinamikligiga katta e'tibor berilgan. Bu yer choka va qisman pax pardozda ishlandi. Binoda chakich uslubi yaxshi qo'llandi.

1968-yili Mahmud Usmonov O'zbekiston qishloq xo'jalik vazirligi binosining majlislar zalini ganch o'yma bilan bezadi. Bu yerda naqshlar 1,5 sm o'yilib, choka pardoz bilan bezalgan. Ayniqsa, islimiy naqshlarning nafisligi va dinamikligi kishini jalb qiladi. O'sha yili usta Alisher Navoiy nomli Adabiyot muzeyini ham bezadi. U bu yerda geometrik va o'simliksimon naqsh elementlaridan foydalanib, o'ymalarga choka pardoz, ba'zi joylarda pax va tabaqa pardoz berdi. Usta, shuningdek, Toshkentdagagi markaziy univermag, «Bahor» konsert zali, Samarqand-dagi aeroport binosini, Registon maydonidagi restoranni, O'zbekiston San'at muzeyini, Surxondaryo viloyatidagi musiqali drama teatri binosini bezadi. 1971—74-yillarda Kiyev, Donetsk, Toshhovuz, Chimkent va boshqa joylarda jamoat binolarini bezadi. 1979-yili Mahmud Usmonov San'atshunoslik instituti binosini e'yma ganch bilan bezadi.

Usta Mahmud Usmonov faxriy yorliqlar, orden va medallar bilan mukofotlandi. Unga 1967-yili O'zbekistonda xizmat ko'rsatgan san'at arbobi, 1974-yilda «O'zbekiston xalq rassomi» unvonlari, Davlat mukofotlari berildi.

Mahmud Usmonovning qobiliyatli shogirdlari ko'p. Ular o'z ishlarni chet ellarda, jumladan, Hindiston, Polsha, Yaponiya, Amerika va boshqa mamlakatlarda namoyish etdilar. Uning Mirziyod Karimov, Hayotilla Abdullayev, Abdurahmon Sultonov, Mirvohid Usmonov, Anvar Po'latalov, Mirmahmud Rahmatov, Habibiddin Muradov, Mo'min Sultonov, Faxriddin Hamda-

mov, Abduqayum Samadov, Ziyovuddin Yusupov, Rauf Ibodov, Umar Tohirov, Yusuf Odilov kabi shogirdlari bor. Shogirdlar M.Usmonov an'analarini davom ettirmoqdalar.

### Mirvohid Usmonov

Toshkent ganchkorlik maktabining yirik namoyandasasi, O'zbekiston Badiiy akademiyasining akademigi, O'zbekiston Xalq rassomi Mahmud Usmonovning o'g'li, ustazoda Usmonov Mirvohid 1946-yil 9-mayda Toshkent sahrida tavallud topgan. U yoshlik davridanoq otasining ganchkorlik to'garagiga qatnashib, bu san'at sirlarini sinchkovlik va zo'r qiziqish bilan o'rgandi. O'zbekiston xalq ustasi (2001) Mirvohid Usmonov 1972-yili Toshkent Politexnika institutining me'morchilik fakultetini tugatgan.

U yoshlikdanoq otasi tashkil etgan ganchkorlik guruhida juda ko'p jamoat hamda turar joylarni badiiy bezashda qatnashdi.

1966-yili Mirvohid Usmonov Navoiy nomli opera va balet teatri binosining ichki bezaklarini ta'mirlashda qatnashdi.

O'zbekiston tarixi muzeyi, Toshkent metro-politenining "Buyuk ipak yo'li", "Amir Temur" bekatlarini hamda Toshkent, Andijon, Samarqand, Buxoro, Termiz shaharlaridagi yirik me'moriy binolarni bezatishda mualliflik ishlarni bajargan. Chet ellarda ham katta binolarni o'zbek amaliy bezak san'ati an'analarini asosida bezagan. Xususan, u Malayziyadagi muzey binosini bezadi. Uning yuzdan ortiq shogirdlari bor.

### Ziyovuddin Mirqodir o'g'li Yusupov

1950-yili Toshkent shahrida kulol usta oilasida tug'ilgan. Ziyovuddin yoshlik chog'idan ganchkorlik hunariga qiziqlidi. U 1964-yili Toshkentdagagi Respublika o'quvchilar saroyi huzuridagi ganch o'ymakorlik to'garagiga qatnasha boshladи. Unga ganch o'ymakorlik sir-asrorlarini O'zbekiston xalq rassomi, Davlat mukofoti laureati Mahmud Usmonov o'rgatdi. Maktabni bitirgach, Toshkent Politexnika institutining me'morchilik bo'limida tahsil oldi.

U 1975-yili Yo'ldosh Oxunboboyev nomli o'quvchi va yoshlar uyida ganch o'ymakorlik to'garagini tashkil etdi. 1975-77- yillar davomida ko'pgina shogirdlar tayyorladi. Usta 1977-yili ijodiy uyushma tashkil etdi.

Ziyovuddin 1960-yili otasi bilan Buxoro shahriga safarga borganida Sitorai Mohi Xosa binosini ko'rib hayratga tushgan edi.

Akademik Usta Shirin Murodov tomonidan bajarilgan mashhur "Oq uy"ning arkalari, muqarnaslar, ko'zgu yuzasida nihoyatda nafis o'yilgan naqshlar uni o'ziga maftun qilgan edi. Yuksak did, mahorat, iste'dod va katta mehnat evaziga yaratilgan bu ulkan san'at asari unda Shirin Murodov kashf etgan toshoyna ganch o'ymakorligiga qiziqish uyg'otdi.

U mustaqil ravishda bir-birini takrorlamaydigan bezaklar bajara boshladi. Usta dastlab "Guliston" restorani, Urganch shahridagi Oghay nomli teatr, Toshkent temir yo'l bekti, Krasnoyarsk shahridagi "Bahor" qahvaxonasi, O'zbekiston Yozuvchilar uyi, "Yulduz" tikuvchilik firmasi va boshqa binolarni ajoyib naqshlar bilan bezadi.

Ustaning ijodiga xos xarakterli xususiyat shundaki, u zamonaviy binolarning balandligi, kengligi va funksiyasiga mos holda zamon talabiga javob beradigan asarlar yaratadi.

Usta respublika va xalqaro ko'rgazmalarda ijodiy asarlari bilan qatnashdi. 1998-yilgacha xalq ustalari birlashmasida faoliyat ko'rsatdi, ko'plab shogirdlar yetishtirdi. Ellikdan ortiq san'at saroylari, zamonaviy memorial komplekslar, ma'muriy va maishiy binolarning interyer va ekstryerlarini bezatdi.

### Saidikrom Muxtorov

Saidikrom Muxtorov (1973) Toshkent shahrida usta ganchkor oilasida tavallud topdi. Ustozoda Saidikrom dastlabki saboqni otasi Asrol Muxtorovdan oldi. U otasi rahbarligidagi guruh a'zolari bilan birgalikda Chirchiqdagi kimyogarlar saroyida, Toshkent xalqaro aeroportida, Toshkentdag'i bir necha qahvaxonalarda, "Turkiston" saroyida, Savdo vazirligi binosida, Ahmad Al Farg'oniy ob'ektida, Toshkentdag'i Yunusobod suzish havzasasi va boshqa ko'plab inshootlarda ganch o'ymakorligi ishlарini bajargan. Saidikrom tinmay izlandi va mehnati tufayli 1997-yilda O'zbekiston Badiiy akademiyasiga a'zo bo'ldi. Usta qolip, model, quyma usullardan keng foydalanadi. U panjara, ustun, ark, bra va o'yma qandillarni yasashga turli yangiliklar kiritib, bezak ishlарini takomillash-tirishga katta hissa qo'shib kelmoqda.

### Mirmahmud Rahmatov

O'zbekiston xalq ustasi Mirmahmud Rahmatov 1950-yil 18-fevralda tug'ilgan. U o'rta maktabda o'qib yurgan paytalarida Mahmud Usmonov rahbarligidagi ganch o'ymakorligi to'garagiga qatnashib, bu san'at sirlarini o'rgangan.

1966-yili usta Mahmud Usmonov ganchkorlar guruhi tuzib, Mirmahmudni ham guruhga a'zo etib qabul qildi.

Mirmahmud mehnatsevarligi va ijodkorligi bilan o'zini ko'rsatdi hamda hurmat qozondi. Keyinchalik u mustaqil guruh tashkil etdi va ko'pgina jamoat binolarini bezadi. Hozirda uning 50 dan ortiq shogirdlari mustaqil ganchkorlik guruhlari tashkil etishib, jamoat va turar joylarni o'yma ganch bilan badiiy bezamoqdalar.

### Asrol Muxtorov

Asrol Muxtorov ganchkorlikni rivojlantirishga ulkan hissa qo'shgan usta. U Mahmud Usmonovning shogirdlaridan biridir.

U 1948-yili Toshkent shahrining «Bekobod» mahallasida tavallud topdi. Asrol Muxtorov xalq amaliy bezak san'atiga, jumladan ganchkorlik hunariga yoshligidan qiziqdi. Bu qiziqish uni 1960-yili Toshkentdag'i o'quvchilar saroyiga olib keldi.

Abdurahmon Hayotov, Usta Murod, Usta Nosir, Usta Hoji Hofiz, Usta Azim, Usta G'ofur, Usta Shirin Murodov, Jalil Mirasulov, Mahmud Usmonov, Ro'zimat Mashari pov, Usta Sulaymonqulov, Yusuf Xudoyberganov singari ganch o'ymakorligi ustalarining ishlari uning uchun katta mакtab bo'ldi. Ganchkorlik to'garagi rahbari mashhur ganchkor Muhamud Usmonov Asrolga naqsh gullar namunasini albomda chizishni va o'yishni o'rgatdi.

Asrol futa, kulcha, qandil va boshqa o'yma naqshlar ishlab, qo'rgazmalarda qatnasha boshladi. Uning o'yma ishlari Germaniya, Polsha, Chexoslovakiya, Rossiya va boshqa xorijiy davlatlarda namoyish qilindi.

1966-yili Toshkent shahrida yer qimirlashi natijasida ko'pgina uylar vayron bo'ldi, me'mor-chilik yodgorliklariga shikast etdi. Asrol Muxtorov ustozni Mahmud Usmonov bilan O'zbekiston Vazirlar Mahkamasi, Qishloq xo'jaligi vazirligi, Alisher Navoiy nomli Adabiyot muzeyi, Alisher Navoiy nomli katta opera va balet teatri binolarini bezashda faol qatnashdi.

1975-yildan boshlab Asrol Muxtorov Respublika o'quvchilar va yoshlar saroyida ganchkorlik to'garagiga rahbarlik qildi.

1979-yilda usta Mahmud Usmonov A.Muxtorovning yetuk usta bo'lganini ko'rib, unga oq fotiha berdi.

Toshkentda M.Usmonov taklifi bilan «Usto» birlashmasi tashkil etilgach, birlashma qoshida A.Muxtorov mustaqil ganchkorlik brigadasini tuzdi. U o'z guruhi bilan Qashqadaryodagi – «Salom» choyxonasi, Toshkentdag'i «Dilorom» qahvaxonasi va boshqa jamoat binolarini bezadi.

Asrol Muxtorov 1980-yilda Aloqa vazirligi qoshida yangi ganchkorlik guruhini ochdi. Bu guruh 1985-yilgacha faoliyat ko'rsatib, aloqa uylari, bo'limlari, idoralari, Aloqa vazirligi zallarini ganchkorlik namunalari bilan bezadi.

1986–1991-yillari ganchkorlik guruhi Toshkentda «Tovus» va «Chayka» qahvaxonalari, Tashqi ishlar vazirligi, shahar hokimligi, Energetika va qishloq xo'jaligi vazirliklari binolarini bir-biriga o'xshamagan o'yma ganch namunalari bilan bezadi.

1991–1998-yillar davomida ustanning san'ati yanada taraqqiy etdi. Ganchkorlikda zamonaviy usullardan foydalanish tamoyili kuchaydi.

Yangi izlanishlar natijasida o'yma va quyma usulidan erkin foydalanildi va bu borada katta yutuqqa erishildi. Ayniqsa, ustanning ishlarida ganchkorlik, naqqoshlik, kulolchilik va miniatyura san'atining uyg'unligi kuchaydi. Toshkent xalqaro aeroportining yangi binosi, Chirchiq shahridagi Kimyogarlar san'at saroyi, «Turkiston» saroyi, «Anhor» qahvaxonasi, Baynalminal madaniyat markazi, Oliy Majlis binolari, Uchtepa tumanidagi «Baxt uyi», Farg'onadagi teatr zali va hokazolarda bu uyg'unlik ko'zga yaqqol tashlanadi. Hozirgi kunda ustanning O'zbekiston Badiiy akademiyasiga a'zo shogirdlari – Isroil Rajabov, Mahmud Obidov, Abdiazim Ahrorov, Abdurahmon Ahrorov, Davron Usmonov, Zafar Ibragimov, Faxritdin G'oziboyev, Soibjon Salimov, Abdurahmon Obidov, Hikmat Azimov, Nig'matilla Yusupov, Saidikrom Muxtorov, Mahamatjon Po'latov, Sirojiddin Boymatov, qo'qonlik Nuriddin Usmonov va boshqa iste'dodli shogirdlari ustozlaridan oq fotiha olib, dunyoning turli mamlakatlarida ganch o'ymakorlik ishlarini bajarmoqdalar.

Asrol Muxtorov ustalar orasida birinchilar- dan bo'lib «O'zbekiston xalq uestasi» unvoniga sazovor bo'ldi.

U keng kitobxonlar tomonidan qiziqish bilan kutib olingan: «Usto va shogird odobi» va «Ganchdagi gullar bog'boni» asarlarini chop ettirdi. U bu kitoblarda mashhur uestozi – akademik Mahmud Usmonov, shogirdlari, do'stlari, umuman, ganchkorlik san'ati va bu san'at taraqqiyotiga hissa qo'shgan kishilar haqida samimiy dil so'zlarini izhor etgan.

### Salimov Soibjon Norovich

Soibjon Norovich Salimov 1949-yilda Toshkent shahrining Shayxontohur tumanida tug'ildi.

1966-yili o'rta maktabni tugatib, Toshkent politexnika institutining arxitektura fakultetiga o'qishga kirdi. 1971-yili institutni tugatib, O'zbekiston shaharsozlik loyihalash institutiga ishga kirdi. U yerda Samarqand va Buxoro shaharlarini loyihalashda qatnashdi.

1982-yilda O'zbekiston tajriba ilmiy-ta'mir arxitektura badiiy ustaxonasiga ishga kirdi. 1995-yildan boshlab bu yerda rahbar lavozimida ishlab kelmoqda. Ish faoliyati davomida Buxoro, Xiva, Samarqand, Termiz, Qo'qon, Shahrisabz, Toshkent shaharlaridagi o'nlab tarixiy yodgorliklarni loyihalash va ta'mirlash ishlarida qatnashdi.

Respublikamiz mustaqillikka erishgandan so'ng Samarqand, Shahrisabz, Termiz, Buxoro, Xiva, Farg'ona, Marg'ilon shaharlarida o'tgan yubiley tadbirlarida faol ishtirok etdi.

Shuningdek, korxona ustalari zamonaviy binolarni pardozlash ishlarida – O'zbekiston Respublikasining Rossiyadagi elchixonasi binosi, Volgograddagi «Toshkent» restorani binosi, Germaniyaning Zul shahridagi do'stlik markazi binosi, AQShdagi elchixonamiz binosi, Toshkent shahar hokimligi binosi, Termizdag'i tarix muzeyi binosi, Qozog'iston va Malayziya Respublikasidagi binolarda bezak va pardozlash ishlarini bajardi.

### SAMARQAND GANCHKORLIK MAKTABI

#### Usta Anvar Quliyev

Anvar Quliyev Samarqandda tug'ilgan. U yoshligidan Samarqand shahridagi qurilish ustalarini tayyorlaydigan kursning ganch o'ymakorligi bo'limida ta'lim oldi. Bu yerda Usta Shirin Murodov ganch o'ymakorligidan dars berar

edi. Anvar Quliyev o'sha vaqtlardan boshlab Usta Shirinka shogird tushdi.

U xalq amaliy san'atini, ayniqsa, ganchkorlikni chuqur o'rgandi. Anvar Quliyev geometrik, o'simliksimon, gulli girih va boshqa naqsh kompozitsiyalarini tuzish sirlarini o'rgandi va amalda bajaradigan darajaga erishdi. U yosh bo'lsa da, naqsh kompozitsiyalarini osonlik bilan chizar va o'yib gul solar edi.

Anvar Quliyev 17 yoshida ganch o'ymakor usta bo'lib tanildi. U 1943-yili Toshkentdag'i Muqimiy nomli teatr binosini bezashga taklif etildi. Quliyev bu yerda mashhur ustalar bilan hamkorlikda ishladi, binoni an'anaviy ajoyib klassik ganch o'ymakorligi bilan bezadi. Bu yer Anvar Quliyev iste'dodi kamol topishida katta bosqich bo'ldi. U ustalar orasida nom qozonishga erishdi.

1946-yili Alisher Navoiy nomli Davlat akademik opera va balet katta teatri binosini qurishda Anvar Quliyev ham qatnashdi. U teatrning ichki va tashqi qismlarini ganch o'ymakorligi bilan bezashdi.

Usta 1949-yilda «Hurmat belgisi» ordeniga sazovor bo'ldi. U tarbiyalagan shogirdlar hozirda turli qurilishlarda ishlamoqdalar.

G'ofurov ikki pavilonda ajoyib namunaviy va zamonaviy ganch o'ymakorlik ishlarini bajardi. Ustalar uni yana bir karra tan oldilar. U naqsh kompozitsiya chizish va o'yishni yaxshi bilar edi. Usta 1939-yili Toshkentdag'i A. Navoiy nomidagi Adabiyot muzeyida ganch o'ymakorlik ishlarini bajardi. 1940-yili Toshkent viloyati ijroiya komitetini ganch o'yma bilan bezadi. Bu binoda Shamsiddin G'ofurov ganch o'ymakorligini usta Akrom Umarov bilan birlgilikda bajardi. Qirma pardozi texnikasi birinchi bo'lib asosiy sharafaga shu binoda qo'llandi. Bu qirma texnikasi turar joy binolarida ham qo'llandi. Shamsiddin G'ofurov ko'p rangli qirmani hamda unga choka pardozi berishni ko'p ishlatdi. Bu usul namoyonga ajoyib ko'rinish bag'ishlaydi.

1940–1941-yillari Usta Shamsiddin Samarcanddagi qurilish san'ati ustalari tayyorlaydigan kursda dars berdi va ajoyib o'quv materiallarini, jumladan, muqarnaslar, sharafalar, qurilishda ishlataladigan har xil detallarning maketini tayyorladi. 1942–1943-yillarda Muqimiy nomidagi teatrni gulganch bilan bezashda qatnashdi. Usta ko'pgina zamonaviy binolarni bezashda ishtirot etdi va ko'plab shogirdlar tayyorladi. Ustaning ganch naqsh namunalari Toshkent va Samarcanddagi muzeylarda saqlanmoqda.

## Usta Shamsiddin G'ofurov

Shamsiddin G'ofurov 1883-yili Samarcandda binokor va ganchkor oilasida tug'ildi. Otasi ganchkor, me'mor, g'isht teruvchi, gilkor, xullas, har tomonlama yetuk usta bo'lgan. Otasi Shamsiddinga 14–15 yoshidan ganchkorlik sirlarini o'rgatdi. 1909-yilda otasi vafot etdi. Shamsiddinga ancha qiyin bo'ldi, qurilishda ganch o'ymakorligi, g'isht terish, suvoqchilik va boshqa ishlarni mustaqil bajara boshladi. Ayniqsa, u ganch o'ymakorligi san'ati bilan ko'pchilikka tanila bordi. Shamsiddin Usta Sa'dulla va Usta Abduqodir, Usta Jamoliddin singari mashhur ustalarning boy tajribalarini o'rgandi.

Shamsiddin G'ofurov 1926-yili Sherdor, Ulug'bek, Tillakori madrasalarini, Shohi Zinda, Ko'k gumbaz va boshqa arxitektura yodgorliklarini qayta tiklashga hissa qo'shdi. Amur Temur maqbarasining ichidagi muqarnaslarni qayta tiklab, o'z mahoratini ko'rsatdi. 1923-yili Urganchdag'i yotoqxonani, 1937–1940-yillarda Butunittifoq xalq xo'jaligi yutuqlari ko'rgazmasida O'zbekiston pavilonini bezadi. Shamsiddin

## Usta Tursunboy Ismoilov

Tursunboy Ismoilov 1878-yili Samarcand yaqinidagi Churbi qishlog'ida tug'ildi. Uning otasi poyabzal tikadigan usta edi. 1894-yili Tursunboy Samarcandga kelib, Usta Sa'dulla shogird bo'ldi. Usta Sa'dulla o'sha vaqtida mashhur quruvchi bo'lgan. Tursunboy ustozi yonida 1929-yilgacha ishlaydi. Mahorati oshgan usta 1938-yili Moskvadagi Butunittifoq xalq xo'jaligi ko'rgazmasidagi O'zbekiston pavilonini bezatishga chaqirtiriladi. U ko'pgina ganch o'ymakorlik namunalarini yaratadi. Usta 1943-yili Muqimiy nomli teatr binosini ganch o'ymakorligi bilan bezashga jalb etiladi.

1945-yilning kuzidan 1946-yilning kuzigacha Usta Tursunboy Ismoilov Toshkentdag'i Navoiy nomli opera va balet katta teatrini bezashda qatnashadi. Shundan so'ng u Samarcandga qaytib, ko'pgina arxitektura yodgorliklarini qayta ta'mirlashga hissa qo'shdi.

## Aka va uka Usta Abdurasul Ibodov va Rauf Ibodovlar

Abdurasul Ibodov mashhur usta Shirin Murodovning eng qobiliyatli shogirdlaridan hisoblanadi. U 1946-yili ustozi Usta Shirin Murodov bilan Toshkentdag'i A. Navoiy nomli opera va balet katta teatrini bezashda qatnashdi.

Usta shogirdlari bilan ko'pgina teatr, kinoteatr, mehmonxona, oshxona va boshqa joylarni ajoyib ganch o'ymakorligi bilan bezashda ishtirok etib kelmoqda.

## Usta Azim

Usta Azim 1953-yilda Samarqand shahrida tug'ildi. U ganch o'ymakorligi hamda qurilish ishlarining ustasi hisoblanadi. Usta Azim ko'pgina masjidlar, hammomlar, madrasalar va turar joylarni qurish hamda bezashda qatnashgan. Xususan, Qoraboy, Oqsoqol, Muborak, Shobarbatdor kabi masjid va boshqa ko'pgina binolarni u bezatgan.

## Usta Mirhomid Yunusov

Mirhomid Yunusov 1890-yilda Samarqandda me'mor oilasida dunyoga keldi. Otasi Yunus Azizov me'mor bo'lgan. Mirhomid eski maktabda ta'lif olish bilan birga bo'sh vaqtlarida otasiga yordam berib yurgan. U 1908-yili Jizzax madrasasi va 1909-yili Panjob qishlog'idagi hammom qurilishida qatnashadi. 1910-yil Samarqandda yangi madrasa qurilishida ishtirok etadi. Undagi koshinlarni otasi Usta Yunus bilan birgalikda (uylarida koshin tayyorlaydigan xumdonda) tayyorladi. Uning otasi ko'pgina binolarning qurilishiga boshchilik qilgan.

Usta Mirhomid 1921—1922-yillarda Buxorodagi Minorai kalon va boshqa binolarni qayta tiklashda qatnashdi. U ko'pgina shogirdlar yetishtirdi. Faxriy yorliqlar va medallar bilan taqdirlangan.

## Ismatilla Ne'matov

Ismatilla Ne'matov 1927-yili Samarqandda tug'ilgan. U yoshlidan binolarni ganch o'ymakorligi bilan bezashda qatnashgan. Ismatilla Ne'matov 1942—1948-yillarda Usta Shirin boshchiligidagi Alisher Navoiy nomli opera va balet katta teatrini bezashga hissa qo'shgan. U Rassomlar uyushmasining a'zosi.

## Usta Omonulla

Usta Omonulla XIX asrning o'rtalarida Samarqandda dunyoga keldi. Omonulla ganchkor va g'isht teruvchi usta bo'lib, bu hunarni ustozi usta Jalildan o'rgangan. U ko'pgina binolar — hammom, masjid, madrasa, turar joy binolarini qurish va bezashda ishtirok etgan.

Usta Samarqand Registonidagi Sherdor madrasasini qayta ta'mirlashda qatnashgan. Usta Omonulla ganch o'ymakorligini ko'pincha samarqandlik Usta Abdurashid bilan birga bajargan.

## Usta Yunus Azizov

Usta Yunus Azizov 1860-yilda Samarqandda dunyoga keldi. 12 yoshidan ganch o'ymakorligi bilan shug'ullandi. U me'mor Abduqodirga shogird tushib, masjid, hammom, madrasa va ko'pgina uylarni qurishda qatnashdi. U me'mor bo'lsa-da, ganch o'ymakorligi san'atini yaxshi bilgan.

Usta O'zbekistonning ba'zi shaharlaridagi binolarni qayta tiklash va bezashda, chunonchi Samarqanddagi Tillakori madrasasini qayta tiklashda qatnashgan. U 1924-yili vafot etgan.

## Usta Abdurashid Jalilov

Usta Abdurashid Jalilov Samarqandda 1880-yil quruvchi oilasida tug'ildi. Uning bobosi Usta Abdunazar mashhur quruvchi bo'lib, Samarqand, Xiva va Buxorodagi ko'pgina binolarni qurishda ishtirok etgan. Usta Abdunazarning uchta: Abdurashid, Abdunabi va Abdujalil ismli o'g'illari bo'lgan. Ular otasi bilan Buxorodagi ko'pgina binolarni qurish va bezashda qatnashganlar. 1900-yili otasi vafot etgach, Abdurashid ikki yil amakisni Abdumalikning qo'lida ishlaydi.

Usta Abdurashid Samarqand, Buxoro va Toshkentdag'i ko'pgina binolarni, jumladan, Navoiy nomli opera va balet katta teatrini bezashda qatnashgan.

## Ibrohim Shermuhamedov

Ibrohim Shermuhamedov Samarqandda tug'ilgan. U yoshlidan ganch o'ymakorligiga qiziqib, usta Shirin Murodovga shogird tushadi. 1946-yilda Navoiy nomli opera va balet katta teatrini qurish va bezashda qatnashdi. Bu yerda Usta Ibrohim ajoyib ganch o'ymakorlik namunalarini yaratdi. 1947-yilda Muqimiy nomli teatrni bezashda ishtirok etdi.

U A. Navoiy nomli Samarqand universitetining panjaralarini va majlislar zalini bezadi, Shohi Zinda, Tillakori, Sherdor, Ulug‘bek madrasalarini va boshqa arxitektura yodgorliklarini ta’mirlashda faol qatnashdi. Usta Ibrohim Samarqand ganchkorlik matabining yetakchi vakillaridan biri, O‘zbekiston Fanlar akademiyasining faxriy a’zosidir. U ko‘pgina iste’dodli shogirdlar tayyorladi.

### Quli Jalilov

Quli Jalilov (1890—1960) Samarqandda quruvchi oиласида tug‘ildi. Otasi Abdujalil eng ko‘zga ko‘ringan ustalardan bo‘lgan. Otasingin vafotidan so‘ng akasi Abdurashid bilan Buxorodagi amakisi Abdumalik oldiga boradilar. Amakisi ham zamonasining tanilgan ustalaridan biri edi. Ular amakisi boshchiligidagi ko‘pgina madrasa, masjid va turar joylarni ganch o‘ymakorligi bilan bezaydilar. Quli Jalilov 15 yil Usta Abdumalik qo‘lida ishlaydi. Usta Quli Jalilov Buxoroda madrasa qurilishida, Samarqandda maktab, institut va boshqa binolar qurilishida ishlaydi, ularni bezaydi. So‘ng Quli Jalilov Samarqanddagagi quruvchi ustalar tayyorlaydigan kursda instruktur bo‘lib ishlaydi. Ayni vaqtida maktab, shifoxonalar qurishda, Samarqanddagagi yodgorliklarni, xususan, Ulug‘bek, Sherdor madrasalari, Shahrisabzdagi arxitektura yodgorliklarini ta’mirlashda qatnashadi. A. Navoiy nomli opera va balet katta teatrini bezashda ham ishtirok etdi. Usta Quli Samarqand zalini bezagan. U bu yerda ajoyib ganch o‘ymakorlik namunasini yaratgani uchun Davlat mukofotiga sazovor bo‘ladi. 1947-yili Muqimiy nomli teatrning ko‘rish zalini ganch o‘ymakorligi bilan bezaydi. Keyinchalik umrining

oxirigacha — 1960-yilgacha Samarqandda arxitektura yodgorliklarini qayta tiklashda qatnashadi. Shu yili u Samarqandda vafot etadi.

### XORAZM GANCHKORLIK MAKTABI

Usta Ro‘zimat Mashari pov

Usta Ro‘zimat Mashari pov 1870-yilda Xivada quruvchi oilasida tug‘ildi. Otasi quruvchi, ganchkor va naqqosh edi. O‘g‘li Ro‘zimatga yoshlik chog‘idan boshlab qurilish, ganchkorlik va naqqoshlik sirlarini o‘rgatib bordi. Ro‘zimat otasiga yordam berib yurib, naqsh kompozitsiyalar chizishni va ularni ganchda o‘yib, pardoz berishni qunt bilan o‘rgandi. U yoshlidan boshlab ustalarning suhbatlarini, maslahatlarini olishga qiziqar, mustaqil ishlashga intilar edi.

Ro‘zimat Mashari pov, ayniqsa, ganch o‘ymakorligini yaxshi o‘rgandi. Otasi o‘g‘liga dastlab sodda, keyin esa murakkab o‘yma ganchlarni bajarishni o‘rgatdi. U o‘z ustida ko‘p ishlar edi. Ota-bola ko‘pgina binolar qurdilar va ganch o‘ymakorlik ishlarini bajardilar.

1946-yili Ro‘zimat Mashari pov A. Navoiy nomli opera va balet katta teatrini bezashda qatnashdi. U teatrning Xiva zalini, ko‘pgina xonalarini xivacha usulda ganch o‘ymakorligi bilan bezaydi.

U Xivadagi Olloqulixon madrasasi, Anushaxon hammomi, Oq masjid va shu singari binolarni ta’mirlashda qatnashdi.

Ro‘zimat Mashari povning ko‘pgina iste’dodli shogirdlari hozirgi kunda zamoraviy binolarning ganch o‘ymakorligi ishlarini bajarib kelmoqdalar.

## USTA VA SHOGIRD ODOBI AN'ANALARIGA OID QISQACHA LUG'AT

**Adab** – yaxshilik bilan yomonlikning farqini bilish, foyda bilan zarar orasidagi tafovutni anglash. Adab vositasida kishi o‘zini yomon xislatlar, yoqimsiz ayblardan poklaydi, chirolyi fazilatlar bilan bezaydi.

Adab kishiga chirolyi xulq baxsh etadi. Natijada barcha bunday kishidan rozi bo‘ladi. Adab egasining obro‘sı kundan-kunga oshadi, ahvoli yaxshilanadi, ishlari ravnaq topadi.

Ba’zi hakimlar «Adabni eng mas’um va ko‘rkam fe’lga ega bo‘lish» desalar, boshqalari «Adab – nafshi qabih odatlardan tozalash» deydiilar. Binobarin, adab – noyob ne’mat. Adab - aqlning suyanchig‘i, barcha fazilatlarning joni.

**An’ana** – avloddan-avlodga o‘tib boradigan va doim saqlanadigan madaniy meros.

**Axloq** – kishilarning bir-biriga, oilaga, jamiyatga bo‘lgan munosabatlarida namoyon bo‘ladigan xatti-harakatlari, xulq-atvori, odobi majmui.

**Bo‘hton** – birov qilmagan ishini qildi deb yolg‘on-yashiqdan qilingan tuhmat.

**Dag‘allik** – yovuz xulqli, bemehr va beshafqat, qo‘polu johil bo‘lish.

**Mashq** – biror faoliyatni puxta o‘zlashtirish yoki sifatini yaxshilash maqsadida uni ko‘p marta takrorlash.

**Hunar** – kasb, soha.

**Hunarli** – biror hunarni bilgan kishi.

**Hunarmand** – biror hunar bilan muntazam shug‘ullanuvchi usta.

**Hunarmandchilik** – mayda hajmda qo‘lda buyum ishlab chiqarish.

**Manmanlik** – o‘ziga ortiqcha bino qo‘yish.

**Ma’rifat** – kishilarning ongi, bilimi, madaniyatini oshirishga qaratilgan ta’lim-tarbiya.

**Minnat** – qilgan yaxshilagini betiga aytib, ranjitish.

**Shogird** – usta yoki mutaxassisdan hunar o‘rganayotgan kishi.

**Takabburlik** – kekkaygan, g‘o‘ddaygan, dimog‘dor, kibrli kishi.

**Usta** – biror hunarni mukammal biladigan hunarmand.

**Ustoz** – o‘qitgan, hunar o‘rgatgan, fan-hunar cho‘qqilariga yetaklab, ko‘p zahmatlar oqibatida shogirdining kamol topishiga sababchi bo‘lgan inson.

**Uyatsizlik** – so‘zlaganda adabsizlik qilib, uyat, qabih, haqorat so‘zlarni ishlatish, axloq normalardan chekinish.

**Yovuzfe’llik** – birovning boshiga kelgan qay-g‘u, musibat, balo-qazo yoki omadsizlikni ko‘rib, achinish o‘rniga, quvonish.

## MAVZULARGA OID TEST SAVOLLARIGA JAVOBLAR

### Ganchkorlik san'ati tarixi

- 1-savol – javob E
- 2-savol – javob B
- 3-savol – javob E
- 4-savol – javob B
- 5-savol – javob B, D
- 6-savol – javob A
- 7-savol – javob A
- 8-savol – javob D
- 9-savol – javob B
- 10-savol – javob D
- 11-savol – javob D
- 12-savol – javob E
- 13-savol – javob B
- 14-savol – javob A

### Usta va shogird odobi

- 1-savol – javob C
- 2-savol – javob B
- 3-savol – javob B
- 4-savol – javob E
- 5-savol – javob B
- 6-savol – javob D
- 7-savol – javob A, B, C, D
- 8-savol – javob A, B, C, D
- 9-savol – javob B
- 10-savol – javob C
- 11-savol – javob D

### Ganchkorlikda ishlataladigan asbob- uskunalar va ulardan foydalanish

- 1-savol – javob A
- 2-savol – javob D
- 3-savol – javob A
- 4-savol – javob D
- 5-savol – javob E
- 6-savol – javob B
- 7-savol – javob E
- 8-savol – javob B
- 9-savol – javob D
- 10-savol – javob D
- 11-savol – javob D
- 12-savol – javob C
- 13-savol – javob B

### Naqsh va uning turlari hamda ramziylik

- 1-savol – javob A
- 2-savol – javob E
- 3-savol – javob B
- 4-savol – javob B
- 5-savol – javob D
- 6-savol – javob E
- 7-savol – javob C
- 8-savol – javob A
- 9-savol – javob C
- 10-savol – javob E
- 11-savol – javob E
- 12-savol – javob D
- 13-savol – javob A
- 14-savol – javob A
- 15-savol – javob A

### Ganch o'ymakorligida naqsh elementlarini chizish

- 1-savol – javob E
- 2-savol – javob D
- 3-savol – javob A
- 4-savol – javob C
- 5-savol – javob D
- 6-savol – javob C
- 7-savol – javob C
- 8-savol – javob E
- 9-savol – javob D
- 10-savol – javob A
- 11-savol – javob B
- 12-savol – javob A
- 13-savol – javob B
- 14-savol – javob D

### Oddiy naqsh namunalarini chizish

- 1-savol – javob D
- 2-savol – javob C
- 3-savol – javob A
- 4-savol – javob B
- 5-savol – javob C
- 6-savol – javob E
- 7-savol – javob D
- 8-savol – javob B
- 9-savol – javob D
- 10-savol – javob A
- 11-savol – javob E
- 12-savol – javob D
- 13-savol – javob B
- 14-savol – javob B

**Ganch o'ymakorligida ishlataladigan materiallar va ularni ishlatish texnologiyasi**

1-savol – javob B  
2-savol – javob E  
3-savol – javob C  
4-savol – javob D  
5-savol – javob E  
6-savol – javob A  
7-savol – javob C  
8-savol – javob D  
9-savol – javob B  
10-savol – javob C  
11-savol – javob C  
12-savol – javob E  
13-savol – javob B

**Pardoz va uning turlari**

1-savol – javob B  
2-savol – javob D  
3-savol – javob E  
4-savol – javob A  
5-savol – javob C  
6-savol – javob D  
7-savol – javob E  
8-savol – javob D  
9-savol – javob E  
10-savol – javob C  
11-savol – javob B

**Zanjira va uning turlari**

1-savol – javob A  
2-savol – javob B  
3-savol – javob E  
4-savol – javob C  
5-savol – javob D  
6-savol – javob B  
7-savol – javob A  
8-savol – javob C  
9-savol – javob D  
10-savol – javob D  
11-savol – javob A  
12-savol – javob E  
13-savol – javob B  
14-savol – javob C  
15-savol – javob B

**Oddiy naqsh namunalarini o'yish va pardozlash**

1-savol – javob E  
2-savol – javob D  
3-savol – javob B  
4-savol – javob C  
5-savol – javob A  
6-savol – javob E  
7-savol – javob D  
8-savol – javob B  
9-savol – javob C  
10-savol – javob C  
11-savol – javob E  
12-savol – javob B

**Kompozitsiya. Oddiy naqsh kompozitsiyalar tuzish**

1-savol – javob C  
2-savol – javob D  
3-savol – javob E  
4-savol – javob B  
5-savol – javob C  
6-savol – javob E  
7-savol – javob E  
8-savol – javob A  
9-savol – javob B  
10-savol – javob B  
11-savol – javob E  
12-savol – javob C  
13-savol – javob D  
14-savol – javob A

**Namoyon kompozitsiyasini tuzish va o'yish**

1-savol – javob D  
2-savol – javob B  
3-savol – javob B  
4-savol – javob E  
5-savol – javob B  
6-savol – javob C  
7-savol – javob C  
8-savol – javob A  
9-savol – javob B  
10-savol – javob A  
11-savol – javob A  
12-savol – javob B  
13-savol – javob D

## MUNDARIJA

<b>Kirish .....</b>	<b>3</b>
<b>Ganchkorlik san'ati tarixi .....</b>	<b>5</b>
<b>Usta va shogird odobi .....</b>	<b>11</b>
<b>Ganchkorlikda ishlataladigan asbob-uskunalar va ulardan foydalanish .....</b>	<b>19</b>
<b>Naqsh, uning turlari hamda ramziylik .....</b>	<b>24</b>
<b>Ganch o'ymakorligida naqsh elementlarini chizish .....</b>	<b>31</b>
<b>Oddiy naqsh namunalarini chizish .....</b>	<b>43</b>
<b>Ganch o'ymakorligida ishlataladigan materiallar va ularni ishlatish texnologiyasi .....</b>	<b>60</b>
<b>Pardoz va uning turlari .....</b>	<b>65</b>
<b>Zanjira va uning turlari .....</b>	<b>69</b>
<b>Oddiy naqsh namunalarini o'yish va pardozlash .....</b>	<b>77</b>
<b>Kompozitsiya. Oddiy naqsh kompozitsiyalari tuzish .....</b>	<b>82</b>
<b>Namoyon kompozitsiyasini tuzish va o'yish .....</b>	<b>92</b>
<b>Atamalar lug'ati.....</b>	<b>98</b>
<b>1-i洛va. Donishmandlar hunar haqida .....</b>	<b>107</b>
<b>2-i洛va. Ganch o'ymakor ustalarning hayoti va ijodi .....</b>	<b>108</b>
<b>3-i洛va. Usta va shogird odobi an'analariga oid qisqacha lug'at .....</b>	<b>120</b>
<b>4-i洛va. Mavzularga oid test savollariga javoblar .....</b>	<b>121</b>

**Saidahbor BULATOV, Asrol MUXTOROV**

**GANCHKORLIK SAN'ATI**

**Oliy o'quv yurtlari uchun darslik**

*O'zbek tilida*

Nashr uchun mas'ul *M.Po'latov*

Muharrir *Z.Jo'mayev*

Texnik muharrir *V.Barsukova*

Rassom *B.Ashurov*

Kompyuterda teruvchi *D.Saparova*

**AB № 33**

O'zbekiston davlat konservatoriyasining «Musiqa» nashriyoti.  
Toshkent, B.Zokirov ko'chasi, 1-uy.

Bosishga 2006-yil 30-oktabrda ruxsat etildi. Bichimi 60x84 1/4. Tayms garniturasi. Ofset bosma.  
Ofset qog'oz. Shartli bosma toboq 14,41 + 0,46 (qo'shimcha). Nashr tobog'i 15,0 + 0,46 (qo'shimcha).  
Adadi 1000 nusxa. Bahosi shartnomaga asosida.

«Ren-Poligraf» bosmaxonasida chop etildi. Toshkent. Muqimiy ko'chasi, 178-uy.  
Buyurtma №1478



ISBN 978-9943-307-01-8